

# DI'IDZA' LA'IYA BZU SAN LUCAS LĒ'Ē GUICHI

## Ga rzulao di'idza'

**1** Yaca ben' zē babzuyaquē' di'idza' lē'ē guichi ta yu'u ni'a xnezi con ca guca quiendo' dza na'. <sup>2</sup>Bzuyaquē' di'idza' lē'ē guichi ca ta una yaca ben' blē'ē cabē' guca desde dza zasu Jesús. Lēleyaquē' udixogue'rēyaquē' di'idza' la'iya quie Diuzi. <sup>3</sup>Lēscan' nē'ēdi' unaba'yudya' dyē'ēdi cabē' guca desde dza ga uzulaon quie Jesús. Lēlena' raqueda' tahuen na' hua' itu guichi ni ta ise'ela'n laolo' bicha' Teófilo. <sup>4</sup>Lēlena' rua' cuenda inezile dyē'ēdi nacan di'idza' li ca ta udixogue'yaquē' luē'.

## Ga rguixogue' tu ángel cabē' gaca bē' su Juan bautista

<sup>5</sup>Lēdza na' uzu rey Herodes r nabē'nē' estado Judea, zurē itu ben' naca pxuzi laonē' Zacarías. Naquē' tu cue' len yaca ben' nao pxuzi lao Abías. Naca nigula quie Zacarías ži'i suba Aarón, ben' gucarē pxuzi dza na'te. Lēbē' laohuē' Elisabet. <sup>6</sup>Blē'ē Diuzi leyaquē' ben' dya'a. Bzuyaquē' di'idza' ca rna ley yu'u di'idza' la'iya quie Diuzi. Lēlena' nunu saque' gao leyaquē' xquia. <sup>7</sup>Pero

nunu ži'iyaquē' uzu, dan' guca Elisabet ben' bidyi. Lao rupayaquē' nacayaquē' ben' gula.

<sup>8</sup>Biži bdyin dza babedula' turno quie tu cue' pxuzi ben' nacalē Zacarías tzaže. Babedula' turno rioyaquē' lu'u idao' r nabē'ra, dan' nacayaquē' pxuzi ta hue'lēyaquē' Diuzi di'idza'. <sup>9</sup>Ca costumbre quie yaca pxuzi bedula' Zacarías uyu'uguē' lu'u idao' r nabē'ra ta udze'nē' dzen yalo lao becugo. <sup>10</sup>Biži caora rei dzen yalo lao becugo, na'ra nita' yaca ben' zē lali'a r lidzayaquē' Diuzi. <sup>11</sup>Caora na' ptilalao tu ángel quie Diuzi bazēguē' zaquē' yebē lao becugo. <sup>12</sup>Biži caora blē'ē Zacarías tu ángel, tu bdzebizinē', bira ubinnē' bi nē'. <sup>13</sup>Na'ra una ángel rēbinē' Zacarías: —Zacarías, bidzebo', babe Diuzi ca naca oración quio' r nalo'. Nigula quio' Elisabet hua' ži'inē' huazu ži'ilo' ixubo' laobi' Juan. <sup>14</sup>Lega yedaohuela'obi'. Lēscan' yedaohuerē yaca ben' zē cati bazubi'. <sup>15</sup>Cana' gaca quiele dan' huacabi' ben' že, huacabi' ben' bala'ana lao Diuzi. Biyo'obi' vino, biyo'obi' ta xudyibi'. Huayu'ubi' Bichi Be que Diuzi desde yu'utebi' lu'u lē'ē

žna'bi'. <sup>16</sup>Huacalēbi' yaca ben' zē, ben' Israel, ta yetza'yaquē' pensari quieyaquē' ta yenaoyaquē' xneza Diuzi. <sup>17</sup>Lēbi' cuialaonezabi' ta quixogue'bi' benē' baza' ben' ise'ela' Diuzi. Con ca bē profeta Elías, bēnē' yela' huaca quie Diuzi, cana' huerē ži'ilo' yedze'bi' pensari quie Elías lu'u guicho laxta'o yaca benē' ta bitilalē xuziyaquē' len ži'iyaquē', lēscan' ta galerē yaca ben' birale quie Diuzi. Cana' huebi' tacuenda chezila'adyi' yaca benē' yez'i'yaquē' ben' ise'ela' Diuzi.

<sup>18</sup>Biži na' unaba Zacarías ángel: —¿Cabīzi hua' ta inezda' gaca quia' cabē' baonao'? Porque nē'ēdi' banaca' ben' gula. Lēscana' ben' gula naca nigula quia'.

<sup>19</sup>Na'ra una ángel rēbinē' lēbē': —Nē'ēdi' laohua' Gabriel. Rua' mandado rue Diuzi. Use'elē' nē'ēdi' ta detixogui'a luē' ca tadya'a hue Diuzi quio'. <sup>20</sup>Ca naca bigulelo' can' baonia' luē', huega'nlo' bira gaca inēlo' hasta que idyin dza galo xcuidi' quio'. Uzun di'idza' can' baonia' cati idyin dza.

<sup>21</sup>Biži yaca ben' nita' lali'a, rbezayaquē' ta yero Zacarías rebanyaquē' dan' rdzētzegue Zacarías lu'u idao' r nabē'ra.

<sup>22</sup>Babero Zacarías lu'u idao' r nabē'ra bedapa' ru'anē' bira guca inēnē'. Biži yaca benē' gucabē'yaquē' guca quiē' ca ben' uxusa. Blē'ēnē' tu ta blē'ēnē' lu'u idao' r nabē'ra. Biži señazi ruenē' rlu'enē' benē' bira guca inēnē'.

<sup>23</sup>Babeyudyi ca tu dza uzunē' lu'u idao' r nabē'ra, na' bezē' zeyoguē' žan yu'u quienē'. <sup>24</sup>Ude beyudyi guca can', žgulē' Elisabet, banu'a

ži'inē', bega'nnē' zunē' žan yu'u quienē' lao ga'yo' biu'. <sup>25</sup>Na'ra unē': “Ca ta bacuan bē Diuzi quia' ta bira inē yaca benē' quia' bizinaquezi.”

### Udixogue' tu ángel cabē' gaca galo Jesús

<sup>26</sup>Biži bezu lao xopa biu' bē'lē ángel Gabriel Elisabet di'idza', bese'ela' Diuzi lēbē' tatula lao yedyi Nazaret ga nebaba Galilea. <sup>27</sup>Bese'elē' lēbē' ta tzanē'ē tu nigula cuidi', ben' binehuebē' be'mbyu. Lēlēbi' laobi' María. Lēnigula na' banapabi' di'idza' len bi' lao José ta utzagana'yacabi'. Naca José ži'i suba rey David. <sup>28</sup>Biži uyu'u ángel lu'u yu'u ga zu María, unē' rēbinē' lēbi': —Padiux, raxetzague Diuzi ca ruelo'. Zucazi Diuzi rnē'ē luē'. Huela'iya Diuzi luē' ca nurla yaca nigula tula.

<sup>29</sup>Na'ra cati blē'ē María ángel, tu bebanzibi' cabē' gudyi ángel lēbi'. Cana' guquebi': “¿Bixquien' una ángel nē'ēdi' cana'?” <sup>30</sup>Na'ra una ángel rēbinē' lēbi':

—María, bidzebo' huacalēcazi Diuzi luē'. <sup>31</sup>Na'ra huayu'u bdao' byu lu'u yu'užixo'. Na' ixubo' laobi' Jesús. <sup>32</sup>Huacabi' ben' že lao Diuzi. Huacabi' ži'i Diuzi zu guibá. Hue' Diuzi yela' r nabē' quienē' ta inabē'nē' ca unabē' xuzixta'onē' rey David. <sup>33</sup>Cana' inabē'nē' tuzioli yaca ben' Israel. Biyeyudyi yedu yela' r nabē' quienē'.

<sup>34</sup>Biži unaba María ángel: —¿Como gaca quia' con ca baonao', den' binesulia' be'mbyu? <sup>35</sup>Biži una ángel rēbinē' María: —Huayēzi Bichi Be quie Diuzi ga zulo'. Ca idubi tu beo, cana'

huadubi yela' huaca quie Diuzi zu sibi luè'. Lèbdao' su na', huacabi' ben' naca la'iya quie Diuzi, huacabi' ži'i Diuzi. <sup>36</sup>Lèzi ben' diadza quio' Elisabet, huazurè ži'inè' ba'ala'cazi banaquè' ben' gula, ben' una yaca benè' naquè' nigula bidyi. Biži na'a lao xopa biu' banu'a ži'inè'. <sup>37</sup>Para Diuzi bibi zèdi gaquenè' tu ta huenè'.

<sup>38</sup>Na'ra una María rëbibi' ángel: —Nacacaza' ben' hue dyin quie Diuzi. Hue'encazi huegara Diuzi quia' cabè' baonao'.

Na'ra beza' ángel zeyoguè'.

#### Uyo María yeyubibi' Elisabet

<sup>39</sup>Lèdza na', laozate María ziobi' yedyi ga zu ya'a, yedyi nebaba Judea. <sup>40</sup>Biži cati bdyimbi' ga zu lidyi Zacarías, na' uyu'ubi' lu'u yu'u rgapabi' diuži Elisabet. <sup>41</sup>Caora be Elisabet bgapa María lëbè' diuži, cana' bda bdao' yu'u lu'u yu'užixinè'. Biži caora na' uyu'u Bichi Be quie Diuzi lëbè'. <sup>42</sup>Na'ra unè Elisabet zidzo rëbinè' María: —Babëla'iya Diuzi luè' cala ca nurla yaca nigula. Lèzi babëla'iyane ži'ilo'. <sup>43</sup>¿Nuži naca' nè'èdi' babido' idenao' nè'èdi'? Naco' luè' žna' ben' ise'ela' Diuzi. <sup>44</sup>Ca naca bido' rgapo' nè'èdi' diuži, caora na' bda bdao' yu'u lu'u yu'užixa' redaohuebi'. <sup>45</sup>Tadya'a gula gaca quio' bagulelo' con can' baona Diuzi como dan' uzucazin di'idza' can' baonanè'.

<sup>46</sup>Na'ra una María:

Raxeda' rnia' naca Diuzi ben' že gula.

<sup>47</sup>Redaohue guicho laxta'ohua' ca rue Diuzi, ben' ute usela nè'èdi'.

<sup>48</sup>Babeyèchi'la'adyi' Diuzi nè'èdi', naca' ben' hue dyin quienè'.

Huana yaca ben' zaza' zanita' tahuen gula guca quia'.

<sup>49</sup>Naca Diuzi ben' r nabè' lao yugulute.

Tadya'a gula bënë' quia'.

Naca Diuzi ben' la'iya.

<sup>50</sup>Tuzioli reyèchi'la'adyi'nè' yaca ben' rapala'n lëbè'.

<sup>51</sup>Bënë' yela' huaca quienè'.

Pcaxonè' yaca ben' rue že cuine.

<sup>52</sup>Begubè' yela' r nabè' quie yaca ben' r nabè', bënë'n yaca ben' yèchi', ben' ruzu di'idza' quiè'.

<sup>53</sup>Yaca ben' udue, bipca'nnè' leyaquè' sin gaoyaquè', pero yaca ben' uña'a, bega'nyaquè' biguta' ta gaoyaquè'.

<sup>54</sup>Gucalënë' yaca ben' yedyi Israel, yaca ben' quienè'.

Bigulala'adyi'nè' leyaquè' beyèchi'la'adyi'nè' leyaquè'.

<sup>55</sup>Cana' bënë' ca naca di'idza' bega'nlënë' xuzixta'oro, bënë' ca naca di'idza' bega'nlënë' Abram len diadza quienè' para tuzioli.

<sup>56</sup>Biži guca lao tzona biu' uzu María lidyi Elisabet. Ude na' beza'bi' zeyobi' lidyibi'.

#### Ca guca cati baozu Juan bautista

<sup>57</sup>Biži bdyin uya' biu' ta su bdao' quie Elisabet, na' uzu tu bdao' byu quiè'. <sup>58</sup>Bè' unezi yaca ben' diadza quienè', len yaca ben' lao yedyi baozu bdao' quienè', bdyinyaquè' dena'yaquè' lëbè' ca tahuen gula guca quienè'. <sup>59</sup>Biži guca lao xuna dza, bdyin yaca ben' uzu tu xèdyidao' cuin bdao' según ca naca ley quieyaquè'. Cana' gu'unyaquè'

yeyu'eyaqué' laobi' ca lao xuzibi'  
Zacarías. <sup>60</sup>Na'ra una žna' bdao':

—Biyeyu'ero laobi' lao xuzibi'.  
Hue'ro laobi' Juan.

<sup>61</sup>Biži unayaqué' rëbiyaqué' lëbë':

—¿Bixquien' ilaobi' Juan? Ni tu  
yaca ben' diadza quio' bizu yaca  
ben' lao cana'.

<sup>62</sup>Na'ra bëyaqué' seña  
unabayaqué' xuzi bdao' ta  
ineziyaqué' ca biži re'en xuzibi'  
ilaobi'. <sup>63</sup>Na'ra unabanë' tu yaga  
ta'a bzuguë' letra bzunë': “Laobi'  
Juan.” Biži tu bega'nziyaqué'  
bebanyaqué' can' guca. <sup>64</sup>Biži  
caora na' benë Zacarías, ruenë'  
Diuzi ben' že. <sup>65</sup>Bega'n yaca ben'  
lao yedyi tu bebanziyaqué'. Na'  
bë'lë yaca ben' nita' yedyi nebaba  
Judea laguedyiyaqué' di'idza' cabë'  
guca quieyaqué'. <sup>66</sup>Ca naca lao  
yugulu ben' unezi, gucayaqué'  
pensari unayaqué' rëbiyaqué'  
laguedyiyaqué':

—¿Ca biži gaca quie xcuidi' na'?  
Cana' unajë' dan' talicazi bëla'iya  
Diuzi lëbi'.

### Bë Zacarías Diuzi ben' že

<sup>67</sup>Na'ra Zacarías, ben' naca xuzi  
bdao', du yu'unë' Bichi Be quie  
Diuzi, unë' cabë' re'en Diuzi inënë'.  
Lëlena' unë' cani:

<sup>68</sup>Ben' že naca Diuzi quie ben' ra'o,  
ben' Israel, como dan' babidë'  
len ra'o, nacaro ben' quienë',  
bapte pselanë' ra'o.

<sup>69</sup>Baose'elë' tu ben' ute usela ra'o,  
ben' de yela' huaca quie.  
Lë'lëbë' naquë' ži'i suba rey David,  
ben' naca siervo quie Diuzi.

<sup>70</sup>Cana' naca di'idza' bega'nlë  
Diuzi xuzixta'oro tiempote.

Conlë yaca ben' udixogüe'  
di'idza' la'iya quienë', cana'  
udixogüe' Diuzi bin' huenë'.

<sup>71</sup>Unë' ute uselanë' ra'o quie yaca  
ben' rudie rdza' ra'o.

<sup>72</sup>Unë' yeyëchi'la'adyi'në' yaca  
ben' naca xuzixta'oro.  
Bigala'adyi'në' huenë' cabë'  
di'idza' naca la'iya bega'nlënë'  
leyaquë'.

<sup>73</sup>Lëscan' para ra'o, bega'nlënë'  
ra'o di'idza'.

Cana' naca di'idza' bega'nlë  
Diuzi xuzixta'oro Abraham.

<sup>74</sup>Unë' ute uselë' ra'o bibi hue  
yaca ben' rudie rdza' ra'o  
para naoro xnezë' sin idzebiro.

<sup>75</sup>Cana' gacaro ben' hue quie lëbë',  
ben' naca la'iya quienë' dza  
rdaro lao yedyi layu.

<sup>76</sup>Na'ra luë' ži'ina', huaco'  
ben' quixogüe' xti'idza'  
Diuzi zu guibá, como dan'  
huabialaonezo' lao ben'  
ise'ela' Diuzi ta tzetixogüe'lo'  
benë' de que huida ben'  
ise'ela' Diuzi.

<sup>77</sup>Cana' huelo' cuenda inezi yaca  
ben' Israel cabë' bë Diuzi ta  
ute uselanë' ra'o, yezi'ženë'  
dula' xquia quiero.

<sup>78</sup>Tanun quie nedyë'ë Xuziro Diuzi  
ra'o reyëchi'la'adyi'në' ra'o,  
aose'elë' tu ben' uzioñe'ra'o  
desde guibá ga zuë'.

<sup>79</sup>Cana' bë Diuzi cuenda tzioñe'e  
yaca ben' rda lao lato lao  
chula, yaca ben' ruen žudyi  
gatiyaca.

Cana' bë Diuzi quiero cuenda  
gacalënë' ra'o, yedzeleró  
naoro xnezë', cue' chizi lu'u  
guicho laxta'oro.

Cana' una Zacarías dza na'.

<sup>80</sup>Biži xcuidi' gu'unibi' labezi, gucabi' bi' huala, yu'ubi' Bichi Be quie Diuzi. Na'ra uzubi' lao lato ga bidyia yu'u hasta bdyin dza uzulaobi' rguixogue'bi' yaca ben' Israel xti'idza' Diuzi.

### Ca guca bē' uzu Jesús

(Mt. 1.18-25)

**2** Biži lao dza na', uzu tu ben' naca gobierno, ben' rnabē'ra laohuē' Augusto. Na' bēnē' mandado ta guca censo quie lao duže yedyi con ga rnabē'nē'. <sup>2</sup>Lēcenso na' gucan tanēro caora uyo Cirenio gobernador quie yu nebaba Siria. <sup>3</sup>Gucan quie lao yugulute yaca ben' con gatezi nita'yaquē' de yeyoyaquē' lao yedyi ga golo'yaquē' tacuenda tzu'u laoyaquē' lao lista. <sup>4</sup>Cana' guca bero José yedyi Nazaret ga nebaba Galilea zioquē' yedyi Belén ga nebaba Judea. Lēgan' na' ga golo rey David como dan' naca José ben' diadza quie rey David. <sup>5</sup>Bedyin José len María Belén para tzu'u laoyaquē' lao lista. Naca María bi' banapalē di'idza' José ba'ala'cazi banu'a ži'ibi'. <sup>6</sup>Biži banita'yaquē' Belén na', bdyin dza golo bdao' quie María. <sup>7</sup>Biži golo bdao' nēro quie María. Beyudyi na' bezi'yaquē' bdao' betubiyaquē'bi' la'ari' bexubayaquē'bi' lao yaga žan yu'u ga yu'u bēdyihuaga. Cana' guca quieyaquē', dan' biguta' lato lu'u yu'u quie yaca benē' gasiyaquē'.

### Ptilalao yaca ángel yaca ben' rapa beco' ži'ila'

<sup>8</sup>Biži ga'ala' ga re' Belén nita' yaca ben' rapa beco' ži'ila'. Rega'nlēyaquē' beco' ži'ila'

quieyaquē' layela ta rapayaquē'ba' yedu yela. <sup>9</sup>Lēcana' labdyinte tu ángel quie Diuzi gan' nita' yaca ben' rapa beco' ži'ila'. Caora na' bdyin yela' huaca quie Diuzi ulēchin xni' gan' nita'yaquē'. Lega bega'nyaquē' bdzebiyaquē'. <sup>10</sup>Na'ra una ángel rēbinē' leyaquē':

—Bidzebile, porque nē'ēdi' nu'a tu di'idza' dya'a nacan ta yedaohue lao yugulute benē'. <sup>11</sup>Lēlena' rnia' le'e agolo tu bdao' yedyi Belén ga golo rey David. Lēbdao' na' ute uselabi' yaca benēchi'. Bagolo ben' naca Cristo, ben' use'ela' Diuzi. <sup>12</sup>Ta inezile nacan tali ca rnia', huedzelele bdao' dhubibi' la'ari' žubabi' lao yaga žan yu'u ga yu'u bēdyihuaga.

<sup>13</sup>Biži yesazi bdyinra yaca ángel zēra, ben' za' guibá gan' zē ángel, ruejē' Diuzi ben' že unayaquē':

<sup>14</sup>iBen' že Diuzi zu sibi!

iHuaca tadya'a gula quie yaca ben' nita' lao yedyi layu, ben' hue quie Diuzi!

<sup>15</sup>Biži babeyudyi na', beyēpi yaca ángel guibá. Na' bega'n yaca ben' rapa beco' ži'ila' nayaquē' rēbiyaquē' laguedyiyaquē':

—Huayoro tzena'ro can' guca yedyi Belén con ca baona Diuzi ra'o.

<sup>16</sup>Cana' uza'yaquē' zioyaquē' taria bdyinyaquē' ga zu María len José len bdao' žubabi' lao yaga žan yu'u ga yu'u yaca bēdyihuaga. <sup>17</sup>Ca blē'ēyaquē' bdao', cana'ra bē'yaquē' di'idza' con can' gudyi ángel leyaquē' cabē' guca uzu bdao'. <sup>18</sup>Ca naca be lao yugulute yaca ben' nita' gan', lega bebanyaquē' can' una yaca ben' rapa beco' ži'ila'. <sup>19</sup>Biži María nezizi lu'u laxta'onē'

ca naca una yaca benè'. Cana' gucanè' pensari ca unajè'. <sup>20</sup>Na' beza' yaca ben' rapa beco' ži'ila' zeyo'yaquè' rueyaquè' Diuzi ben' že ca ta beyaquè' len ca ta blè'èyaquè'. Bzucazi Diuzi di'idza' con ca una ángel gudyinè' leyaquè'.

**Blu'eyaquè' bdao' pxuzi  
lu'u idao' r nabè'ra**

<sup>21</sup>Guca lao xuna dza bzuyaquè' bdao' tu xèdyidao' ca costumbre quieyaquè'. Bizi na' pxubayaquè' lao bdao' JESUS cabè' una ángel ilaobi' tu binehua'a María bdao'. <sup>22</sup>Bizi baoya' dza ta yeyèri nigula según ca rna lè'è guichi yu'u ley quie Moisés. Caora na' uza'yaquè' ziolèyaquè' bdao' ciudad Jerusalén ta ulu'eyaquè' bdao' pxuzi lu'u idao' r nabè'ra. <sup>23</sup>Bèyaquè' cana' bzuyaquè' di'idza' con ca naca ley quie Diuzi yu'u lè'è guichi. Cani rnan lè'è guichi: “Naca yugulu bdao' byu nèro bi' naca la'iya lao Diuzi.” <sup>24</sup>Lena' uyoyaquè' yehua'ayaquè' biu ta uzio pxuzi ren quieba' lao becugo ga zu idao' r nabè'ra. Bzuyaquè' di'idza' cabè' rguixogue'n lè'è guichi la'iya quie Diuzi cani: “Reya'ala' tzhua'ale lao pxuzi tu pare biu lasi, na' chi bizu biu lasi, hua'ale chopa paloma dao'.” Cana' rnèn lè'è guichi.

<sup>25</sup>Lètiempo na' uzu tu ben' lao Simeón zunè' Jerusalén. Naquè' ben' dya'a, rapala'nnè' Diuzi, rbezanè' dza guida ben' ise'ela' Diuzi, ben' ute usela ben' Israel. Yu'ucazi Simeón Bichi Be quie Diuzi. <sup>26</sup>Babzión'e Bichi Be quie Diuzi lèbè' de que tu binegatinè' hualè'ènè' ben' naca Cristo, ben'

ise'ela' Diuzi. <sup>27</sup>Conlè Bichi Be quie Diuzi ziolè Simeón lu'u idao' r nabè'ra. Bizi cati ziolèyaquè' bdao' lu'u idao' r nabè'ra ta uzuyaquè' di'idza' con ca na lè'è guichi ley, <sup>28</sup>lèhora na' uži' Simeón bdao' bnidaguè' bdao' uxubanè'bi' lao žichonè' bèguè' Diuzi ben' že unè':

<sup>29</sup>Xuza' Diuzi, huaca usanlo'nè' gatia' cue' chizi lu'u guicho laxta'ohua', dan' babzulo' di'idza' con ca unao' nè'èdi', naca' ben' rue ca mandado re'lenlo' hua'.

<sup>30</sup>Conlè laohua' bablè'èda' ben' ute usela yaca benèchi'.

<sup>31</sup>Aose'elo'nè' bidè' lao yedyi layu cuenda ilè'è yaca benèchi' lèbè'.

<sup>32</sup>Naquè' ca xni' gui' useni' ta ilè'è ben' rda lao lato lao chula, yaca ben' binaca ben' Israel. Nun quienè' gapala'n yaca ben' nita' lao yedyi layu yaca ben' Israel, yaca ben' naca ben' quio'.

<sup>33</sup>Na' beban José len žna' bdao' cabè' una Simeón quie bdao'.

<sup>34</sup>Na'ra bèla'iya Simeón bdao' gudyinè' María žna' Jesús: —Naca laza xcuidi' quio' usanla'adyi' Diuzi ben' Israel, yaca ben' bichezila'adyi' lèbi'. Lèzi nacarè lazabi' yezi' Diuzi ben' Israel, yaca ben' chezila'adyi' lèbi'. Huaca quiebi' bichezila'adyi' ben' zè lèbi'.

<sup>35</sup>Lècana' ulu'en ca naca pensari yu'u lu'u laxta'o quie quie yaca benè'. Den' para quio' luè', huacan bayèchi'. Huacan ca quie chezi tu espada huen chopa la'a laxta'olo'.

<sup>36</sup>Lègan' na' uzu tu nigula laohuè' Ana. Udixogue'rènè' di'idza' la'iya

quie Diuzi. Banaquë' ben' gula, naquë' ži'i Fanuel, ben' diadza quie Aser. Nenacatë' cuidi' uži' xquiuhuë' lëbë'. Uzulënë' xquiuhuë' lao gadyi iza, ude na' guti xquiuhuë'. <sup>37</sup>Biži tu litza' bega'nnë' napë' tapa galo tapa iza. Pero bipsanla'adyi'në' quie idao' rñabë'ra. Zucazë' te dza len rtze' rulidzë' Diuzi ruenë' ubasi. <sup>38</sup>Cana' bdyin Ana gan' zëyaquë' rëbinë' Diuzi diuxcalelo'. Na'ra uzulaohuë' rguixogue'në' ca naca quie bdao' Jesús para yaca ben' nita' rbeza dza guida ben' ise'ela' Diuzi, ben' ute usela yaca ben' Israel.

#### **Bedyinyaquë' yedyi Nazaret**

<sup>39</sup>Babeyudyi guca lao yugulute cabë' mandado rue ley quie Diuzi, na'ra beza'yaquë' zeyoyaquë' estado Galilea bedyinyaquë' yedyi quieyaquë' Nazaret. <sup>40</sup>Na' biži gu'uni bdao', gucabi' bi' huala, bi' rioñe'e. Bëla'ya Diuzi lëbi'.

#### **Cabë' guca bega'n Jesús lu'u idao' rñabë'ra**

<sup>41</sup>Yugu iza rio José len žna' Jesús ciudad Jerusalén ga ra'ala' lani pascua ta rezala'adyi' yaca ben' Israel dza uza' xuzixta'oyaquë' nación Egipto. <sup>42</sup>Cati uya' Jesús lao chipchopa iza, uyolëbi' xuzi žna'bi' lani ciudad Jerusalén con ca naca biu' benëbi' quieyaquë' rueyaquë' lani pascua. <sup>43</sup>Biži babeyudyi lani, beza' José len žna' Jesús zeyoyaquë' bigucabë'yaquë' chi bega'n Jesús ciudad Jerusalén. <sup>44</sup>Gucayaquë' pensari zeza' Jesús len yaca ben' zeza' uyorë lani. Cana' guca lao tu dza beza'yaquë'. Caora rna'yaquë' ganu Jesús zeza',

udayaquë' rguiloayaquë'bi' lado diadza quieyaquë', len yaca ben' nubë'yaquë', den' ganu Jesús zeza' leyaquë'. <sup>45</sup>Nunu bedzeleyaquë'. Na' beza'yaquë' zeyoyaquë' ciudad Jerusalén tatula ta yeguiloayaquë'bi'.

<sup>46</sup>Biži guca lao tzona dza na', bedzeleyaquë'bi' lu'u idao' rñabë'ra. Re'bi' lado yaca ben' rusëdi di'idza' yu'u lu'u guichi la'ya quie Diuzi. Ržëmagabi' ca rnayaquë' rñababi' leyaquë' tu chopa di'idza'. <sup>47</sup>Ca naca yugulu ben' rzënaga can' nabi', tu bega'nziyaquë' bebanziyaquë' ca naca yela' rioñe'e quiebi', lëzi bebanziyaquë' ca naca di'idza' bedy'i'ibi' gudyibi' leyaquë'. <sup>48</sup>Biži caora blëë xuzi žna'bi' lëbi', tu bega'nziyaquë' bebanyaquë'. Na'ra unë žna'bi' rëbinë' lëbi': —Ži'ina', žbixquien' bao' cana'? Rdëbindo' quio'. Aodalia' xuzo' reguilondo' luë'.

<sup>49</sup>Cana'ra una Jesús rëbinë' leyaquë': —žBixquien' rdale reguilole në'ëdi'? žBinezile ruen zi uzua' di'idza' hua' mandado quie Xuza'?

<sup>50</sup>Biži leyaquë' biuyõe'eyaquë' can' una Jesús.

<sup>51</sup>Cana' beza'yaquë' zeyoyaquë' yedyi Nazaret, pero ralecazi Jesús quie xuzi žna'bi'. Na' žna'bi' nudze'në' lu'u guicho laxta'onë' cabë' bë Jesús. <sup>52</sup>Ca naca Jesús na' gu'unibi' uya'abi' pensari. Blëë Diuzi lëbi' nacabi' bi' huen. Lëzi blë'ërë yaca benë' nacabi' bi' huen.

#### **Udixogue' Juan bautista xti'idza'**

##### **Diuzi lao lato ga bidyia yu'u**

(Mt. 3.1-12; Mr. 1.1-8; Jn. 1.19-28)

**3** Biži guca lao chi'inu' iza uzu tu ben' lao Tiberio, naquë'

gobierno r nabè'ra. Caora na' uzurè itu ben' lao Poncio Pilato, naquè' gobierno quie estado Judea. Lèzi uzurè itu ben' lao Herodes, naquè' gobierno quie estado Galilea. Lèzi uzurè tu bichi Herodes, ben' lao Felipe, naquè' gobierno quie yu nebaba Iturea len yu nebaba Traconite. Lèzi uzurè itu ben' lao Lisantias, naquè' gobierno quie yu nebaba Abilinia. <sup>2</sup>Lëscan' lëiza na', naca Anás len Caifás yaca pxuzi r nabè'ra. Biži Diuzi bè'nè' tu di'idza' Juan, ži'i Zacarías. Na' zu Juan lao lato ga bidyia yu'u. <sup>3</sup>Cana' uyo Juan lao duže ru'a yao Jordán unè' rëbinè' benè': "Reya'ala' yetza'le pensari quiele cuenda yezi'že Diuzi dula' xquia quiele, cana'ra hua' laole." <sup>4</sup>Gucan can' ca bzu Isaías di'idza' lè'è guichi la'iya quie Diuzi dza na'. Naquè' ben' udixogue' xti'idza' Diuzi unè':

Huazu ben' na' lao lato dachi ga bidyia yu'u, huanè' zidzo rëbinè' laguedyinè' caniga: "Huele hueluba neza quiele cuenda huida ben' naca xa'nro, usalole tu neza li.

<sup>5</sup>Yesedza'le ga naca pozo, yeyuele ba'a ga naca loma, yebiolile ga naca neza yuco, yupa'ale ga naca neza stëbi.

<sup>6</sup>Cana' il'è'è lao yugulute benèchi' ca hue Diuzi ta ute uselanè' leyaquè'."

<sup>7</sup>Na'ra cati bdyin yaca benè' ga zè Juan ta hue'nè' laoyaquè', lëscan' bdyinrè yaca ben' r nabè' quieyaquè'. Cana' una Juan rëbinè' leyaquè': —iCa naca bèla bia mala, cana' nacarèle! ¿Ca nuži udixogue' le'e ta ilale ca naca tu castigo huala

gula baza' bago il'è'èle? <sup>8</sup>Ulehue quiele tadya'a cuenda ulu'en talicazi aptza'le pensari quiele. Bira inale: "Bihue Diuzi ra'o castigo nun quie nacaro ži'i suba Abraham." Porque rnia' le'e, hasta len yo niga huazaque' hue Diuzi yaca ben' naca ži'isuba Abraham. <sup>9</sup>Ca naca quie yaga birbia tažixi, cana' naca quiele. Bade yebandyo puesto ta ichugon yaca yaga birbia tažixi tzu'un tzeina lagui'.

<sup>10</sup>Na'ra unaba yaca benè' nayaquè':

—¿Cabizi re'enlo' huendo'?

<sup>11</sup>Na'ra una Juan rëbinè' leyaquè': —Chi de chopa cue' žabale, ulesi' tu cue'n ulehue'n ben' bide žabe. Lëscan' nu yela' huao quiele, ulehue'n ben' bide ta gao.

<sup>12</sup>Biži bdyinrè yaca ben' huequižu ta hue' Juan laoyaquè'. Biži unayaquè' rëbiyaquè' Juan:

—Maestro, ¿cabizi ca huendo'?

<sup>13</sup>Na'ra una Juan rëbinè' leyaquè': —Ca tu ruezzi mandado lao ley uquižule yaca benè', bira uquižuleyaquè' de mazara.

<sup>14</sup>Lèzi unabarè bala yaca ben' naca soldado unayaquè':

—Biži nètò', ¿cabizi ca huendo'?

Na'ra una Juan rëbinè' leyaquè': —Bicubale bicuanle quie benè'. Ni ta utzebile gaole leyaquè' xquia, chi bibi rueyaquè'. Lëscan' ulechezila'adyi' ca tu ta ražule.

<sup>15</sup>Na' biži yaca benè' raqueyaquè' Juan naquè' ben' Cristo.

<sup>16</sup>Na'ra una Juan rëbinè' lao yuguluteyaquè':

—Tali n'è'di' ru'a laole con nisa, pero zaza'ra ben' udze' Bichi Be quie Diuzi lu'u guicho laxta'o ben'



rue quie xti'idza' Diuzi. Pero ben' birue quie xti'idza' Diuzi, udze'në' lëjë' lao gui' gabila. Dera yela' rnabë' quië' ca në'ëdi'. Tanto naquë' ben' belao, ni lë'ëti' bibi zaca' ni siquiera biyeyažoga' cuioga' guidi yu'u ni'anë'. <sup>17</sup>Bazënë' beladzo' ta ulubë' trigo. Te na' yetupë' trigo yezi'tza'onë'n. Lëzi utuparë' guixi' uzalanë'n lagui' ga tzeina lao gui' bireyula. —Cana' una Juan gudyinë' leyaquë'.

<sup>18</sup>Lëscan' gudyinë' leyaquë' di'idza' zëra unë' udixogue'në' yaca benë' di'idza' la'iya quie Diuzi. <sup>19</sup>Lëzi udilarë' Herodes, ben' naca gobierno, dan' bezulënë' Herodías žgula bichinë' Felipe. Lëzi udilarënë' lëbë' dan' bëranë' tamala. <sup>20</sup>Na' biži Herodes, lao laza uzënaguë' quie Juan, bërëlë' mazara tamala, bdze'guë' Juan lu'u dyiguiba.

### Ca guca bë' Juan lao Jesús

(Mt. 3.13-17; Mr. 1.9-11)

<sup>21</sup>Ca zatzio Juan lu'u dyiguiba, cati nezënë' ru'enë' lao benë', lëzi bë'në' lao Jesús. Ca zë Jesús rldzë' Diuzi, cana' uyalo guibá. <sup>22</sup>Biži caora na' ga zë Jesús, uyëzi Bichi Be quie Diuzi ca rëzi biu. Na'ra unë Diuzi ga zuë' guibá unë':

—Ži'ina' luë'. Nedyë'ëda' luë'. Lega redaohueda' ca ruelo'.

### Ga rguixogue'n quie xuzixta'o

#### Jesucristo

(Mt. 1.1-17)

<sup>23</sup>Jesús bazunë' ca du galobechi iza cati uzulaonë' udixogue'në' di'idza' la'iya quie Diuzi. Según ca una yaca benë' naquë' ži'i José,

dechan' naquë' ži'i suba Elí, ben' naca xuzi María. <sup>24</sup>Na' naca Elí ži'i Matat, na' naca Matat ži'i Leví, na' naca Leví ži'i Melqui, na' naca Melqui ži'i Jana, na' naca Jana ži'i José, <sup>25</sup>na' naca José ži'i Matatías, na' naca Matatías ži'i Amós, na' naca Amós ži'i Nahum, na' naca Nahum ži'i Esli, na' naca Esli ži'i Nagai, <sup>26</sup>na' naca Nagai ži'i Maat, na' naca Maat ži'i Matatías, na' naca Matatías ži'i Semei, na' naca Semei ži'i José, na' naca José ži'i Judá, <sup>27</sup>na' naca Judá ži'i Joana, na' naca Joana ži'i Resa, na' naca Resa ži'i Zorobabel, na' naca Zorobabel ži'i Salatiel, na' naca Salatiel ži'i Neri, <sup>28</sup>na' naca Neri ži'i Melqui, na' naca Melqui ži'i Adi, na' naca Adi ži'i Cosam, na' naca Cosam ži'i Elmodam, na' naca Elmodam ži'i Er, <sup>29</sup>na' naca Er ži'i Josué, na' naca Josué ži'i Eliezer, na' naca Eliezer ži'i Jorim, na' naca Jorim ži'i Matat, <sup>30</sup>na' naca Matat ži'i Leví, na' naca Leví ži'i Simeón, na' naca Simeón ži'i Judá, na' naca Judá ži'i José, na' naca José ži'i Jonán, na' naca Jonán ži'i Eliaquim, <sup>31</sup>na' naca Eliaquim ži'i Melea, na' naca Melea ži'i Mainán, na' naca Mainán ži'i Matata, na' naca Matata ži'i Natán, <sup>32</sup>na' naca Natán ži'i rey David, na' naca rey David ži'i Isái, na' naca Isái ži'i Obed, na' naca Obed ži'i Booz, na' naca Booz ži'i Salmón, na' naca Salmón ži'i Naasón, <sup>33</sup>na' naca Naasón ži'i Aminadab, na' naca Aminadab ži'i Aram, na' naca Aram ži'i Esrom, na' naca Esrom ži'i Fares, na' naca Fares ži'i Judá, <sup>34</sup>na' naca Judá ži'i Jacob, na' naca Jacob ži'i Isaac, na' naca Isaac ži'i

Abraham, na' naca Abraham ži'i Taré, na' naca Taré ži'i Nacor, <sup>35</sup>na' naca Nacor ži'i Serug, na' naca Serug ži'i Ragau, na' naca Ragau ži'i Peleg, na' naca Peleg ži'i Heber, na' naca Heber ži'i Sala, <sup>36</sup>na' naca Sala ži'i Cainán, na' naca Cainán ži'i Arfaxad, na' naca Arfaxad ži'i Sem, na' naca Sem ži'i Noé, na' naca Noé ži'i Lamec, <sup>37</sup>na' naca Lamec ži'i Matusalén, na' naca Matusalén ži'i Enoc, na' naca Enoc ži'i Jared, na' naca Jared ži'i Mahalaleel, na' naca Mahalaleel ži'i Cainán, <sup>38</sup>na' naca Cainán ži'i Enós, na' naca Enós ži'i Set, na' naca Set ži'i Adán, na' naca Adán ži'i Diuzi.

**Gu'un xan' taxi'ibi' iquixi Jesús huené' tamala**

(Mt. 4.1-11; Mr. 1.12-13)

**4** Du yu'u Jesús Bichi Be quie Diuzi zeyoguè' ru'a yao Jordán tatula. Pquiè' Bichi Be quie Diuzi lèbè' lao lato ga bidyia yu'u. <sup>2</sup>Bízi guca uzuguè' lao lato lao chopa galo dza. Na' uyo xan' taxi'ibi' gan' zènè' re'ennan ta iquixi Jesús huené' tamala. Ca tu lao dza uzunè' na', biudaonè' lega uduenè'. <sup>3</sup>Na'ra una xan' taxi'ibi' rëbin lèbè':

—Chi dula'adyo' naco' ži'i Diuzi, bē yo niga iyacan yēta xtila.

<sup>4</sup>Na'ra rëbi Jesús len:

—Lè'è guichi la'iya quie Diuzi rnan caniga: “Cala yela' huaozi uteban yaca benè', lëscan' ca naca di'idza' rnè Diuzi, utebannan leyaquè'.”

<sup>5</sup>Bízi na'a, xan' taxi'ibi' uquiè'n lèbè' lao ya'a sibi, na' blu'en lèbè' lao duže yedyi layu. <sup>6</sup>Bízi una xan' taxi'ibi' rëbin lèbè':

—Guna' luè' lao yugulu yela' rnabè' quie yedyi layu niga nun quie nacan ladyina'a. Na' hua'a len nu ben' raxeda' hua'a len. <sup>7</sup>Chi quitzo žibo' laohua' tzionla'adyo' nè'èdi', na' guna' lao yuguluten luè'.

<sup>8</sup>Na'ra una Jesús rëbinè'n:

—Bebiga' tzala'la, Satanás, porque lè'è guichi ga yu'u di'idza' la'iya quie Diuzi rnan caniga: “Tuzi Diuzi tzionla'adyi'ro uzuro di'idza' ca mandado ruenè'.”

<sup>9</sup>Ude na' uquiè' xan' taxi'ibi' lèbè' ciudad Jerusalén, urëlèna lèbè' guicho lun idao' rnabè'ra. Na' unan rëbin lèbè':

—Chi dula'adyo' naco' ži'i Diuzi, uxiti gan' niga para layu. <sup>10</sup>Bigaco' zi' iguinolo' layu como cana' rnan lè'è guichi la'iya quie Diuzi nan: Ise'ela' Diuzi ángel quienè' ta ina'yaquè' luè' ta bibi gaca quio'.

<sup>11</sup>Hueyuxuyaquè' luè' ta bibi gaca quio', ni yo bihuenan zi' ni'alo'.

<sup>12</sup>Na'ra una Jesús rëbinè'n:

—Lèzi rnarèn lè'è guichi la'iya rnan: “Bihuenèle Diuzi bizinaquezi chi uzunè', chi biuzunè' di'idza' cabè' unè'.”

<sup>13</sup>Bízi bira ubin xan' taxi'ibi' bihuena ta iquixi Jesús huené' tamala, cana' guca bebiga'n zeyon bibènan Jesús zèdi tu chi'.

**Uzulao Jesús psëdinè' yaca benè' estado Galilea**

(Mt. 4.12-17; Mr. 1.14-15)

<sup>14</sup>Bízi Jesús, du yu'unè' Bichi Be quie Diuzi, zeyoguè' bedyinnè' estado Galilea. Cana' guca gudyi yaca ben' laguedyiaquè' quie quie

yedyi re' ga'ala' cabè' rue Jesús.  
 15Psëdinè' leyaquè' lu'u idao' con  
 ga yedyi uyoguè'. Yuguluyaquè'  
 udapala'njè' lèbè'.

**Beyo Jesús yedyi Nazaret**

(Mt. 13.53-58; Mr. 6.1-6)

16Na'ra beyo Jesús yedyi Nazaret  
 ga bgulanè'. Biži dza saodo, dza  
 huezila'adyi' quieyaquè', uyu'unè'  
 lu'u idao' sinagoga ca rionè' yugu  
 dza huezila'adyi'. Na' uzulinè' rlabè'  
 lè'è guichi ga yu'u di'idza' la'ya  
 quie Diuzi. 17Na' bè'yaquè' lèbè'  
 guichi la'ya ta bzu profeta Isaías.  
 Caora blinè'n, na' yetilè' ga rnan  
 cani:

18 Yu'ucazi Bichi Be quie Diuzi  
 në'èdi' nun quie dan' ulionè'  
 në'èdi' ta quixogui'a di'idza'  
 la'ya quienè' yaca ben' yèchi'.  
 Lèzi use'ela'rè' në'èdi' ta  
 yeyuežia' yaca ben' raca  
 bayèchi' quie,  
 lèzi ta hua' libre ca ben' nao  
 xquia quieyaquè' leyaquè',  
 lèzi ta yelè'è yaca ben' nechula  
 laohue, lèzi ta ute usela' yaca  
 ben' baožaca zi',

19 lèzi ta quixogui'a yaca benè'  
 babdyin dza hue Diuzi tu cule  
 že quieyaquè'.

20Ude na' betubinè' guichi yu'u  
 di'idza' la'ya quie Diuzi, beyu'enè'n  
 ben' naca cuenda lu'u idao'  
 sinagoga, na' bebe'nè'. Biži yugulu  
 yaca ben' yu'u lu'u idao' sinagoga,  
 bega'nziyaquè' rebanyaquè'  
 rna'yaquè' lèbè'. 21Cana' unè'  
 gudyinè' leyaquè':

—Ca naca na'a, babzun di'idza'  
 lè'è guichi bablaba' bele. —Cana'  
 unè'.

22Na'ra yugulu benè' unèyaquè'  
 dya'a quienè', tu bega'nyaquè'  
 bebanziyaquè' ca naca di'idza' dya'a  
 gula unè Jesús. Na' biži unayaquè'  
 rëbiyaquè' laguedyiaquè':

—¿Cala bi' niga ži'li José?

23Na'ra una Jesús rëbinè'  
 leyaquè':

—Tali huanale në'èdi' cani: “Chi  
 tali naco' ben' rue milagro, bē itun  
 ni ilè'èndo'.” Lëscan' inale në'èdi':  
 “Ca ta babendo' bao' milagro yedyi  
 Capernaum, cana' bërè itun niga  
 yedyi quio' ilè'èndo'.”

24Biži nernè Jesús rëbinè'  
 leyaquè':

—Tali ca rnia' le'e, con gatezi de  
 yedyi rda ben' rguixogue' xti'idza'  
 Diuzi, hualè'è yaca benè' lèbè'  
 dya'a. Na' biži ben' lao yedyi  
 quienè' biilè'èyaquè' lèbè' dya'a.

25Tali ca rnia' le'e, unita' zè nigula  
 guti xquiuhue yedyi quie yaca ben'  
 Israel dza na' caora uzu profeta  
 Elías. Lèdza na' biben nisayo lao  
 tzona iza yugatzto. Lega ubin huala  
 gula guta' lao yedyi quiejè'. 26Pero  
 biuse'ela' Diuzi Elías con garla nita'  
 nigula guti xquiuhue. Tuzi yedyi  
 Sarepta, na' uzu tu nigula guti  
 xquiuhue, lëgan' na' use'ela' Diuzi  
 Elías ga rega'nnan ga'ala' para  
 yedyi Sidón. 27Lëzirè unita' zè ben'  
 yu'u yela' hue' ca mal de pindo  
 yedyi Israel caora uzurè ben' naca  
 profeta Eliseo dza na'. Na'ra lèdza  
 na' nurla nuyaca ben' yu'u yela'  
 hue' ca mal de pindo beyaca. Tuzi  
 Naamán, ben' za' yu nebaba Siria,  
 lëben' na' beyaca.

28Ca naca yaca ben' yu'u lu'u  
 idao' sinagoga, bdza'tzegueyaquè'  
 babeyaquè' can' una Jesús. 29Na'ra

uzuliyaquè' bëxoyaquè' lèbè' lao yedyi uquiè'yaquè' lèbè' lao ya'a zu cuèta yedyi ta utulayaquè' lèbè' žanle. <sup>30</sup>Pero tu brozi Jesús ladoyaquè' zioquè' ga tula.

**Beyue Jesús ben' yu'u bichi be xi'ibi'**  
(Mr. 1.21-28)

<sup>31</sup>Biži na' bdyin Jesús yedyi Capernaum ga nebaba Galilea. Lègan' na' uyunè' idao' sinagoga ta psèdinè' yaca benè' dza huezila'adyi'. <sup>32</sup>Biži yaca benè' tu bebanziyaquè' ca di'idza' rnè' rusèdinè' leyaquè' como dan' cabè' rna ben' r nabè', cana' unè'.

<sup>33</sup>Biži lu'u idao' sinagoga zè tu ben' yu'u bichi be xi'ibi'. Lèben' na' urediyi'a'nè' unè':

<sup>34</sup>—Psan nètò'. ¿Bixquien' zao' ta huelo' nètò' zèdi? Jesús ben' yedyi Nazaret luè'. ¿Cala zao' udyiagui'lo' nètò'? Nubè'da' luè' naco' ben' la'iya, ben' use'ela' Diuzi.

<sup>35</sup>Na'ra udila Jesús bichi be xi'ibi' rëbinè'n:

—iChizi, bero ben' na' gan' yu'ulo'!

Caora na' bero bichi be xi'ibi' be'mbyu gan' yu'una, bgu'unnè' layu, denè' zaquè'lao yaca ben' nita' rna'. Na' beron zeyon, ni lè'èti' bibi zi' guquè'.

<sup>36</sup>Na' bega'n yuguluyaquè' bdzebiyaquè' nayaquè' rëbiyaquè' laguediyi'yaquè':

—¿Cabizi una ben' niga? De yela' r nabè' quienè' r nabè'nè' yaca taxi'ibi' reron ga yu'uyacan benè'.

<sup>37</sup>Na' cana' guca unezi yaca benè' nita' lao duže yedyi rega'n ga'ala' cabè' bè Jesús.

**Beyue Jesús ben' gula quie Simón Pedro**

(Mt. 8.14-15; Mr. 1.29-31)

<sup>38</sup>Biži babero Jesús lu'u idao' sinagoga zioquè' žan yu'u quie Simón. Biži ben' gula quie Simón yu'unè' žla huala. Na'ra unabayèchi'yaquè' lao Jesús ta tzanè'è lèbè'. <sup>39</sup>Na'ra ude Jesús zionè' gan' de ben' yu'u tala huala. Caora udila Jesús xan' žla, cana' beron, laoyasatenè' bè' laze ta udaoyaquè'.

**Beyue Jesús ben' zè, ben' raca žhue'**  
(Mt. 8.16-17; Mr. 1.32-34)

<sup>40</sup>Baza' rdze' yehua'a yaca benè' ben' yu'u nacala yela' hue' gan' zè Jesús. Na'ra caora bda' nè'è quie quieyaquè', cana' beyacayaquè'.

<sup>41</sup>Ca naca yaca ben' raca žhue', lèzirè bero bichi be xi'ibi' rbediyi'ayacan nayacan rëbiyacan Jesús:

—Luè' naco' ži'i Diuzi.

Biži udila Jesús leyacan bibè'nè' lato inëyacan dan' neziyacan lèbè' naquè' Cristo, ben' use'ela' Diuzi.

**Uda Jesús rguixogué'nè' xti'idza' Diuzi estado Galilea**

(Mr. 1.35-39)

<sup>42</sup>Baoyani' dza tula, bro Jesús zioquè' ru'a yedyila ta sunè' tuzè'. Biži yaca benè' reguiloyaquè' lèbè' na' bedzeleyaquè' gan' zènè'. Re'enyaquè' yega'n Jesús sunè' lènè' leyaquè' gan'. <sup>43</sup>Na'ra una Jesús rëbinè' leyaquè':

—De tza'a yedyi tula ta tzetixogui'a yaca benè' ca r nabè' Diuzi reya'ala' hue quieyaquè'

xti'idzè'. Quie lena' use'ela' Diuzi në'èdi'.

<sup>44</sup>Cana' uyo Jesús udixogue'nè' xti'idza' Diuzi lu'u idao' sinagoga quie yaca yedyi estado Galilea.

**Ca tu milagro bë Jesús con yaca ben' rze bela**

(Mt. 4.18-22; Mr. 1.16-20)

**5** Biži bdyin dza uzèguè' ru'a nisa lagun Genesaret. Lega bdyin yaca ben' zè gula hasta rquidi'yaquè' lèbè' dan' re'enyacuè' uzènagayaquè' xti'idza' Diuzi.

<sup>2</sup>Na'ra blè'è Jesús chopa barco dachi zèn bago ru'a nisa. Bero yaca ben' rze bela lu'un, re'yaquè' ru'a lagun rguibiyacuè' duyèxo ta rzeyaquè' bela. <sup>3</sup>Na' uyu'u Jesús tu lu'u barco. Biži barco na' nacan quie Simón. Na' gudyinè' Pedro ta udyiganè'n ta bicue'n ga'ala' ru'a nisa. Na' ure'nè' laona uzulahuè' rusèdinè' yaca benè'. <sup>4</sup>Babeyudyi psèdinè' yaca benè', na' unè' rëbinè' Simón:

—Ya'lè barco ni ga naca zitu' lao lagun niga. Na' uledze' yèxo quiele lu'u nisa tacuenda tzu'un bela.

<sup>5</sup>Na' una Simón rëbinè' lèbè':

—Maestro, bedu yela uyu'undo' ta sendo' bela, pero ni tuba' bibdula' quiendo'. Den' chi luè' nao', udzi'a yèxo lu'u nisa.

<sup>6</sup>Biži babdze'yaquè' yèxo lu'u nisa uyu'una bela zè gula. Tanto bedza'n uyu'un bela na', urugu du lè'è yèxo.

<sup>7</sup>Cana' bëlèyaquè' na'ayaquè' seña ta guida ben' yu'u lu'u barco tula ta gacalèyaquè' leyaquè'. Na'ra zioyaquè' psedza'yaquè' bela lao rupate barco. Tanto yela' zi'i quieyacan, bare'en yetuyacan lu'u

nisa. <sup>8</sup>Biži bë' blè'è Simón Pedro can' guca, na' uditzu žibinè' ure'nè' lao Jesús unè' rëbinè' lèbè':

—Bibi zaca' conlè luè', porque naca' ben' napa dula' xquia.

<sup>9</sup>Una Simón can', dan' bdzebinè' lente yaca ben' zèlènè'. Blè'èyaquè' can' guca užeyaquè' bela zè gula.

<sup>10</sup>Lèzi Santiago len bichibi' Juan, ži'i Zebedeo, nacayaquè' tuzi len Simón, bdzebitzegueyaquè'. Na'ra una Jesús rëbinè' Simón:

—Bidzebo', desde na'a cabè' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

<sup>11</sup>Biži babedyinyaquè' len barco quieyaquè' ru'a nisa, na' pca'nyaquè'n uži'yaquè' uza'yaquè' ziolèyaquè' Jesús.

**Beyue Jesús ben' yu'u yela' hue' ca mal de pindo**

(Mt. 8.1-4; Mr. 1.40-45)

<sup>12</sup>Biži bazu Jesús lao yedyi, bdyin tu ben' yu'u yela' hue' ca mal de pindo. Biži bë' blè'ènè' Jesús, uditzu žibinè' ure'nè' bda'te laohuè' layu unabayèchi'nè' rëbinè' Jesús:

—Señor, chi re'enlo' huaca yeyuelo' në'èdi'.

<sup>13</sup>Na'ra bda' na'a Jesús ben' na' rëbinè' lèbè':

—Re'enda' yeyua' luè'.

Ca unè' cana', biži labežite yela' hue' naca ca mal de pindo yu'u ben' na'. <sup>14</sup>Na'ra bë Jesús mandado rëbinè' lèbè':

—Ni tu nunu yèbo' can' babia' quio'. Tuzi ta rnìa' luè', uyo yalu'e cuinlo' lao pxuzi. Na' bë' pxuzi tu ta reya'ala' hue'lo'nè' ca ta rnabè' lè'è guichi ley quie Moisés tanun

quie babeyëri!'. Huelo' can' ta inezi yaca benë' babeži yela' hue' uyu'ulo'.

<sup>15</sup>Pero mazera unezi yaca benë' cabë' rue Jesús. Bdyin ben' zë gula gan' zënë' ta rzënegayaquë' ca rnë', lëzirë ta yeyuerënë' nacala yela' hue' yu'u'yaquë'. <sup>16</sup>Biži zio Jesús lao lato ga binita' yaca benë'. Lëgan' na' rulidzë' ru'elënë' Diuzi di'idza'.

### Beyue Jesús tu ben' ži

(Mt. 9.1-8; Mr. 2.1-12)

<sup>17</sup>Biži bdyin tu dza rusëdi Jesús yaca benë'. Lëgan' na' re' yaca ben' naca partido fariseo len yaca ben' rsëdi ley quie Moisés. Uza'yaquë' yedyi quie estado Galilea len yedyi quie estado Judea, len ciudad Jerusalén. Biži na'a, conlë yela' huaca quienë', gucalë Diuzi Jesús, beyuenë' yaca ben' raca žhue'.

<sup>18</sup>Lëscana' bdyin yaca ben' nu'a ben' ži lao belaga. Re'enyacuë' udze'yaquë' lëbë' lu'u yu'ute ta quixoyaquë' lëbë' lao Jesús. <sup>19</sup>Biži biužaque'yaquë' tzu'ulëyaquë' ben' ži lu'u yu'u dan' nita' ben' zë gula. Na' urëyaquë' lun yu'u udubayaquë' teja, bzuyaquë' tu yero cuenda pchizayaquë' belaga ga žuba ben' ži, psedyinyaquë' lëbë' gatzo lao' ga nita' benë' zaquë'lao lao Jesús.

<sup>20</sup>Caora blë'ë Jesús ruëyaquë' pensari huaca Jesús yeyuenë' ben' ži, na'ra unë' rëbinë' lëbë':

—Rnia' luë', aoži'žia' dula' xquia quio'!

<sup>21</sup>Biži yaca ben' rsëdi ley quie Moisés, len yaca ben' naca partido fariseo, gucayaquë' pensari unayaquë': “¿Nuži ben' niga rnaya'në' Diuzi rnë' can'? Ni tu

benë' bisaque' yezi'žeyaquë' dula' xquia quie laguedyiaquë'. Tuzi Diuzi naquë' ben' yezi'že quiero.”

<sup>22</sup>Na'ra banezi Jesús cabë' naca pensari racayaquë'. Na' una Jesús rëbinë' leyaquë':

—¿Bixquien' racale pensari cana'?

<sup>23</sup>¿Ca nurlan nacaran yalo hua' quie ben' ži niga? ¿Nacaran yalo chi yëpa'në': “Aoži'žia' dula' xquia quio'”, o chi nacaran yalo yëpa'në': “Uyasa, bezi' belaga quio', beza', beyo”? <sup>24</sup>Pues cani hua' ta ulu'ena' le'e de yela' r nabë' quia', naca' bichi yugulu benë', ta yezi'žia' dula' xquia quie yaca ben' nita' lao yedyi layu.

Na'ra unë' rëbinë' ben' ži:

—Rnia' luë', beyasa, bezi' belaga quio', beyo žan yu'u quio'.

<sup>25</sup>Cana' labeyasate ben' ži zaca'lao yaca ben' nita' rna', bezi'në' yada quië' ga užubanë'. Na' bezë'ë zeyoguë' žan yu'u quië' ruenë' Diuzi ben' že. <sup>26</sup>Biži lao yugulute yaca ben' nita' rna', bëyaquë' Diuzi ben' že. Tu bebanziyaquë' can' guca quie ben' ži. Du rdzebiyaquë' unayaquë' rëbiyaquë' laguedyiaquë':

—Tu ta binelë'ëro babë ben' niga.

### Ulio Jesús Leví

(Mt. 9.9-13; Mr. 2.13-17)

<sup>27</sup>Ude beyudyi bë Jesús can', uzë'ë zioquë' blë'ënë' tu ben' huequižu laonë' Leví. Lëben' na' re'në' ga rquižuguë' benë'. Na' unë' rëbinë' lëbë':

—Uda, unao në'ëdi'.

<sup>28</sup>Biži uzuli Leví pca'nnë' ta de quienë' zioquë' naohuë' Jesús.

<sup>29</sup>Ude na', bë Leví tu lani že žan yu'u quienë' ruenë' Jesús ben' že.

Lëzi bdyinrè mazara ben' huequižu, len yaca ben' tula ure'yaquè' lao mesa. <sup>30</sup>Biži yaca ben' naca partido fariseo, len yaca ben' rsèdi ley quie Moisés udilayaquè' ben' quie Jesús unayaquè' rëbiyaquè' leyaquè':

—¿Bixquien' raole ri'olèle tzaže len yaca ben' huequižu, len yaca ben' de dula' xquia quie?

<sup>31</sup>Na'ra una Jesús rëbinè' leyaquè':

—Ben' zu dya'a, ben' biraca žhue', biruen zi guida ben' yeyue lëbè'. Pero ben' raca žhue', ruen zi guida ben' yeyue lëbè'. <sup>32</sup>Cala bida' rbioga' yaca ben' raca pensari bibi dula' xquia quie de, dechan' bida' rbioga' yaca ben' nezi de dula' xquia quie tacuenda yetza'yaquè' pensari quieyaquè'.

### Unabayaquè' Jesús quie ubasi

(Mt. 9.14-17; Mr. 2.18-22)

<sup>33</sup>Na'ra unabayaquè' rëbiyaquè' Jesús:

—Ablë'ëndo' yaca ben' quie Juan len yaca ben' naca partido fariseo, rueyaquè' ubasi rlidzayaquè' Diuzi yugu dza, na' yaca ben' quio', ¿bixquien' ri'o raoziyaquè', biruejè' ubasi?

<sup>34</sup>Na'ra una Jesús rëbinè' leyaquè':

—¿Re'enle hue yaca ben' naca amigo, yaca ben' babdyin gan' raca huetzagana' ubasi tu nezu ben' utzagana' len yaca amigo quienè'?

<sup>35</sup>Biži rnia' le'e, huadyin dza cati bira zulè ben' utzagana' len yaca amigo quienè'. Lëscana'ra hue yaca amigo quienè' ubasi.

<sup>36</sup>Lëzi unè Jesús itu ejemplo cani:

—Bireya'ala' yeda' la'ari' cubi lë'ë la'ari' gula cati binetzëri la'ari' cubi.

Huaza'laoran ichezan la'ari' gula, udyiagu'i'ran len, biyega'nnan lëbizi. <sup>37</sup>Lëscan' bireya'ala' ca'ro nupi žixi tu lu'u guidi bolsa gula, porque chi ca'ro nupi žixi lu'u guidi bolsa gula, huachezan len huabiagu'i' lao rupa cue'n. <sup>38</sup>Lena' re'ennan tzudzu nupi žixi lu'u bolsa guidi cubi ta sibe'n zi dza, birezan. Lëcana' bicuiagu'i' lao rupaten. <sup>39</sup>Lëscan' quie nu ben' ri'o puro nupi huala bire'enaquè' yo'oyaquè' nupi žixi. Huanayaquè': “Nupi huala nacaran huen ta yo'oro.”

### Uditzu ben' quie Jesús lao trigo dza huezila'adyi'

(Mt. 12.1-8; Mr. 2.23-28)

**6** Biži guca tu dza huezila'adyi', uza' Jesús lënè' yaca ben' quienè' zioyaquè' udeyaquè' layela ga neduza trigo. Na' uditzu yaca ben' quienè' laon ta rchibiyaquè'n ta gaoyaquè'n. <sup>2</sup>Na'ra una yaca ben' naca partido fariseo rëbiyaquè' Jesús:

—¿Bixquien' ruele dyin uditzule lao bini trigo na'a dza huezila'adyi', dza bireya'ala' huero dyin?

<sup>3</sup>Na'ra una Jesús rëbinè' leyaquè':

—¿Binelabale lë'ë guichi la'iya quie Diuzi cabè' bë rey David dza uduenè' lënè' yaca benè' quienè'?

<sup>4</sup>Uyu'unè' lu'u idao' r nabè'ra, uži'nè' yëta xtila naca la'iya ta ru'e pxuzi Diuzi. Na' udao rey David len, lëscan' bë'nè'n yaca ben' dzaganè'. Caora na' udaoyaquè' ta bireya'ala' gaoyaquè'. Udaoyaquè' ta reya'ala' gao pxuzizi.

<sup>5</sup>Na' unè Jesús rëbinè' leyaquè':

—Në'ëdi', bichi yugulu benè', de yela' r nabè' quia' ta hua' mandado bi hue yaca benè' dza huezila'adyi'.

**Beyue Jesús tu ben' neseco në'ë***(Mt. 12.9-14; Mr. 3.1-6)*

<sup>6</sup>Biži bezu itu dza, dza huezila'adyi', uyu'u Jesús lu'u idao' sinagoga bezulaohuë' rusëdiguë' benë'. Biži na'a zë tu ben' neseco në'ë yebë. <sup>7</sup>Lëzi zërë ben' rsëdi ley quie Moisés, len yaca ben' naca partido fariseo, rbe'naoyaquë' chi hueyue Jesús ben' neseco në'ë dza huezila'adyi' tacuenda ga gaoyaquë' lëbë' xquia. <sup>8</sup>Pero banezi Jesús ca naca pensari quieyaquë'. Na'ra unë' blidzë' ben' na'a bidyi:

—Rnia! luë', uzuli uda, desë gatzo lao' ni.

Na'ra ude ben' neseco në'ë, yasënë' gatzo lao'. <sup>9</sup>Na'ra una Jesús rëbinë' leyaquë':

—Re'enda' inabacara' le'e tu di'idza' ¿ca bidan' reya'ala' huero dza huezila'adyi'? ¿Ru'en lato huero tahuen o huero tamala? ¿Ru'en lato ute uselaro benë' o chi gutiro benë'?

<sup>10</sup>Biži Jesús una'në' yaca ben' nita' gan' zënë'. Ude na' unë' rëbinë' ben' neseco në'ë:

—Bli na'alo'.

Caora bli na'a ben' neseco në'ë, beyacaten dya'a. <sup>11</sup>Biži yaca ben' nita' na', lega bdza'tzegueyaquë' unayaquë' rëbiyaquë' laguedyiaquë':

—¿Ca biži huero quie ben' niga ta bira huenë' ca ruenë'?

**Ulio Jesús lao chipchopa ben' gaca ben' quienë'***(Mt. 10.1-4; Mr. 3.13-19)*

<sup>12</sup>Biži bezu dza tula uza' Jesús uyuquë' ga zu tu ya'a ta hue'lënë'

Diuzi di'idza'. Lao bedu yela bë'lënë' Diuzi di'idza'. <sup>13</sup>Biži baoyeni' dza tula, gužinë' yaca ben' quië', ulioguë' lao chipchopa yaca ben' gaca ben' quië', ben' gaca apóstol. <sup>14</sup>Lëyaca ben' rguixogue'n laohue niga: Ulioguë' Simón, na' uxuba Jesús laohuë' Pedro. Lëscan' ulioguë' Andrés, bi' bichi Simón, len Santiago, len Juan, len Felipe, len Bartolomé, <sup>15</sup>len Mateo, len Tomás, len Santiago ži'i Alfeo, len Simón, ben' naca tu cue' partido cananista, <sup>16</sup>len Judas, bi' bichi Santiago, len Judas Iscariote, ben' usedyin Jesús lao na'a yaca ben' r nabë'.

**Psëdi Jesús yaca ben' zë***(Mt. 4.23-25)*

<sup>17</sup>Na' beyëzi Jesús lao ya'a len yaca ben' quienë'. Yazëyaquë' ga naca yu lachi'. Lëgan' na' nita' ben' zë. Lëgan' na' zërë ben' uza' estado Judea, len ben' nita' ciudad Jerusalén, len yaca ben' uza'rë bago ru'a nisadao' ga re' yedyi Tiro len yedyi Sidón. Lëleyaquë' bdyinyaquë' ta uzëmagayaquë' bi na Jesús len ta yeyue Jesús yaca ben' raca žhue'. <sup>18</sup>Yaca ben' redzagalao, yaca ben' yu'u bichi be xi'ibi', beyue Jesús leyaquë' beyacayaquë'. <sup>19</sup>Lao yugulu yaca benë' re'enaquë' uda' na'ayaquë' Jesús, dan' neziaquë' con yela' huaca quienë' yeyuenë' leyaquë' chi bi yela' hue' yu'uyaquë'.

**Ca gaca ta yedaohuero len ca gaca ta biyedaohuero***(Mt. 5.1-12)*

<sup>20</sup>Na'ra una' Jesús yaca ben' quienë' na' unë':



—Yedaohue le'e chi racayëchi'le ca naca dula' xquia babële, dan' naca quiele ga rnabë' Diuzi.

<sup>21</sup>'Yedaohue le'e chi re'enle gata' ta yu'u ni'a xnezi quie Diuzi cabë' gue'en ben' rdue gaohuë', porque dan' gata'cazi quiele ca re'enle gata'. 'Yedaohue le'e chi racayëchi'le rbedyile ca dula' xquia de lao yedyi layu, porque dan' huadyin dza sule gusto užidyile.

<sup>22</sup>'Yedaohue le'e cati rudie benë' le'e, cati rbioyaquë' le'e tzala'la, cati utasi unioyaquë' le'e, cati inëyaquë' nacale ben' mala tanun quie dan' naole në'ëdi', ben' naca bichi yugulu benë'. <sup>23</sup>Reya'ala' yedaohuetzeguele bë' gaca quiele cana', dan' huata' tu tadya'a gula quiele cati bazule guibá. Con can' psaca xuzixta'o yaca ben' nita' na'a, udila unëlyäyaquë' yaca ben' udixogue' xti'idza' Diuzi, cana' usacarëyaquë' le'e.

<sup>24</sup>'Beyëchi' gula nacan quie le'e, ben' uña'a, ben' binao xneza Diuzi, porque ca tu ta dezi lao dyilayu niga naca quiele, bira gata' mazara.

<sup>25</sup>'Beyëchi' gula nacan quie le'e, ben' detzague ta gao, ben' birlidza Diuzi, porque huadyin dza tuele, bira gata' ta gaole.

'Beyëchi' gula nacan quie le'e, ben' redaohue ružidyi, ben' birue quie xti'idza' Diuzi, porque huadyin dza cuedyile cabë' bayëchi' za' gaca quiele.

<sup>26</sup>'Beyëchi' gula nacan quie le'e, chi ilë'ë yugulu benë' le'e ben' dya'a, dechan' binacale ben' dya'a, porque cana' bë' xuzixta'o ben' niga, blë'ëyaquë' ben' dya'a ben' nazi rguixogue'yaquë' xti'idza' Diuzi, den' ben' huizi' yë'.

### Reya'ala' idyë'ëro yaca ben' rudie ra'o

(Mt. 5.38-48; 7.12)

Na' una Jesús rëbinë' leyaquë':

<sup>27</sup>—Pero le'e ben' ruzënaga ca rnia', reya'ala' idyë'ële yaca ben' rdza' rgüin' le'e, huele tadya'a lële ben' rudie le'e. <sup>28</sup>Inabale tadya'a lao Diuzi quie ben' rudze'de' le'e, ulidzale Diuzi gaca tahuen quie ben' rutasi runio le'e. <sup>29</sup>Chi nu benë' rgapa' xagale, ulehue'në' itzala'n capanë'. Chi nu benë' rguba gabán quiele, ulehue'në' lente camisa quiele. <sup>30</sup>Ulehue' nutezi benë' ta inabayaquë' le'e. Chi nu yaca ben' aōzi'yaquë' ta de quiele, biyenabalen. <sup>31</sup>Ulehuelë yaca benë' con cabë' re'enle huelë yaca benë' le'e.

<sup>32</sup>'Chi le'e nedyë'ële tuzi ben' nedyë'ë le'e, bihuele pensari tadya'a ruele, porque lente yaca ben' mala ruerëyaquë' can'. <sup>33</sup>Chi le'e ruele tadya'a len tuzi ben' rue tadya'a len le'e, bihuele pensari tadya'a ruele, porque lente yaca ben' mala ruerëyaquë' can'. <sup>34</sup>Chi le'e hue'le presta tuzi ben' runrë le'e presta, bihuele pensari tadya'a ruele, porque lente yaca ben' mala ru'erëyaquë' presta tuzi ben' ru'erë presta leyaquë'. <sup>35</sup>Pero le'e, reya'ala' idyë'ële ben' rudie le'e, reya'ala' huelële yaca benë' dya'a, reya'ala' hue'leyaquë' ta inabayaquë' presta, biinabale yeyueyaquë' laohue quiele. Chi huele cabë' rnia', tažera gun Diuzi quiele. Chi huele cabë' rnia', lena' ulu'en tali nacale ben' quie Diuzi zu sibi. Rnia' le'e, huele ca rue Diuzi, porque naca Diuzi ben' dya'a gula. Tuzi ca rue Diuzi ruenë' tadya'a lente yaca

ben' birēbi lēbē' diuxcalelo', ben' birue tahuen. <sup>36</sup>Reya'ala' idyē'ēle yaca benē' cabē' nedyē'ē Xuziro Diuzi yaca benē'.

### **Bireya'ala' inēbīzoro quie laguedyiro**

(Mt. 7.1-5)

Na' una Jesús:

<sup>37</sup>—Biinēbīzole quie laguedyile, cana' biyeyue bižo Diuzi len le'e. Biudyiaguile laguedyile, yela' na' biudyiaguirē Diuzi le'e. Yezi'zele quie laguedyile, yela' na' yezi'žerē Diuzi quiele. <sup>38</sup>Hue'le ta de quiele ben' bide quie, cana' yeyun Diuzi le'e ta de quienē'. Ca rue Diuzi biyeyunnē' lē'ēti'zin, hueyunnē' mazara ta yuñā'a ta de quienē'. Con ca huelēle laguedyile, cana' huelē Diuzi le'e.

<sup>39</sup>Na'ra una Jesús unē' tu chopa di'idza' ni:

—¿Huzaque' usa' tu ben' laochula itu ben' laochula? ¿Cala huaguinu lao rupateyaquē' lu'u ga naca stēbi? <sup>40</sup>Nu ben' bineyudyi huesēdi quie, binegaquē' ca raca maestro quienē'. Pero nu ben' babeyudyi huesēdi quie, na'ra gacanē' ca tu raca maestro quienē'.

<sup>41</sup>¿Como dyē'ēdi rna'le bēbi dao' yu'u lu'u lao bi' bichile? ¿Na' laole le'e, birna'le yu'un bicho yaga? <sup>42</sup>¿Como reyažole rēbile bi' bichile: “Bicha', ben lato yebioga' bēbi dao' yu'u laolo”)? ¿Na' birezaquele quiele cuinle yu'un bicho yaga? ¡Le'e ben' birue tuzi ca nale! Tanēro ulebio bicho yaga yu'u lu'u laole, cana'ra hualē'ēle dyē'ēdi ta yebiole bēbi dao' yu'u lao bi' bichile.

### **Según ca naca ta rbialao yaga, rlē'ēro chi yaga dya'a, chi yaga median**

(Mt. 7.17-20; 12.33-35)

Na' una Jesús:

<sup>43</sup>—Birbia yaga dya'a tu ta naca sla'. Lēzirē birbia tazixi yaga median. <sup>44</sup>Pues quie quie yaga rlē'ēro chi yaga dya'a, chi yaga median, según ca naca ta rbialaon. Bicuia higos lao yaga yēchi'. Lēscan' bicuia bedzuli' lao luba yēchi'. <sup>45</sup>Lēzi be'mbyu huen, di'idza' huen rero lu'u laxta'onē' rnēnē'. Na' biži be'mbyu mala, di'idza' mala rero lu'u laxta'onē' rnēnē'. Porque dan' según ca naca ta yu'u lu'u laxta'o benē', chi tahuen, chi tamala, cana' iron lu'u laxta'oyaquē' inēyaquē'.

### **Ga ru'en di'idza' quie lao rupa cue' ga bēyaquē' yu'u**

(Mt. 7.24-27)

Na' una Jesús:

<sup>46</sup>—¿Bixquien' nale nē'ēdi', “Señor, Señor”, na' birue quiele ca rnia'? <sup>47</sup>Nia' le'e ca naca quie ben' nao nē'ēdi', ben' rue quie ca nia'. <sup>48</sup>Lēcana' naca quie ben' bē yu'u quie, pqui'nnē' zitu' lu'u yu ta pcua'nē' besu quie yu'u. Caora baben tu yusiu' huala, biužaque'n usuri'n besu, dan' yu'un zitu' yu. <sup>49</sup>Na' biži ben' re ca rnia', pero biruenē' nē'ēdi' casa ca rnia', naca quiē' ca quie ben' pcua' besu delao yuzi. Caora baben tu yusiu' huala, caora na' pquinun besu, bguinu yu'u, bega'nten lao lato.

### **Beyue Jesús ben' criado quie ben' romano, ben' naca xan' soldado**

(Mt. 8.5-13)

**7** Biži cati beyudyi unē Jesús gudyinē' yaca benē', na' bezē'ē zioquē' yedyi Capernaum. <sup>2</sup>Lēgan' na' zu tu ben' romano, ben' rnabē' soldado, naquē' capitán. Biži zu tu criado quienē', ben' nedyē'ēnē', tahuala raca žhue'nē', bagazi gatinē'. <sup>3</sup>Biži

cati be capitán babdyin Jesús gan!, na use'elè' tu ben' rnabè' quie yaca ben' Israel ta inabayèchi'nè' chi biguida Jesús yeyuenè' ben' de raza žhue'.

<sup>4</sup>Biži bè' bdyinyaquè' ga zè Jesús, na' unèyèchi'yaquè' rēbiyaquè' lēbè':

—Ben' naca xan' soldado, naquè' ben' huen, zaca'nè' huelo' ca cule re'ennè',  
<sup>5</sup>dan' rlè'ènè' yaca ben' yedyi quiero ben' huen. Lèlèbè' bènè' mandado bēyaquè' idao' sinagoga quiero.

<sup>6</sup>Na'ra uza' Jesús ziolènè' leyaquè'. Biži baidyinyaquè' bago žan yu'u quie xan' soldado, na' use'ela' xan' soldado yaca ben' nacalènè' amigo rēbiyaquè' Jesús:

—Señor, ni tu bigaco' zēdi, porque bibi zaca' ta guido' tzu'ulo' lu'u yu'u quia'.<sup>7</sup>Tana' lena' bibeyažoga' guida' cuina' dena'a luè'. Con tu di'idza'zi inao' iyaca criado quia' hueyacabi'.<sup>8</sup>Biži zu ben' rnabè' nē'èdi'. Lèzirè nacaria' ben' rnabè' quie soldado. Cati hua' mandado ga tzioyaquè', huayoyaquè'. Lèzi cati hua' mandado guidayaquè', huidayaquè'. Lèzi cati rueria' mandado criado quia', ruebi' yugute ta rua'bi' mandado.

<sup>9</sup>Cati be Jesús ca una xan' soldado, tu bebanzi Jesús ca unè'. Na'ra una'nè' ga nita' yaca ben' nao lēbè', unè' rēbinè' leyaquè':

—Tali nacan. Ni tu yaca ben' Israel, binelè'èda' ben' hue quie cabè' rue ben' niga, rzudyi'ilènè' nē'èdi'.

<sup>10</sup>Biži bè' bedyyn yaca ben' use'ela' xan' soldado žan yu'u quiè', bedyinyaquè' rna'yaquè' babeyaca ben' criado, ben' raza žhue'.

**Beseban Jesús ži'i nigula  
nati xquiuhue**

<sup>11</sup>Baode guca can', na' uza' Jesús ziolènè' yaca ben' quienè' yedyi lao

Naín. Lèzi ziorè ben' zè len leyaquè'.

<sup>12</sup>Biži cati bdyin Jesús bago ru'a yedyi, blè'ènè' banu'ayaquè' ben' huati ta tzacachi'yaquè' lēbi'. Biži bi' guti nacabi' ži'i nigula nati xquiuhue. Tuzi bi' na' uzu quienè'. Ziolè yaca ben' zè, ben' lao yedyi, len nigula na'.<sup>13</sup>Biži bè' blè'è Jesús nigula na', beyèchi'la'adyi'nè' lēbè', unè' rēbinè' lēbè':

—Bicuedyo'.

<sup>14</sup>Na' ubiga' Jesús yeda' nē'è lē'è caja quie bi' huati. Cana' uleza yaca ben' nu'a lēbi'. Na'ra unè Jesús rēbinè' bi' huati:

—Xcuidi', rnia' luè': iBeyasa!

<sup>15</sup>Caora na' uyasabi' gan' debi' lu'u caja quiebi', are'bi', rnèbi'. Na'ra beyu'e Jesús lēbi' žna'bi'.

<sup>16</sup>Biži caora blè'è yaca ben' nita' na', lega bdzebiyaquè'. Bēyaquè' Diuzi ben' že unayaquè' rēbiyaquè' laguedyiyacuè':

—Babla' tu ben' rue yela' huaca, ben' use'ela' Diuzi ladoro gan' nita'ro.

Lèzi unarēyaquè':

—Diuzi baose'elè' ben' ni ta gacalènè' ben' Israel, ben' yedyi quienè'.

<sup>17</sup>Cana' guca unezi yaca ben' quie estado Judea, len yaca ben' yedyi re' bago con can' bē Jesús.

**Aose'ela' Juan ben' quienè' ta  
yenabayaquè' Jesús tu di'idza'**

(Mt. 11.2-19)

<sup>18</sup>Biži be Juan cabè' yela' huaca bē Jesús nun quie gudyi ben' quienè' lēbè' cabè' rue Jesús.

<sup>19</sup>Cana' gužinè' chopo ben' quienè' ta uyoyaquè' yenabayaquè' Jesús chi tali naquè' ben' una Diuzi ise'ela'nè', ben' rbezayaquè' guida,

o chi cala lëbë'. <sup>20</sup>Yaca ben' use'ela' Juan bdyinyaquë' ga zë Jesús rëbiyaquë' lëbë':

—Use'ela' Juan bautista nëto' ta denabando' luë' chi naco' ben' una Diuzi ise'ela'në', o chi reya'ala' nita'ndo' cuzando' guida ben' tula.

<sup>21</sup>Biži caora nita'lëyaquë' Jesús, blë'ëyaquë' beyue Jesús nacala yela' hue' mala yu'u yaca benë', beyacayaquë'. Lëzi blë'ëyaquë' bebionë' bichi be xi'ibi' yu'u yaca benë', blë'ëyaquë' beyuenë' yaca ben' laochula, ben' birlë'ë, belë'ëyaquë'. <sup>22</sup>Na'ra una Jesús rëbinë' yaca ben' quie Juan:

—Uleyo uletzetixogue' Juan ca ta babia' bablë'ële babele. Uleyëbinë' quie yaca ben' laochula, barelë'ëyaquë', lëscan' quie yaca ben' ži, baredayaquë', lëscan' quie yaca ben' yu'u yela' hue' ca mal de pindo, areyëriyaquë', lëscan' quie yaca ben' xcuedzo, bareyëyaquë', lëscan' quie yaca ben' baguti, rebanyaquë' tatula. Na' biži yaca ben' yëchi', rguixogui'ayaquë' di'idza' la'iya quie Diuzi.

<sup>23</sup>Yedaohue yaca ben' biyeyati inao në'ëdi'. —Cana' una Jesús gudyinë' ben' quie Juan.

<sup>24</sup>Biži cati zeyo yaca ben' use'ela' Juan, na' uzulao Jesús rëbinë' yaca benë' ca naca quie Juan, unë' rëbinë' leyaquë':

—¿Nuži uyole yena'le lao lato ga bidyia yu'u? ¿Uyole yena'le tu ben' yun'la'adyi' ca raca tu žisi ržizi rdan bë' rda be bedun'? <sup>25</sup>Chi biuyole yena'le ben' yun'la'adyi', čnuži uyole yena'le? ¿Uyole yena'le ben' zutzao', ben' naco la'ari' dya'a? Le'le dyë'ëdi banezile ben' naco

la'ari' dya'a, ben' zu lu'u yu'u dya'a, nita'yaquë' lao' yedyi ga zu rey, binita'yaquë' lao lato ga bidyia yu'u. <sup>26</sup>Pues ca rnia' le'e, čnuži uyole yena'le? ¿Uyole yena'le ben' rguixogue' di'idza' la'iya quie Diuzi? Talicazi rguixogue' Juan di'idza' la'iya quie Diuzi. Nacarë' ben' že ca ben' uduxogue' xti'idza' Diuzi dza na'tela. <sup>27</sup>Lëquie Juan rnën lë'ë guichi la'iya quie Diuzi cani:

Huase'ela' ben' cuialao neza tzetixogue'në' yaca benë' yëbinë' leyaquë' cani:

“Ca rue ben' rluba neza, ben' rue dya'a xnezi, cana' huele utza'le pensari quiele, dan' baza' ben' ise'ela' Diuzi.”

Cana' rnën lë'ë guichi la'iya quie Diuzi. <sup>28</sup>Na'ra ca rnia' le'e, entre lado yaca ben' nita' lao yedyi layu niga, nunura ben' uduxogue' xti'idza' Diuzi zu nacara že ca Juan. Na' biži, ben' zu guibá, ben' birnabë'tica ga zu Diuzi, nacaranë' že ca Juan.

<sup>29</sup>Na' biži yaca ben' huequižu, ben' bë' Juan laohue, len yaca los demás ben' bë' Juan laohue, caora beyaquë' ca una Jesús, bezaqueyaquë' naca Diuzi ben' rue tali, ben' rue ta yu'u ni'a xnezi.

<sup>30</sup>Na' biži yaca ben' partido fariseo, len yaca ben' rusëdi ley quie Moisés, yaca ben' bibë lato hue' Juan laohue, bigu'unyaquë' ca tadya'a gu'un Diuzi hue Juan quieyaquë'.

<sup>31</sup>Na' una Jesús rëbinë' yaca ben' na':

—¿Ca bi ejemplo ulu'en cabë' naca pensari quie yaca ben' nita' na'a? ¿Ca bi ejemplo rnanan ta hua' di'idza' cabë' rueyaquë'?

<sup>32</sup>Rue yaca ben' nita' na'a ca quie

xcuidi' re' lao ye'eya rēbiyacabi' laguediyacabi': "Rcuedyindo' flauta, na'ra biquitue biuya'ale. Rulando' canción bayēchi', lēscan' biuredyile." <sup>33</sup>Cana' naca quiele, porque bida Juan bautista, biudaonē' pan, bihue'enē' vino, na' le'e unale yu'unē' bichi be xi'ibi'. <sup>34</sup>Lēzi nē'ēdi', bichi yugulu benē', bida' raohua' ri'oga', na' le'e unale naca' ben' ri'o raolē'ē, ben' naca amigo quie ben' de dula' xquia quie, len yaca ben' huequiū. <sup>35</sup>Pero yaca ben' naocazi xneza Diuzi, lēleyaquē' rulu'eyaquē' ca naca quie yela' riōñe'e quie Diuzi.

**Jesús unēnē' di'idza' ni žan yu'u quie**

**Simón, ben' naca partido fariseo**

<sup>36</sup>Biži gudyi tu ben' naca partido fariseo Jesús chi biguidē' žan yu'u quienē' ta gaohuē'. Na'ra bdyin Jesús uyu'unē' lu'u yu'u ure'nē' lao mesa. <sup>37</sup>Lēlao yedyi na' zu tu nigula mala. Caora unezinē' babdyin Jesús žan yu'u quie ben' naca partido fariseo, na'ra uzē'ē žan yu'u quiē' nu'ē tu frasco alabastro yudzon aceite rla' žixi žeo. <sup>38</sup>Na' ure'nē' xni'a Jesús uzulaonē' rbedyinē', rla'onē' nisa rero laohuē' ni'a Jesús. Ude na' rzi'nē' guitza' guichonē' resebidyinē' ni'a Jesús, raonē' situ ni'a Jesús, uži'nē' aceite rla' žixi žeo, bla'onē'n ni'a Jesús. <sup>39</sup>Biži ben' naca partido fariseo, ben' bē' ta udao Jesús, cati blē'ēnē' cabē' bē nigula, na' guquē' pensari unē': "Chi tali ben' niga naquē' ben' use'ela' Diuzi, huacabē'nē' ca naca nigula rqui' lēnē', dan' naquē' nigula mala." <sup>40</sup>Na'ra una Jesús rēbinē' Simón:

—Simón, re'enda' inia' luē' tu di'idza'.

Na'ra una Simón rēbinē' Jesús:

—Una nē'ēdi', maestro.

<sup>41</sup>Na'ra una Jesús rēbinē' lēbē':

—Uzu chopa be'mbyu

reya'ala'yaquē' dumi quie ben' rue presta dumi. Tunē' reya'alē' ga'yo' gayuhua dumi plata. Na' itunē' reya'alē' gatzo gayuhua. <sup>42</sup>Na' como lao rupayaquē' biužaquē'yaquē' yeyu'eyaquē' ben' unabayaquē' presta dumi, quie lao rupateyaquē' bezi'že ben' unabayaquē' presta dumi. Na'ra rnaba' luē' tu di'idza': Lao rupayaquē', ¿ca nulayaquē' lao rupayaquē' reya'ala' gacayaquē' agradecer mazara quie ben' na'?

<sup>43</sup>Na'ra una Simón rēbinē' Jesús:

—Raqueda' ben' reya'ala' yalao quie ben' bē presta dumi.

Na'ra una Jesús rēbinē' lēbē':

—Napo' rson cabē' unao'.

<sup>44</sup>Biži beyēcho Jesús rna'nē' gan' zē nigula, unē' rēbinē' Simón:

—¿Rlē'ēlo' nigula niga? Nē'ēdi' baoyu'a lu'u yu'u quio', na' bibenlo' nisa tzēri ni'a. Na' nigula

niga baodibinē' ni'a con nisa uredyinē' besebidyinē'n con guitza' guichonē'.

<sup>45</sup>Baoyu'a lu'u yu'u quio', na' biudaolo' situ xaga' ca naca costumbre de quiero.

Pero desde uyu'a lu'u yu'u quio', birsan nigula ni raonē' situ ni'a.

<sup>46</sup>Bibla'olo' aceite guichoga' ca naca costumbre de quiero, na' nigula

niga babla'onē'n ni'a aceite rla' žixi žeo. <sup>47</sup>Quie lena' rnia' luē', ca tu ta nedyē'ē nigula niga nē'ēdi', lena'

rulu'en nezinē' de yela' huenitilao quienē' ca nacala tamala babēnē'.

Pero nu ben' bē lē'ēti'zi tamala,

lëzi lë'ëti'zi nedyë'ënë' ben' bezi'že quienë'.

<sup>48</sup>Na'ra una Jesús rëbinë' nigula:  
—Abezi'l'zia' ca naca dula' xquia babao'.

<sup>49</sup>Na' biži yaca ben' dyiarë lao mesa, yaca ben' bdyinrë udaorë, unayaquë' laguedyiyaquë':

—¿Nuži naca ben' niga yezi'l'ženë' quie dula' xquia quie benë'?

<sup>50</sup>Na'ra una Jesús rëbinë' nigula:  
—Dan' rzudyi'ilëlo' në'ëdi', babeyëriilo' lao Diuzi. Beyo, bira idëbilo' quie dula' xquia quio'.

### Gucalë yaca nigula Jesús

**8** Ude beyudyi uzu Jesús lidyi Simón, na' uza'l'ënë' lao chipchopa ben' quienë'. Zioyaquë' yedyi tu yedyi rguixogue'në' yaca benë' cabë' naca yela' rnabë' quie Diuzi. <sup>2</sup>Lëzi ziorë yaca nigula len Jesús. Lëyaca nigula beyue Jesús yela' hue' yu'uyaquë', bebionë' bichi be xi'ibi' yu'uyaquë'. Ladoyaquë' na' ziorë ben' lao María Magdalena. Lëlëbë' bebio Jesús gadyi bichi be xi'ibi' uyu'unë'. <sup>3</sup>Lëzi ziorë tu nigula lao Juana, žgula ben' lao Chuza, ben' naca gobierno quie rey Herodes. Lëzi ziorë itu nigula lao Susana, len yaca nigula bë'rë ta de quieyaquë' ta gucalëyaquë' Jesús.

### Ga una Jesús tu di'idza' quie ben' raza bini trigo

(Mt. 13.1-9; Mr. 4.1-9)

<sup>4</sup>Biži ca zioyaquë' yedyi tu yedyi bdyin yaca ben' zë ga zë Jesús. Caora babdupa ben' zë gan' zënë', na'ra unë' tu di'idza' ta nacan irupa iyunala rëbinë' leyaquë' cani:

<sup>5</sup>—Zio tu ben' gaza bini trigo. Caora rzalanë' bini trigo ca

costumbre quieyaquë', bala bini yaque'n tu neza, na' ude ja benë' bliojë'n, lëscan' aodaorë yaca bguini len. <sup>6</sup>Ibala bini trigo yaque'n lao yo ga žuba tzaye'zi yu. Bë' ulën ubidyin, dan' binacan tubelaozi yu. <sup>7</sup>Ibala bini trigo yaque'n ga rlë guixi' yëchi'. Biži guixi' yëchi' gu'unin, na' bdyiagui'n bini trigo. <sup>8</sup>Ibala bini trigo yaque'n ga naca tubelaozi yu. Gu'unin huen bën usecho dya'a. Udyian tu gayuhua bini trigo quie lao tu ni'an.

Beyudyi unë Jesús di'idza' unë' zidzo unë':

—Le'e babe, ulezë nagale can' rnia'.

### Una Jesús ga huen dyin di'idza' rusëdinë' benë'

(Mt. 13.10-17; Mr. 4.10-12)

<sup>9</sup>Na'ra unaba yaca ben' quie Jesús ga huen dyin di'idza' unë'. <sup>10</sup>Na'ra unë' rëbinë' yaca ben' quië':

—Uzioñe'ecazi Diuzi le'e ca naca quie yela' rnabë' quienë'. Na' yaca ben' tula, rëba' leyaquë' conlë di'idza' ta nacan irupa iyunala como dan' ba'ala'cazi rlë'ëyaquë', rueyaquë' ca ben' birlë'ë, ba'ala'cazi reyaquë', rueyaquë' ca ben' birioñe'e.

### Ga bexi'idzë' Jesús quie di'idza' unë'

(Mt. 13.18-23; Mr. 4.13-20)

Na' una Jesús:

<sup>11</sup>Cani naca quie di'idza' ta nacan irupa iyunala: Bini trigo ruen ca quie xti'idza' Diuzi. <sup>12</sup>Na' bini yaque' tu neza, ruen ca quie benë' babžë'naga xti'idza' Diuzi, pero biži za' xan' taxi'ibi' reguban ca naca di'idza' babeyaquë' ta bira

hue quieyaquë'n, biyeyëriyaquë'  
lao Diuzi. <sup>13</sup>Na' bini yaque' lao yo  
ga žuba tzaye'zi yu, ruen ca quie  
ben' babženaga xti'idza' Diuzi, na'  
uyezila'adyi'yaquë'n bë quieyaquë'n  
tu chi'. Pero dan' nacayaquë' ca  
quie lue bini biuyu'un zitu' yu,  
quie lena' tu chi'zi bë quieyaquë'n.  
Cati guta' zëdi quieyaquë', na'  
psanyaquë', bira bë quieyaquë'n.  
<sup>14</sup>Na' bini yaque' ga rië guixi' yëchi',  
ruen ca quie ben' bženaga xti'idza'  
Diuzi, pero bibë quieyaquë'n.  
Naoziyaquë' neza quieyaquë',  
rdëbiyaquë' quie dza rdayaquë' lao  
yedyi layu, rza'la'adyi'yaquë' ta  
de lao dyilayu. Lëlëyaquë' naca  
quieyaquë' ca quie bini bibë' usecho.  
<sup>15</sup>Na' bini yaque' lao tubelaozi yu,  
ruen ca quie ben' bženaga xti'idza'  
Diuzi, na' bëyaquë' quieyaquë'n. Du  
guicho du la'adyi'yaquë' naoyaquë'n.  
Lëlëyaquë' naca quieyaquë' ca quie  
bini bë' usecho dya'a.

**Unë Jesús tu di'idza' quie tu lámpara**  
(Mr. 4.21-25)

Na' una Jesús:

<sup>16</sup>—Nunu uga'ala' lámpara ta  
utacoron caja, ni ta ucachi'ron žan  
belaga. Ruen zi uzuro lámpara  
sibi ta useni'n ta ilë'ë ben' za'  
tzu'u lu'u yu'u. <sup>17</sup>Cabë' naca quie  
lámpara, cana' nacarën quie yaca  
benë'. Yugulu ta pcachi' yaca  
benë', huadyin dza yebio Diuzi ta  
pcachi'yaquë', cuionë'n zaca'lao ta  
ilë'ë ja benë' len. Lëscan' yugulu  
di'idza' negachi' rnë yaca benë',  
huadyin dza quixogue' Diuzi ca  
di'idza' negachi' unayaquë'.

<sup>18</sup>Ulezë nagale dyë'ëdi. Nu  
ben' rue quie ta tziõe'ënenë' bi na

xti'idza' Diuzi, uzioñe'era Diuzi lëbë'  
mazara, pero nu ben' bihue quie ta  
tziõe'ënenë' xti'idza' Diuzi, hueguba  
Diuzi hasta tadao' baoyoñe'ënenë'.

**Unë Jesús quie žnë'ë len bi' bichinë'**  
(Mt. 12.46-50; Mr. 3.31-35)

<sup>19</sup>Biži bdyin žna' Jesús len yaca bi'  
bichinë' gan' zënë', pero biužaquë'  
tzu'uyaquë' lu'u yu'u dan' nita' yaca  
ben' zë gula gan' zënë'. <sup>20</sup>Na'ra tu  
ben' zë gan' zënë' unë' rëbinë' lëbë':  
—Lali'a babdyin žnao' len yaca bi'  
bicho'. Re'lenyaquë' hue'lëyaquë' luë'  
di'idza'.

<sup>21</sup>Biži una Jesús rëbinë' yaca ben'  
nita' rzënaga:

—Con nu ben' rzënaga rue quienë'  
xti'idza' Diuzi, lëleyaquë' naquë' ca  
quie žna'a, ca quie bi' bicha'.

**Udila Jesús be bedun'**  
(Mt. 8.23-27; Mr. 4.35-41)

<sup>22</sup>Biži dza tula uyu'u Jesús lënë'  
yaca ben' quië' lu'u barco, na' unë'  
rëbinë' leyaquë':

—Tzioro tzala'la lagun.

<sup>23</sup>Na'ra uza'yaquë' zioyaquë'  
tzala'la lagun. Na' tu  
zaidyinrayaquë' guta' Jesús  
gusinë'. Cana' uzulao rda tu be  
bedun' huala gula lao nisa, baredza'  
nisa lu'u barco bare'ennan yeton.  
<sup>24</sup>Na'ra psebë yaca ben' quienë'  
lëbë', unayaquë' rëbiyaquë' lëbë':  
—iMaestro! iMaestro! iBareto  
barco lu'u nisa!

Cana' uyasa Jesús udilanë' be  
bedun' ta rda lao nisa. Lëcana'  
lapsanten laore'ten chizi. <sup>25</sup>Na'ra  
unë' rëbinë' yaca ben' quienë':  
—¿Bixquien' biuzudyi'ilële Diuzi  
ta ute uselanë' ra'o?

Bízi leyaquë' du rdzebiyaquë', unayaquë' rëbiyaquë' laguedyiaquë':

—¿Nuži ben' niga r nabë'në' be bedun' len nisa ralen quienë'?

**Beyue Jesús tu ben' yedyi Gadara, ben' yu'u bichi be mala**

(Mt. 8.28-34; Mr. 5.1-20)

<sup>26</sup>Bízi bdyinyaquë' yu nebaba Gadara ta re'n tzala' lagun gan' nebaba estado Galilea. <sup>27</sup>Bízi bë' bero Jesús lu'u barco, caora na' ubiga' tu ben' yedyi na'. Baoca zi dza yu'unë' bichi be xi'ibi'. Rdanë' du guidinë', biraconë' žabanë'. Nica zuzë' žan yu'u, den' zunë' ga rcachi'yaquë' ben' huati. <sup>28</sup>Cati blë'ënë' Jesús, na' uditzu žibinë' ure'në' lao Jesús uredyia'në' rëbinë' Jesús:

—¿Bixquien' zao' niga huelo' në'ëdi' zëdi? Nubë'da' luë' Jesús, ži'i Diuzi zu guibá. Rnabayëcha' laolo' ta biutzagalaolo' në'ëdi'.

<sup>29</sup>Cana' una ben' na' dan' bë Jesús mandado ta yero bichi be xi'ibi' yu'unë', dan' r nabë'cazin yu'un lëbë'. Bízi baoca zë lasa rquiyoa'quë' lëbë' na'anë' len ni'anë', pero ružužu ruquinonë'n, ržunonë' rquië'n lëbë' lao lato ga bidyia yu'u.

<sup>30</sup>Na'ra unaba Jesús len:

—¿Bi laolo'?

Na' bequëbin rëbin lëbë':

—Xopa mila laohua'.

Cana' unan dan' neyë yaca taxi'ibi' uyu'u ben' na'. <sup>31</sup>Na'ra una yaca bichi be xi'ibi' unabayëchi'yacan ta biuse'ela' Jesús leyacan lu'u yero zítu' gula ga yedzagalaoyacan.

<sup>32</sup>Lëgan' na' nita' cuchi zë lao ya'a yu'uyacaba' huao. Na'

unabayëchi'yacan Jesús ta tzetzu'uyacan yaca cuchi. Na'ra bë'në' lato leyacan tzetzu'uyacan cuchi. <sup>33</sup>Cana' guca bero yaca bichi be xi'ibi' ben' na', zioyacan yetzu'uyacan cuchi. Bízi ca uyu'uyacan cuchi, uxitiyacaba' lu'u barranca bguinuyacaba' lu'u nisa ga gutiyacaba'.

<sup>34</sup>Bízi caora blë'ë yaca ben' rapa cuchi cabë' guca quieyacaba', na' bdzebiyaquë' uza'yaquë' zioyaquë' tzetixogue'yaquë' yaca ben' lao yedyi len yaca ben' zio layela cabë' guca. <sup>35</sup>Cana' zio yaca benë' tzena'yaquë' cabë' guca. Cati bdyinyaquë' gan' zë Jesús, blë'ëyaquë' ben' uyu'u bichi be xi'ibi'. Blë'ëyaquë' are'në' chizi xni'a Jesús, anaconë' žabanë', abeyu'unë' pensari. Caora na', tu bega'nziyaquë' bdzebiyaquë'. <sup>36</sup>Ca naca yaca ben' blë'ë, udixogue'yaquë' cabë' guca quie ben' uyu'u bichi be xi'ibi' beroyacan gan' uyu'uyacan. <sup>37</sup>Nun quie can' guca, gudyi yaca ben' yedyi Gadara ta yeza' Jesús yeyoguë' ga tula, dan' rdzebiyaquë' can' guca. Na' beza' Jesús beyu'unë' lu'u barco zeyoguë'. <sup>38</sup>Pero tu bineza' Jesús, unabayëchi' ben' uyu'u bichi be xi'ibi' chi bisaque' tzio'lenë' lëbë' con ga zio'guë'. Bízi una Jesús gudyinë' lëbë':

<sup>39</sup>—Bigaca sao'. Beyo žan yu'u quio', yetixogue' yaca ben' nita' žan yu'u quio' con cabë' bë Diuzi quio' beyaco'.

Na'ra beza'në' zeyoguë' udixogue'në' yaca benë' lao yedyi con cabë' bë Jesús beyuenë' lëbë'.

**Ni ru'en di'idza' quie nigula bda' žbe žaba Jesús len quie ži'i Jairo, bi' guti**

(Mt. 9.18-26; Mr. 5.21-43)

<sup>40</sup>Bízi cati bedyín Jesús tatula ga uzë'ë itzala' lagun, bízi yaca



benè' bezi'yaquè' lèbè' dyè'èdi dan' nita'yaquè' rbezayaquè' lèbè'.  
<sup>41</sup>Lèscan' bdyin tu ben' lao Jairo, naquè' ben' napa dyin lu'u idao' sinagoga. Lèlèbè' bdyinnè' uditzu žibinè' žni'a Jesús. Na' unabè' cule lao Jesús ta tzio Jesús žan yu'u quienè'.  
<sup>42</sup>Unè' cana' dan' zu tuzi ži'inè' nigula. Lèži'inè' nigula na' chipchopa iza zubi', na' debi' raca žhue'bi' bagatibi'. Ca naca zio Jesús lènè' leyaquè' lado yaca benè', lega rquidi' yaca benè' lèbè' gan' zionè' yu'unè' neza.

<sup>43</sup>Lèladoyaquè' na' zio tu nigula zu uba'a aoca lao chipchopa iza. Aoyonè' lao médico zè, bènè' gasto dumi quiè'. Ni tu médico biužaquè'yaquè' yeyueyaquè' lèbè'.  
<sup>44</sup>Lèlèbè' yasè' bago xcu'udzu Jesús bda'nè' žbenè' žaba Jesús. Ca bda'nè' žbenè' žaba Jesús, laolezate quie uba'a quienè'.

<sup>45</sup>Biži una Jesús rëbinè' leyaquè':  
 —¿Nuži bda' žbe žaba'?

Na'ra una yugo yaca benè' zè na' rëbiyaquè' Jesús:

—Nunu bda' žbe žabo'.

Lèscan' una Pedro len yaca ben' laguedyinè', rëbiyaquè' lèbè':

—Maestro, rquidi' yaca benè' luè' de lao rupala'ate, na' como rnao':  
 “¿Nuži bda' žbe žaba'?”

<sup>46</sup>Na'ra una Jesús:

—Zu tu ben' bda' žbe žaba', dan' gucabè'da' bro yela' huaca quia' beyaca ben' bda' žbe žaba'.

<sup>47</sup>Biži cati blè'è nigula gucabè' Jesús can' bè nigula, du rdzebinè' bdyinnè' uditzu žibinè' žni'a Jesús. Na' unè' udixogue'nè' zaquè'lao lao yaca benè', dan' bda'nè' žbenè' žaba Jesús. Lèzi udixogue'rènè' beyacanè'

caora bda'nè'n. <sup>48</sup>Biži una Jesús rëbinè' nigula:

—Zana', dan' zudyi'ilèlo' nè'èdi', babeyaco'. Beyo, cue' chizi lu'u guicho laxta'olo'.

<sup>49</sup>Caora zè Jesús nernènè', cati bdyin tu ben' uza' žan yu'u quie Jairo, ben' napa dyin lu'u idao' sinagoga. Na' unè' rëbinè' Jairo:  
 —Baguti ži'ilo'. Bira cule huelo' Maestro zèdi.

<sup>50</sup>Biži cati be Jesús ca unè', na' unè' rëbinè' Jairo:

—Biidzebo'. Sudyi'ilèlo' nè'èdi' con lèzin hueyaca ži'ilo'.

<sup>51</sup>Cati bdyinyaquè' žan yu'u quie Jairo, bibè'nè' lato nurla tzu'ulènè' lu'u yu'u. Na' uyu'ulènè' Pedro, len Jacobo, len Juan, len xuzi žna' xcuidi'.  
<sup>52</sup>Biži rbedyi lao yuguluyaquè' raca beyèchi' quieyaquè' quie bi' huati. Na' una Jesús rëbinè' leyaquè':

—Bicuedyile. Le'e nale bagutibi', pero nè'èdi' nia' rasizibi'.

<sup>53</sup>Biži yaca benè' bžidiyaquè' quienè', dan' unè' can', dan' baneziyaquè' banati xcuidi'.  
<sup>54</sup>Na'ra bèxo Jesús na'a xcuidi' huati, na' unè' zidzo unè':

—Xcuidi', uyasa.

<sup>55</sup>Ca unè' cana', babeban xcuidi' labeyasatebi'. Na' bè Jesús mandado ta hue'yaquè' ta gao xcuidi'.

<sup>56</sup>Biži xuzi žna' xcuidi' huati, tu bega'nziyaquè' bebanyaquè' can' guca. Na' gudyi Jesús leyaquè':

—Ni tu nunu yèbile cabè' bia' quie bi' huati.

**Use'ela' Jesús lao chipchopa ben' quienè'**

(Mt. 10.5-15; Mr. 6.7-13)

**9** Na'ra betupa Jesús lao chipchopa ben' quienè' bènè'

yela' huaca quienè' ta yebioyaquè' bichi be xi'ibi' yu'u yaca benè', lëscan' ta yeyueyaquè' nacala yela' hue' yu'u yaca benè'. <sup>2</sup>Use'ela'nè' leyaquè' tzetixogue'yaquè' yaca benè' de que baza' dza inabè' Diuzi lao yaca ben' nita' lao yedyi layu, lëzi ta yeyueyaquè' ben' raca žhue'. <sup>3</sup>Na'ra una Jesús rëbinè' leyaquè':

—Bè' baziolè yu'ule neza, ni tu bibi hua'ale, ni tu yaga, ni tu yëxo, ni ta gaole, ni dumi. Nica hua'ale chopa cue' žabale, tu cue'zin hua'ale. <sup>4</sup>Ga idyinle žan yu'u quie benè' ga gasile, biutzal'e. Tuzi ga gasile hasta que idyin dza yeza'le. <sup>5</sup>Chi ga bire'enaquè' yezi'yaquè' le'e, uleza' lao yedyi, gusile bëxte yu dyia ni'ale ta gacan tu seña de que bibè quieyaquè' xti'idza' Diuzi.

<sup>6</sup>Na' beza'yaquè' zioyaquè' lao dužete yedyi ta quixogue'yaquè' ca hue Diuzi ta gata' yela' neban quiejè' tuzioli, lëzi ta yeyueyaquè' yaca ben' raca žhue' lao duže gan' rdayaquè'.

**Cabè' bë Herodes bënë' mandado bëtiyaquè' Juan**

(Mt. 14.1-12; Mr. 6.14-29)

<sup>7</sup>Caora na' Herodes, ben' naca gobernador, unezinè' lao dužete cabè' rue Jesús. Na' rdëbinè' raquè' pensari, dan' rna yaca benè' rnayaquè' quie Jesús naquè' Juan bautista babebannè' tatula. <sup>8</sup>Na' balayaquè' rnayaquè' quie Jesús naquè' profeta Elías abela'nè' tatula. Na' ibalayaquè' rnayaquè' quie Jesús naquè' ben' udxogue' xti'idza' Diuzi tiempote, ben' beban tatula. <sup>9</sup>Biži una Herodes rëbinè' laguedyinè':

—Nè'èdi' bia' mandado ichuguyaquè' luba' Juan agutinè'. ¿Na' nuži ben' rda ruenè' cabè' ca di'idza' ru'e yaca benè'?

Na'ra Herodes gu'unnè' ilè'ënè' Jesús.

**Bgao Jesús lao ga'yo' mila be'mbyu**

(Mt. 14.13-21; Mr. 6.30-44; Jn. 6.1-14)

<sup>10</sup>Biži bè' bedyin yaca ben' quienè' gan' zu Jesús, caora na' gudiyayaquè' lëbè' con can' bëyaquè' gan' uyoyaquè'. Na'ra uquiè' Jesús leyaquè' ziolënè' leyaquè' tu lao lato ga rega'nnan ga'ala' yedyi Betsaida. <sup>11</sup>Bè' unezi yaca benè' aziogue' ru'a yedyila, na' zioyaquè' gan' zënë'. Na' bezi'nè' leyaquè' udxogue'nè' leyaquè' quie yela' rnabè' quie Diuzi. Lëzi beyuerènè' yaca ben' raca žhue'.

<sup>12</sup>Biži bardze' bara' dza, ubiga' yaca ben' quie' gan' zënë' rëbiyaquè' lëbè':

—Gudiyi yaca benè' yeyoyaquè' con ga re' yedyi ga'ala' ta tzetiloyaquè' ta gaoyaquè' ta yezila'adyi'yaquè', porque gan' zëro niga, bide ta gaoyaquè'.

<sup>13</sup>Na'ra una Jesús rëbinè' yaca ben' quienè':

—Ulehue' yaca benè' ni ta gaoyaquè'.

Na'ra unayaquè' rëbiyaquè' Jesús: —Binu'ando' tazè. Ga'yo'zi yëta xtila len ichopa bela ta nu'ando'. Lëzin de chi bitziondo' tzegue'ndo' mazara ta gao yaca ben' niga. —Cana' unayaquè' rëbiyaquè' Jesús.

<sup>14</sup>Na' biži nita' ca du ga'yo' mila be'mbyu gan' zè Jesús. Na'ra una Jesús rëbinè' yaca ben' quienè':

—Uleyëbiyaquè' cue'yaquè' lao gatzo gayuhua huioyaquè'.

<sup>15</sup>Cana' ure'yaquë' lao gatzo gayuhua huioyaquë' lao yuguluyaquë'. <sup>16</sup>Na'ra uzi' Jesús lao ga'yo' yëta xtila len lao chopa bela bazënë'n. Na' unë'ë ladza unë' rëbinë' Diuzi "Diuxcalelo'." Ude na', bë'në'n yaca ben' quienë' ta quisiyaquë'n hue'yaquë' ta gao yaca ben' re'. <sup>17</sup>Biži udao yuguluteyaquë' beloyaquë'. Ude na' besedza'yaquë' chipchopa ga' naga yaca ta yožo began'.

**Una Pedro naca Jesús ben' Cristo,  
ben' use'ela' Diuzi**

(Mt. 16.13-19; Mr. 8.27-29)

<sup>18</sup>Biži bdyin tu dza zulë Jesús yaca ben' quienë' tu cuinziyaquë' cati bë'lë Jesús Diuzi di'idza'. Na' unë' rëbinë' yaca ben' quienë':  
—¿Nuži na yaca benë' naca' nël'ëdi'?

<sup>19</sup>Na'ra una yaca ben' quienë' rëbiyaquë' lëbë':

—Balayaquë' nayaquë' luë' naco' Juan bautista, na' ibalayaquë' nayaquë' naco' Elías. Pero ibalayaquë' nayaquë' naco' ben' udixogue'rë xtil'idza' Diuzi tiempote, ben' beban.

<sup>20</sup>Caora na' unë' rëbinë' yaca ben' quienë':

—¿Na'a le'e, nuži nale naca' nël'ëdi'?

Na' unë Pedro:

—Luë' naco' ben' Cristo, ben' use'ela' Diuzi.

**Una Jesús ca gaca quienë' cati gatinë'**

(Mt. 16.20-28; Mr. 8.30-9.1)

<sup>21</sup>Biži Jesús unë' gudyinë' leyaquë' dyë'ëdi ta biyëbiyaquë' benë' naquë' ben' Cristo, ben' use'ela' Diuzi.

<sup>22</sup>Na' unë' rëbinë' leyaquë':

—Në'ëdi', bichi yugulu benë', lega yedzagalaohua'. Yaca ben' rnabë', len yaca xan' pxuzi, len yaca ben' rsëdi ley quie Moisés, huaru'unla'adyi'yaquë' nël'ëdi', gutiyaquë' nël'ëdi'. Pero te gaca lao tzona dza, huebana'.

<sup>23</sup>Lëzi unarë' rëbinë' leyaquë':

—Chi nu yaca ben' re'en inao nël'ëdi', ruen zi bira inoayaquë' ca rna pensari quieyaquë'. Ruen zi biidzebiyaquë' naoyaquë' nël'ëdi' yugu dza, ba'ala'cazi ruen žudyi guti ja benë' leyaquë'. <sup>24</sup>Chi nu yaca ben' rdzebi inoayaquë' nël'ëdi', dan' rdzebiyaquë' gatiyaquë' tanun quia', bigata' yela' neban quiejë' tuzioli. Pero nu yaca ben' bibdzebi inoayaquë' nël'ëdi', bibdzebiyaquë' gatiyaquë' tanun quia', lëlëyaquë' huata'cazi yela' neban quieyaquë' tuzioli. <sup>25</sup>¿Biži gan de quie nu benë' anaca quië' lao yugulute ta de lao yedyi layu, chi bigata' yela' neban quië' tuzioli? <sup>26</sup>Chi nu ben' chu'unla'adyi' nël'ëdi' yedue'yaquë' hue quieyaquë' can' baonia', lëzi nël'ëdi', bichi yugulu benë', huaru'unla'adya' leyaquë' cati yeguida' inabi'a lao yedyi layu ca rey. Zeyu'a yela' huaca quie Xuza' Diuzi len yaca ángel naca la'iya quienë'. <sup>27</sup>Tali ca rnia' le'e, binegati bala le'e nita' niga len nël'ëdi' tu binelë'ële ca naca yela' huaca quie Diuzi.

**Ca guca bë' betza' cuin Jesús  
zaca'lao lao yaca ben' quienë'**

(Mt. 17.1-8; Mr. 9.2-8)

<sup>28</sup>Biži bë' guca lao xuna dza una Jesús cana', urënë' tu lao ya'a ta hue'lënë' Diuzi di'idza'. Na' uquië'në' Pedro, len Santiago,

len Juan. <sup>29</sup>Biži ca uzulaonè' ru'elènè' Diuzi di'idza', cana' betza' laohuè' len žabanè' gucan bezèri di. <sup>30</sup>Caora na' labdyinte Moisés len Elías ga zè Jesús, ru'elèyaquè' lèbè' di'idza'. <sup>31</sup>Na' tu xni' že ure' gan' zèyaquè' tu ru'elèyaquè' lèbè' di'idza' unayaquè' ca gaca quienè' gatinè' ciudad Jerusalén. <sup>32</sup>Ba'ala'cazi Pedro len ben' laguedyinè' barnatzeguen gasiyaquè', bega'nyaquè' rna'yaquè' ca naca yela' huaca quie Jesús blu'en ga zènè' len chopa ben' ru'elènè' di'idza'. <sup>33</sup>Biži bè' beza' yaca ben' bè'lè Jesús di'idza', na' una Pedro rëbinè' Jesús:

—Maestro, tahuen na' zundo' lëndo' luè' niga. Ben lato huendo' tzona yu'u dao' de guizi. Huendo' tun quio', itun quie Moisés, itun quie Elías. —Cana' una Pedro den' binezinè' bi nè'.

<sup>34</sup>Biži ca naca ru'e Pedro di'idza', bdyin tu beo bdubin leyaquè' gan' nita'yaquè'. <sup>35</sup>Biži lado beo na' beyaquè' rchi' Diuzi unè' rëbinè' leyaquè'.

—Lèži'ina' niga, ben' nedyè'èda'. Ulezënaga quiè' cabè' nè' na'.

<sup>36</sup>Ude beyaquè' rchi' Diuzi, blè'èyaquè' ituzi Jesús zènè' na'. Ganura nita' len lèbè'. Na' bega'nyaquè' bira unèyaquè'. Lèži bibi gudyaquè' yaca benè' ca guca quieyaquè' ca blè'èyaquè'.

**Beyue Jesús tu bi' yu'u bichi be xi'ibi'**

(Mt. 17.14-21; Mr. 9.14-29)

<sup>37</sup>Biži bezu dza tula, beyèziyaquè' ga zu ya'a. Caora na' uyo ben' zè gula yetilalaoyaquè' Jesús. <sup>38</sup>Na'ra

unè tu ben' zè ladoyaquè' unèguè' zidzo:

—Maestro, bè tu cule, ina'lo' ži'ina' niga. Zelao tuzi lèbi' naca ži'ina'. <sup>39</sup>Yu'ubi' tu bichi be mala ruxun lèbi' rbedyiyabi'. Rde na' reru'unnan lèbi' layu, raca bdyin' ru'abi'. Lega rulètzaguen lèbi', bire'ennan usannan lèbi'.

<sup>40</sup>Bagudya' yaca ben' quio' ta yebioyaquè' bichi be mala yu'ubi', pero biužaquè'yaquè'.

<sup>41</sup>Na'ra una Jesús rëbinè' yaca benè':

—iLe'e, ben' zidi yaladyi', biralele! ¿Ca balala dza re'ennan sèlia' le'e sueda' can' ruele? Yaxi' ži'ilo' dehua'abi' niga.

<sup>42</sup>Biži cati bdyin bi' yu'u taxi'ibi' bago gan' zè Jesús, udi taxi'ibi' lèbi' layu, pxizeran lèbi'. Na'ra udila Jesús bichi be xi'ibi' yu'ubi' beron zeyon beyacabi'. Ude na' beyu'enè'bi' xuzibi'. <sup>43</sup>Biži bega'n yugulu ben' nita' na' bebanyaquè' ca naca yela' huaca quie Diuzi bè Jesús.

**Udixogue' Jesús tatula ca gaca bè' gatinè'**

(Mt. 17.22-23; Mr. 9.30-32)

Tu reban yaca benè', na' una Jesús rëbinè' yaca ben' quienè':

<sup>44</sup>—Ulezënaga dyè'èdi con can' nia'. Nè'èdi', bichi yugulu benè', usedyin yaca benè' nè'èdi' lao na'a ben' rudie nè'èdi'.

<sup>45</sup>Biži yaca ben' quienè' biuyoñe'eyaquè' ca unè'. Binedyin hora ta tzioñe'eyaquè' can' unè'. Lèži bireyažoyaquè' inabayaquè' yexi'idzè' leyaquè' cabiži unè'.

**Una Jesús ca nurla ben' quienë'  
nacara belao**

(Mt. 18.1-5; Mr. 9.33-37)

<sup>46</sup>Biži yaca ben' quie Jesús  
rtzaloyaquë' unayaquë':  
—¿Nurla ra'o gacararo belao cati  
idyinro ga zu Diuzi?

<sup>47</sup>Pero nezi Jesús ca naca pensari  
racayaquë'. Lëcana' užì'në' tu xcuidi'  
bzënë'bi' cuëta lë'ënë'. <sup>48</sup>Na'ra unë'  
rëbinë' yaca ben' quienë':

—Chi nu yaca ben' rezi'  
xcuidi' niga tanun quia', lëscan'  
rezi'rëyaquë' në'ëdi'. Chi nu  
yaca ben' rezi' në'ëdi', lëscan'  
rezi'rëyaquë' ben' use'ela' në'ëdi'.  
Quie lena', nu le'e racalë laguedyi,  
biruele belao cuinle, lëben' na'  
nacarë' ben' belao entre le'e lao  
yugulule.

**Nu ben' birue condre ra'o, nacacazi  
quieyaquë' ca quie ben' rnëcule ra'o**

(Mr. 9.38-40)

<sup>49</sup>Na'ra una Juan rëbinë' Jesús:  
—Maestro, bablë'ëndo' rda tu ben'  
rzëtoguë' laolo' rebioquë' bichi be  
xi'ibi' yu'u benë'. Begadyindo'në'  
udilalëndo'në', dan' ruenë' cana'  
birdalënë' ra'o.

<sup>50</sup>Na'ra una Jesús rëbinë' Juan:  
—Bihuegadyile ben' rue can', dan'  
nu ben' birue condre ra'o, nacacazi  
quieyaquë' ca quie ben' rnëculë ra'o.

**Jesús udilë' Santiago len Juan**

<sup>51</sup>Biži baruen bago idyin dza yeyo  
Jesús guibá, na' uzë'ë du la'adyi'në'  
bdze'në' neza zionë' ciudad  
Jerusalén. <sup>52</sup>Na' aose'elë' ben'  
quienë' udyialaoyaquë' zioyaquë'  
tu yedyi quie estado Samaria ta

quiloyaquë' lato ga idyinyaquë'.

<sup>53</sup>Biži yaca ben' Samaritano,  
bigu'unyaquë' hueyaquë' lato ta  
yega'nyaquë' gan', dan' nezियाquë'  
bazioyaquë' ciudad Jerusalén.

<sup>54</sup>Biži cati be yaca ben' quie Jesús  
cabë' bë yaca ben' Samaritano,  
na'ra una Santiago len Juan  
rëbiyaquë' Jesús:

—Señor, ¿re'enlo' guëžiro gui' za'  
guibá ta uzeina utachin leyaquë'  
cabë' bë profeta Elías dza na'la?

<sup>55</sup>Na'ra una' Jesús leyaquë'  
udilanë' leyaquë' unë' rëbinë'  
leyaquë':

—Le'e binezile ca pensari calëla  
yu'ule, dan' unale cana'. <sup>56</sup>Në'ëdi',  
bichi yugulu benë', cala bida' ta  
aodyiaya' yaca benë', bida' ta ute  
usela' leyaquë'.

Na' užì'yaquë' zioyaquë' yedyi  
tula.

**Ni rnan quie ja ben' nao Jesús**

(Mt. 8.19-22)

<sup>57</sup>Biži azioyaquë' yu'uyaquë'  
neza cati bdyin tu ben' unë' rëbinë'  
Jesús:

—¿Señor, huaza'lia' luë' con gatezi  
tzio'?

<sup>58</sup>Na'ra una Jesús rëbinë' lëbë':  
—Zu beló ga rasi yaca be'eza'. Lëzi  
dyiarë lidyi bguini ga rasiyacaba'.  
Pero në'ëdi', bichi yugulu benë',  
bizu lidya' ga idyina' sua'.

<sup>59</sup>Na'ra una Jesús rëbinë' ben' itu:  
—Uda, unao në'ëdi'.

Na' bequëbinë' rëbinë' Jesús:  
—Señor, ben në'ëdi' lato tzetapa'  
xuza', dan' bagatinë'.

<sup>60</sup>Na'ra una Jesús rëbinë' lëbë':  
—Bë lato ucachi' yaca ben' birue  
quie xti'idza' Diuzi xuzo'. Pero

na' luè', uda ta quixogue'lo' benè' xti'idza' Diuzi ca naca yela' r nabè' quienè'.

<sup>61</sup>Na'ra una itu ben' rëbinè' Jesús:  
—Señor, re'enda' inaohua' luè', pero ben lato tzeguedya' yaca ben' zu žan yu'u, chi usanyaquè' nè'èdi' ta inaohua' luè'.

<sup>62</sup>Na'ra una Jesús rëbinè' lèbè':  
—Nu ben' birna' tuzi xneza' inaonè' nè'èdi', chi reyèchonè' rna'nè' xcu'udzule, lena' rulu'en rnan quienè' inaonè' neza tula. Na' binaca quienè' ga zu Diuzi r nabè'nè'.

**Use'ela' Jesús tzona galo  
chi ben' quienè'**

**10** Bè' ude unè Jesús di'idza', na' ulioquè' itzona galo chi benè' ta use'ela'nè' chopa huioyaquè' zioyaquè' yedyi tu yedyi ta udyialaonezayaquè' con gan' tzio Jesús. <sup>2</sup>Na'ra unè' rëbinè' leyaquè':

—Tali rnia' le'e, nita' ben' zè, ben' rbeza uzënaga xti'idza' Diuzi, naca quieyaquè' ca quie usecho. Pero tu chopaziyaquè' naca ben' rezi' usecho quie Diuzi, ben' rguixogue' xti'idzè'. Tana' lena', ruguin inabale Diuzi ise'elè' mazara ben' yezi' usecho, ben' quixogue' xti'idzè'.

<sup>3</sup>Na' uletzio le'e. Yeza'la'adyi'le rse'ela' le'e naca quiele ca quie beco' ži'ila' tzirole lado yaca ben' naca ca lobo. <sup>4</sup>Bihua'ale dumi, bihua'ale yëxo, bihua'ale ni itu cue' guidi uliole. Lèzi bitzèle hue'lèle yaca benè' zè di'idza' tu neza gan' ziole. <sup>5</sup>Cati bayu'ule lu'u yu'u quie benè', reya'ala' inale yèbile xan' yu'u: “Huabèchi Diuzi chizi lu'u guicho laxta'ole gan' zule

niga.” <sup>6</sup>Chi rezi'yaquè' le'e dyè'èdi, cana' huabe' chizi lu'u guicho laxta'oyaquè'. Pero chi birezi'yaquè' le'e dyè'èdi, bicue' chizi lu'u guicho laxta'oyaquè'. <sup>7</sup>Cati idyinle yu'u gan' idyinle, na'azi sule, na'azi gaole yo'ole con ta runyaquè'. Nu ben' rue dyin, napè' derecho quižu xa'nnè' lèbè'. Tuzi yu'u gan' idyinle na' yega'nle. <sup>8</sup>Cati idyinle tu yedyi ga rezi'yaquè' le'e, ulegao ta udyiayaquè' laole gaole. <sup>9</sup>Lèzi yeyuele ben' raca žhue' yedyi gan' idyinle yèbileyaquè': “Babdyin dza hue quiele xti'idza' Diuzi.” <sup>10</sup>Chi yedyi gan' bdyinle bigu'unyaquè' yezi'yaquè' le'e, uleta lao neza quieyaquè' inale cani: <sup>11</sup>“Bèxte yu quie yedyi ni uda'n lu'u huaracho quiendo', usisindo'n yedyibin ta nacan tu seña bibè quiele xti'idza' Diuzi. Ruen zi inezile babdyin dza hue quiele xti'idza' Diuzi.” <sup>12</sup>Rnia' le'e, dza gaca juicio, huata'ra castigo huala quie ben' yedyi bibezi' le'e. Huacaran mazara cabè' bè Diuzi quie yaca ben' ciudad Sodoma dza na'la.

**Ni rnèn quie yaca yedyi bibè quie  
xti'idza' Diuzi**

(Mt. 11.20-24)

Na' una Jesús:

<sup>13</sup>—iBayèchi' gula gaca quie le'e, ben' yedyi Corazín! iLèzi bayèchi' gula gaca quie le'e, ben' yedyi Betsaida! Chi blè'è ben' yedyi Tiro len ben' yedyi Sidón ca yela' huaca bè Diuzi lao le'e, biunaoyaquè' huerayaquè' tamala quieyaquè' dza na'la. Chi blè'èyaquè', abetza'yaquè' pensari quieyaquè', gucoyaquè' la'ari' gaso, bdyiayaquè' de

guichoyaquë' ta ulu'en baneziyaquë'  
ca tamala bëyaquë'. <sup>14</sup>Quie lena',  
cati bdyin dza hue Diuzi juicio,  
huata'ra castigo huala gula quiele,  
cala ca castigo gaca quie ben' yedyi  
Tiro len ben' yedyi Sidón. <sup>15</sup>Na'ra  
le'e, ben' yedyi Capernaum, biinale  
rlë'ë Diuzi le'e ben' huen yeyole  
guibá, dechan' le'e yeyole lao gui'  
gabila.

Na' una Jesús rëbinë' yaca ben'  
quië':

<sup>16</sup>—Nu yaca ben' ruzënaga quiele,  
cana' ruzënarëyaquë' quia'.  
Nu yaca ben' rusebi' le'e, cana'  
rusebi'rëyaquë' në'ëdi'. Chi nu ben'  
rusebi' në'ëdi', cana' rusebi'rëyaquë'  
ben' use'ela' në'ëdi'.

**Cabë' guca cati bedyin tzona  
galo chi ben' quie Jesús**

<sup>17</sup>Na'ra cati bedyin tzona galo  
chi yaca ben' use'ela' Jesús,  
redaohueyaquë' unayaquë'  
rëbiyaquë' lëbë':

—Señor, lente yaca bichi be xi'ibi'  
guleyacan quiendo' cati bzëtondo'  
laolo'.

<sup>18</sup>Na'ra una Jesús rëbinë' leyaquë':

—Blë'ëda' bguino xan' taxi'ibi'  
Satanás žan guibá, uyëzin ca rëzi  
bdyito hueziu'. <sup>19</sup>Na'ra guna' le'e  
yela' huaca quia' ta nulirole yaca  
bëla, na' nulirole yaca xuni', bibi  
hueyacaba' quiele. Lëscan' guna'  
le'e yela'huaca quia' ta huele  
gan xan' taxi'ibi' bihuelënan le'e.

<sup>20</sup>Tahuen na' rale yaca taxi'ibi'  
quiele. Pero lena' binacaten ta  
yedaohuele. Nacaran ta yedaohuele  
dan' bazu laole lë'ë guichi quie  
Diuzi de guibá.

**Bedaohue Jesús unëñë'**

(Mt. 11.25-27; 13.16-17)

<sup>21</sup>Lëhora na', du yu'u Jesús Bichi  
Be quie Diuzi, lega redaohuenë'  
unë':

—Xuza' Diuzi, naco' ben' že, naco'  
ben' rnabë' guibá len lao yedyi layu.  
Luë' pcacho' yela' huaca quio' quie  
yaca ben' na rioñe'e. Na' blu'elo'  
yela' huaca quio' yaca ben' rale  
quio' ca rue xcuidi' ralebi' quie  
xuzibi'. Cana' bao' xuza', dan' cana'  
re'lenlo' gaca.

<sup>22</sup>'Lao na'a babën xuza' yugulute.  
Nunu nuebë' në'ëdi' ca nuebë' xuza'  
në'ëdi'. Lëscan' nunu nuebë' xuza'  
ca nuebi'a xuza'. Yaca ben' baolioga',  
lëleyaquë' nuebë'yaquë' xuza'.

<sup>23</sup>Biži una' Jesús yaca ben'  
quienë', unë' rëbinë' lëziyaquë':

—Tahuen gula naca quie le'e, dan'  
rlë'ële cabë' rua'. <sup>24</sup>Rnia' le'e can',  
dan' yaca ben' zë, ben' uidxogue'  
xti'idza' Diuzi dza na', len yaca ben'  
naca rey, gu'unyaquë' ilë'ëyaquë' ca  
naca ta rlë'ële, pero biblë'ëyaquë'.  
Gu'unyaquë' yeyaquë' ca naca ta  
rele, pero bibeyaquë'.

**Ga unë Jesús quie ben' Samaria**

<sup>25</sup>Biži tu dza tula, uyo tu ben'  
rusëdi ley quie Moisés gan' zë Jesús  
ta huenë' Jesús prueba ca bi di'idza'  
yequëbinë'. Na' unë' rëbinë' Jesús:

—Maestro, ¿ca bi reya'ala' hua' ta  
gata' yela' neban quia' tuzioli'?

<sup>26</sup>Na'ra una Jesús rëbinë' lëbë':

—¿Biži rna lë'ë guichi ley quie  
Moisés? ¿Ca bi ca inao' rnën?

<sup>27</sup>Na'ra bequëbi ben' rusëdi ley  
quie Moisés unë' rëbinë' Jesús:

—“Reya'ala' idyè'èro Diuzi quiero du guicho du la'adyi'ro. Lèzi reya'ala' idyè'èro laguedyiro cabè nedyè'èro cuinro.”

<sup>28</sup>Biži una Jesús rëbinè' lëbè':

—Lagazi unao'. Chi hue quio' ca unao', huata' yela' neban quio' tuzioli.

<sup>29</sup>Pero ben' rusèdi ley quie Moisés, gu'unnè' gacalënë' cuinnè' cabè' di'idza' gudyinè' Jesús. Cana' unè' rëbinè' Jesús:

—¿Nuži ben' naca laguedya'?

<sup>30</sup>Na'ra una Jesús rëbinè' lëbè':

—Uza' tu ben' ciudad Jerusalén zionè' yedyi Jericó. Biži tu neza gan' zionè', na' bro yaca ben' uban ulanyaquè' ta nu'è. Bè'yaquè' lëbè' zi', pca'nyaquè' lëbè' du guidinè'. Bega'nnè' tu neza, ilè'èti'zi bigutinè'.

<sup>31</sup>Biži na' zio tu pxuzi tu neza gan' de ben' na'. Biži bè' blè'ënè' ben' de tu neza, na' udenè' tzala'la zioquè' yu'unè' neza. <sup>32</sup>Lëscan' uderè tu ben' naca ži'i suba Leví gan' de ben' naca zi'. Lèzi cati blè'ënè' ben' na', tu udezinè' zionè' yu'unè' neza.

<sup>33</sup>Lèzi zio tu ben' uza' tu yedyi quie estado Samaria tu neza gan' de ben' naca zi'. Biži ca blè'ënè' lëbè' gan' denè', na' beyèchi'la'adyi'nè' lëbè'.

<sup>34</sup>Na'ra ubiga'nè' gan' de ben' naca zi', bla'onè' aceite len vino gan' naca hue'. Ude na' ptubinè' la'ari' lao hue'. Na' pcutënë' lëbè' xcu'udzu bia quienè' uquiè'nè' lëbè' con gan' idyinyaquè' yega'nyaquè'. Lëgan' na' unè'è lëbè'. <sup>35</sup>Biži bezu dza tula, tu binesè'è, ulio ben' Samaria chopa dumi plata bè'nè'n ben' naca xan' yu'u gan' bdyinyaquè'. Na' unè' rëbinè' lëbè': “Gapo' na' hue'lo' ta gao ben' niga. Chi biguque dumi

niga, na' aoza'laora' quizuga' bè' yedia' tatula.”

<sup>36</sup>Na' una Jesús rëbinè' ben' rusèdi ley quie Moisés:

—Pues rnaba' luè', lao yuna yaca ben' ude na', ¿ca nurlayaquè' naca ben' laguedyi ben' guca zi'?

<sup>37</sup>Na'ra una ben' rsèdi ley quie Moisés rëbinè' Jesús:

—Ben' beyèchi'la'adyi' ben' guca zi'.

Na'ra una Jesús rëbinè' lëbè':

—Beyo, bèrè con cabè' bè ben' na', ben' beyèchi'la'adyi' ben' guca zi'.

**Ga bdyin Jesús lidyi Marta len María**

<sup>38</sup>Na' uza' Jesús uyu'unè' neza zionè' bdyinnè' ga de tu yedyi. Lëgan' na' zu tu nigula laonè' Marta. Lëlëbè' bezi'nè' Jesús žan yu'u quienè'. <sup>39</sup>Na' zu tu žila Marta laonè' María. Ure'nè' xni'a Jesús ta uzënananè' cabè' rna Jesús. <sup>40</sup>Pero lega rdyine Marta quie dyin quienè' rusiña'nè' ta gaoyaquè'. Na'ra ubiga'nè' ga re' Jesús unè' rëbinè' lëbè':

—Señor, ¿bixquien' birdëbilo' quia' nël'èdi'? Apca'n žila' María nël'èdi'. Tuza' rua' dyin niga. Gudyi žila' tu di'idza' yeguidabi' gacalëbi' nël'èdi'.

<sup>41</sup>Na'ra una Jesús rëbinè' lëbè':

—Marta, Marta, lega rdyinelo' rdëbilo' quie dyin quio'. <sup>42</sup>Pero ta uzënagaro xti'idza' Diuzi nacaran belao. Cabè' rue María, re'bi' ruzënagabi' can' nia', lena' nacaran huen. Bisaque' yëpa'bi': “Beyo, bicue'lo' rzënago' can' rnia'.”

**Ga psèdi Jesús yaca ben' quienè' ta hue'lëyaquè' Diuzi di'idza'**

(Mt. 6.9-15; 7.7-11)

**11** Biži bdyin tu dza uzu Jesús tu lao lato ga bè'lënè' Diuzi



di'idza'. Bè' beyudyi bè'lënë' Diuzi di'idza', na' unè tu ben' quienè' rëbinè' lëbè':

—Señor, psèdi nètò' cabè' huendo' ta hue'lëndò' Diuzi di'idza' cabè' bè Juan psèdinè' yaca ben' quienè'.

<sup>2</sup>Na'ra una Jesús rëbinè' yaca ben' quienè':

—Cati hue'lële Diuzi di'idza', inale cani:

Xuzindo' Diuzi zulo' guibá, naca la'iya laolo'.

Rbezando' guida dza inabè'lo' lao yedyi layu cabè' rnabè'lo' guibá ga zulo'.

<sup>3</sup>Guno' ta gaondo' quie na'adza cabè' ta rdzioguendo'.

<sup>4</sup>Bezi'že quiendo' tamala bëndò' cabè' rezi'žendo' tamala bè yaca benè' len nètò'.

Gacalao' nètò' ta biiguinondo' lao tamala, ucuasa ucui'olo'tamala za' gaca quiendo'. Amén.

<sup>5</sup>Lëzi unarè Jesús rëbinè' leyaquè':

—Ugunro lao tu le'e tziole gatzo yela lidyí tu amigo quiele yëbilenè': "Amigo, ben nètèdi' tzona yèta xtila <sup>6</sup>como dan' babla' tu bi' amigo quia' žan yu'u. Na' bibi de ta hua'abi' gaobi'." <sup>7</sup>Lëzi ugunro bequèbi ben' zu lu'u yu'u unè': "Bihuelo' nètèdi' zèdi, dan' baneyeyo yu'u quia'. Lëzi arasi yaca xcuidi' quia' ržubayacabi' lao cama len nètèdi'. Bisaque' chasa' guna' luè' dan' rnabo'." <sup>8</sup>Pues rnia' le'e, chi lëbè' biuyasè' hue'nè' ta rnaba ben' na', ba'ala'cazi naquè' bi' amigo quienè', re'en ca re'ennan chasè' hue'nè' yugulu ta rdziogue amigo quienè' tacuenda bira bizèdi huenè' lëbè'. <sup>9</sup>Cani rnia' le'e:

Ulenaba Diuzi ta rdzioguele, na' gunnè'n. Ulequilo tali quie Diuzi, na' huadzelan. Ulelidza Diuzi gan' zunè', na' huenè' quiele. <sup>10</sup>Ruen zi huele cana', porque nu ben' rnaba Diuzi ta rdzioguenè', na' hue'nè'n. Lëscan' nu ben' rguilo tali quie Diuzi, na' huadzelenè'n. Lëscan' nu ben' rulidza Diuzi gan' zunè', na' huenè' quienè'.

<sup>11</sup>¿Bi ca nale le'e xuzi xcuidi'? ¿Hue'le ži'ile yola lao laza inababi' yèta xtila? Lëzi, ¿hue'le ži'ile bëlala lao laza inababi' bela? <sup>12</sup>Lëzi, ¿hue'le ži'ile xuni'la lao laza inababi' chita? <sup>13</sup>Chi le'e, ben' rda lao yedyi layu niga, chi nezile hue'le ži'ile tu tadya'a, na' biži Xuzile Diuzi zu guibá, neziranè' ca le'e hue'nè' benè' tu tadya'a, hasta udze'nè' Bichi Be quienè' lu'u guicho laxta'o yaca ben' unaba len.

**Ga una benè' bebio Jesús bichi be xi'ibi' conlè yela' huaca quie xan' taxi'ibi'**

(Mt. 12.22-30; Mr. 3.19-27)

<sup>14</sup>Biži bdyin tu dza bebio Jesús tu bichi be xi'ibi' yu'u tu ben' bero. Caora bero bichi be xi'ibi' gan' yu'un, labeyacate ben' na', benènè'. Na'ra bega'n yaca benè' bebanyaquè' cabè' guca quienè'. <sup>15</sup>Cana' una bala benè' rëbiyaquè' laguedyiaquè':

—Conlè yela' huaca quie Beelzebú, ben' naca xan' taxi'ibi', rebio ben' niga bichi be xi'ibi' yu'u yaca benè'.

<sup>16</sup>Biži ibalayaquè' unabayaquè' hue Jesús tu yela' huaca quie Diuzi žan guibá chi tali naquè' ben' use'ela' Diuzi. <sup>17</sup>Pero banezi Jesús cabè' pensari raca yaca benè'. Na' unè' rëbinè' leyaquè':

—Chi tu cue' gobierno gaca zè cue' partido, chi tilalèyaquè' laguedyiaquè' ben' naca partido, bisue gobierno inabè'yaquè' zidza. Lèzi chi gata' dila quie yaca ben' žan yu'u, huaroyaquè' huadzatzayaquè', bira saque' suyaquè' tuzi. <sup>18</sup>Lèzi cana' nacarè quie Satanás. Chi rbio Satanás laguedyi bichi be xi'ibi'n yu'u benè', bira saque' inabè'nan zidza. Nia' le'e cana', como dan' nale conlè yela' huaca quie Beelzebú rebioğa' bichi be xi'ibi' yu'u yaca benè'. <sup>19</sup>Pero chi nacan tali ca nale, žbiži nale quie yaca ben' naca le'e tuže, yaca ben' rebio bichi be xi'ibi' yu'urè yaca benè'? Lena' huanayaquè' le'e bisaque' taxi'ibi' yebion laguedyi xi'ibi'n. <sup>20</sup>Pero conlè yela' huaca quie Diuzi rebioğa' bichi be xi'ibi' yu'u yaca benè'. Lena' ulu'en azècazi ladole yela' huaca quie Diuzi.

<sup>21</sup>'Baruen quie Satanás ca quie tu ben' huala, ben' nuxu espada quie, ben' rapa lao yugulute ta de quie. Bisaque' tzu'u ben' tula si' ta de quienè'. <sup>22</sup>Na'ra chi guida tu ben' hualara ca lèbè', ben' dera yela' huaca quie, huenè' gan uaxonè' lèbè'. Cana' cubanè' espada quienè' ta rzugadyilenè'. Cana' si'nè' lao yugulute ta de quienè'.

<sup>23</sup>'Nu ben' birnècule nè'èdi', condre nè'èdi' zènè'. Lèzi nu ben' biracalè nè'èdi', condre nè'èdi' ruenè'.

**Ni rnan quie tu bichi be xi'ibi' beron beyu'un**

(Mt. 12.43-45)

Na' una Jesús:

<sup>24</sup>—Biži cati bero tu bichi be xi'ibi' ga yu'un benè', na' rđan tu lao lato bidyi rguilon ga tzu'unan yezila'adyi'n. Biži cati birdzela ga tzu'un, na' racan pensari: “Hueya'a tatula gan' broğa' ta yeyu'a tatula.” <sup>25</sup>Biži bè' yedyinnan gan' brona be'mbyu, anaca quienè' ca quie tu žan yu'u neluba dya'a, bega'nnan dya'a gula. <sup>26</sup>Na'ra tzion tzaxi'n igadyi bichi be xi'ibi' nacara mala ca len. Na'ra tzu'u yuguluyacan be'mbyu. Biži ben' na' huacara mala quienè' cabè' naca quienè' tanèro.

**Ni rnèn quie ben' naca huen quie**

<sup>27</sup>Tu rnè Jesús rëbinè' benè', na' unè tu nigula zidzo rëbinè' Jesús: —Naca huen quie nigula bi'a bga'adyi' luè'.

<sup>28</sup>Na'ra una Jesús rëbinè' lèbè': —Nacara huen quie ben' re rzènaga ca rna Diuzi, na' rue quieyaquè'n.

**Unaba ben' mala ulu'e Jesús tu yela' huaca za' guibá**

(Mt. 12.38-42; Mr. 8.12)

<sup>29</sup>Biži bdyinra yaca ben' zè gan' zè Jesús, na' uzulaonè' unè' rëbinè' leyaquè':

—Ben' mala naca ben' nita' na'a. Rnabarèyaquè' hua' yela' huaca ta za' guibá ilè'èyaquè'. Pero bihua' yela' huaca ta za' guibá ca re'nyaquè'. Ca yela' huaca bè Diuzi lènè' profeta Jonás, cana' huerènè' lènè' nè'èdi'. <sup>30</sup>Cabè' guca quie Jonás, bè Diuzi yela' huaca len lèbè' ta blu'enè' yaca ben' nita' yedyi Nínive ga use'ela' Diuzi lèbè', lèzi cana' gacarè quia'

në'ëdi', bichi yugulu benë'. Hue Diuzi len në'ëdi' tu yela' huaca ta ulu'enë' yaca ben' nita' na'a de que use'ela'në' në'ëdi'. <sup>31</sup>Dza gaca juicio cati ichuguli Diuzi quie yaca ben' nita' na'a, lëcana' guida nigula r nabë' lao yedyi nebaba Arabia ta ichugubë'në' quiele. Cana' huenë' como dan' lëbë' uzë'ë yedyi re' zitu' zioquë' yezënaquë' ca ta rioñe'e Salomón dza na'la. Pero ladole zua' në'ëdi', ben' r nabë'ra ca Salomón, na' le'e biruzënaquë' quia'. <sup>32</sup>Lëzi dza gaca juicio cati ichuguli Diuzi quie yaca ben' nita' na'a, lëcana' guida yaca ben' unita' yedyi Nínive dza na'la ta ichugubë'yaquë' quiele. Cana' hueyaquë' como dan' leyaquë' betza'yaquë' pensari quieyaquë' caora cati bdyin Jonás udixogue'në' leyaquë' xti'idza' Diuzi. Pero ladole zua' në'ëdi', ben' r nabë'ra ca Jonás, na' le'e biruzënaquë' quia'.

**Una Jesús quie ben' yu'u pensari quie Diuzi**

(Mt. 5.15; 6.22-23)

Na' una Jesús:

<sup>33</sup>—Ni tule biuga'ala'le lámpara ucui'olen ga negachi', nica quixolen žan caja. Ruen zi ixubalen sibi ta useni'n ta ilë'ë yaca ben' za' tzu'u yu'u. <sup>34</sup>Naca laole ca quie tu lámpara rseni'n lu'u guicho laxta'ole. Chi ina'le dyë'ëdi hue quiele xti'idza' Diuzi, lena' rulu'en quiele yu'u pensari quie Diuzi lu'u guicho laxta'ole. Pero chi biina'le dyë'ëdi, chi bihue quiele xti'idza' Diuzi, lena' rulu'en quiele rdale lao lato lao chula. <sup>35</sup>Gapale cuidado hue quiele xti'idza' Diuzi ta bitale lao lato lao chula. <sup>36</sup>Chi rue quiele

du guicho du la'adyi'le xti'idza' Diuzi, cana' tziõe'ele ca naca tali quie Diuzi, cana' gaca quiele ca quie ben' zë lámpara ta useni'n ilë'ënë' ga zionë'.

**Ga rao Jesús xquia yaca ben' partido fariseo, len yaca ben' rusëdi ley quie**

**Moisés**

(Mt. 23.1-36; Mr. 12.38-40; Lc. 20.45-47)

<sup>37</sup>Biži babeyudyi unë Jesús cana', na'ra gudyi tu ben' partido fariseo Jesús ta tzionë' žan yu'u quienë' ta gaonë'. Na' zio Jesús uyu'unë' lu'u yu'u quienë' yaque'në' ru'a mesa. <sup>38</sup>Na'ra tu bebanzi ben' partido fariseo rnë'ë ta biudibi na'a Jesús tu zagaonë'. Biunao Jesús ca naca costumbre unaoyaquë' rnayaquë' dan' rguibi na'ayaquë', cana' neyëriyaquë' lao Diuzi. <sup>39</sup>Na'ra una Jesús rëbinë' lëbë':

—Le'e ben' partido fariseo, rguibile xcu'udzu plato taza quiele, pero le'e yu'u pensari mala lu'u guicho laxta'ole, rbanle ruele tamedian quie lagedyile. <sup>40</sup>iLe'e ben' zidi! ¿Binezile re'en Diuzi huerële yëri lu'u guicho laxta'ole? <sup>41</sup>Pero chi re'enle huele yëri lu'u guicho laxta'ole, ulehue' ta de quiele yaca ben' yëchi!. Na'tera gacale yëri dužele.

<sup>42</sup>'iBayëchi' gula naca quie le'e, ben' partido fariseo! Biži lente guixi' cuan ru'ele Diuzi tu cue'n quie lao chi cue'na. Pero biruele bala ta yu'u ni'a xnezi quie Diuzi, nica nedye'ële Diuzi. Lena' zaca'ra huele, cala ca ta ru'ele Diuzi tu cue'n quie lao chi cue'na, pero rupaten reya'ala' huele.

<sup>43</sup>'iBayëchi' gula naca quie le'e, ben' partido fariseo! Lega

raxele cue'le silla ga rbe' yaca ben' bala'ana lu'u idao' sinagoga. Na' lëzi lega raxele gapala'n benë' le'e ga ziole yu'u neza.

<sup>44</sup>'iBayëchi' gula naca quie le'e, ben' rusëdi ley quie Moisés, len le'e, ben' partido fariseo! Le'e biruele tuzi ca nale. Naca quiele ca quie yerobá nadacon bëbi. Na' biži yaca benë' rdeyaquë' laonan bineziyaquë' chi yerobá na'.

<sup>45</sup>Na'ra una tu ben' rusëdi ley quie Moisés rëbinë' Jesús:

—Maestro, ca di'idza' unëlo', lëzi nrërao' condre nëto'.

<sup>46</sup>Na'ra una Jesús rëbinë' leyaquë':

—iBayëchi' gula naca quie le'e, ben' rusëdi ley quie Moisés! Ruele cabë' rue ben' rucua' yua' zi'i gula lao laguedyin tu ta bisueyaquë'. Re'enle inao yaca benë' le'e, hue quieyaquë' ca inale, na' inale cana' re'en Diuzi hueyaquë', ba'ala'cazi zëdi gula nacan ta hue quieyaquë' len. Na'ra le'e ni lë'ëti' biyeyëchi'la'adyi'le yaca benë' gacalële leyaquë' ta hue quieyaquë' len.

<sup>47</sup>'iBayëchi' gula naca quie le'e, ben' rusëdi ley quie Moisés! Como dan' cabë' bë xuzixta'ole dza na'la bëtiyaquë' nu ben' uda udixogue' xti'idza' Diuzi, cana' re'enle huerële.

<sup>48</sup>Nacale de acuerdo con can' bë xuzixta'ole. Chi le'e uzurële dza uzu xuzixta'ole, lëzi bëtile yaca ben' uda udixogue' xti'idza' Diuzi. Gucalële lëbizi xuzixta'ole.

<sup>49</sup>'Yela' rioñe'e quie Diuzi unë' cani: “Huase'ela' yaca ben' quixogue' di'idza' quia' laoyaquë'. Na'ra gutiyaquë' balayaquë', na'

hualaoyaquë' ibalayaquë'.” <sup>50</sup>Pero le'e, ben' nita' na'a, huazi' Diuzi cuenda quiele quie yela' guti quie yugulu yaca ben' udixogue' xti'idza' Diuzi, desde dza ure' lao yedyi layu.

<sup>51</sup>Pues desde dza ulato ren quie Abel hasta dza bëtiyaquë' Zacarías lu'u idao' xcu'udzu becugo, lëlena' huazi' Diuzi cuenda quiele.

<sup>52</sup>'iBayëchi' gula naca quie le'e, ben' rusëdi ley quie Moisés! Le'e ruza'agale tzioñe'e yaca benë' xti'idza' Diuzi. Le'e birioñe'le xti'idza' Diuzi, nica ru'ele lato tzioñe'e yaca ben' re'en tzioñe'e len. —Cana' una Jesús gudyinë' leyaquë'.

<sup>53</sup>Bë' una Jesús can' gudyinë' leyaquë', na'ra bdza'tzeguera yaca ben' rusëdi ley quie Moisés, len yaca ben' partido fariseo. Caora na' uzulaoyaquë' rueyaquë' lëbë' zëdi unabayaquë' lëbë' mazara di'idza'. <sup>54</sup>Lega rbe'naoyaquë' lëbë' re'enyacuë' hueyaquë' trampa quie Jesús ca di'idza' yequëbinë' tacuenda ga gaoyaquë' lëbë' xquia.

#### Ga unë Jesús quie ben' rlidza Diuzi de di'idza' ladzazi

**12** Biži banita' ben' zë gula ga zë Jesús. Tantozi babdupa ben' zë, barquidi'yaquë' laguediyacuë'. Na'ra una Jesús rëbinë' yaca ben' quienë':

—Gapale cuidado bihuele ca rue yaca ben' naca partido fariseo, dan' nacayaquë' ben' rlidza Diuzi de di'idza' ladzazi. <sup>2</sup>Yugulu ta bë yaca benë' negachi'zi, decazide yezacalaon quieyaquë' lao Diuzi cabë' bëyaquë'. Ni tu ta bë yaca benë' raqueyaquë' chi nunu blë'ë, decazide yezacalaon quieyaquë'

lao Diuzi cabè' bëyaquè'. <sup>3</sup>Yugulu ca naca di'idza' negachi' rna yaca benè', huadyin dza yezacalaon quieyaquè' lao Diuzi cabè' di'idza' unayaquè'. Lèzi yugulu di'idza' raque yaca benè' di'idza' negüi'o, huadyin dza inezi yugulu benè' cabè' di'idza' unayaquè'.

**Ni ru'en di'idza' quie nu ben'  
reya'ala' idzebiro**

(Mt. 10.26-31)

Na' una Jesús:

<sup>4</sup>—Le'e amigo quia', rnia' le'e: Biidzebile nu ben' re'en guti le'e, como dan' bè' bagutiyaquè' le'e, bira bide bihueyaquè' quiele. <sup>5</sup>Ta rnia' le'e nu ben' reya'ala' idzebile. Reya'ala' idzebile Diuzi como dan' de yela' rna'bè' quienè' yezi'nè' yela' neban quie yaca benè', na' udze'nè' leyaquè' lu'u gui' gabila.

<sup>6</sup>Lëscan' rnia' le'e: ¿Cala ruti'yaca benè' ga'yo' bguini dao' lao chopa dumi dao' lasi? Na' biži la'acazi nacaba' bguini dao' bižu, birala'adyi' Diuzi quieyacaba'. <sup>7</sup>Ta rnia' le'e, hasta guitza' guichole nulaba Diuzi lao yuguluten. Biidzebile, zaca'rale lao Diuzi mazara ca yaca bguini dao'.

**Ni ru'en di'idza' quie yaca ben' birnë  
cule Jesucristo**

(Mt. 10.32-33; 12.32; 10.19-20)

Na' una Jesús:

<sup>8</sup>—Ta rnia' le'e, nu ben' rnë cule në'èdi' lao yaca ben' nita' lao yedyi layu, lèzi në'èdi', bichi yugulu benè', huania' cule leyaquè' lao yaca ángel quie Diuzi. <sup>9</sup>Pero nu yaca ben' bichezila'adyi' në'èdi' lao yaca ben' nita' lao yedyi layu, lèzi në'èdi'

bichezila'adya' leyaquè' lao yaca ángel quie Diuzi.

<sup>10</sup>Nu ben' rnëxi'ibi' condre në'èdi', bichi yugulu benè', ru'en lato yezi'že Diuzi quieyaquè'. Pero nu ben' rnëxi'ibi' condre Bichi Be quie Diuzi, biyezi'že Diuzi quieyaquè'.

<sup>11</sup>Cati usedyinyaquè' le'e lao na'a ben' napa dyin lu'u idao' sinagoga, o chi lao na'a yaca juez, o chi lao na'a yaca ben' rna'bè', bidëbile bi di'idza' inale yequëbile yëbileyaquè'. <sup>12</sup>Cati idyin hora inale yequëbile yëbileyaquè', caora na' huacalë Bichi Be quie Diuzi le'e bi inale yequëbile yëbileyaquè'.

**Ga rue žudyi quie ben' uña'a**

<sup>13</sup>Biži lado yaca ben' na', uzë tu benè' unè' rëbinè' Jesús:

—Maestro, aguti xuz'a. Gudyi ben' bicha' gunnè' ta de quie xuz'a ca tu ta redu'uleda' si'a.

<sup>14</sup>Na'ra una Jesús rëbinè' lëbè': —Rnia' luè', binacan dyin quia' para hua'a laze quiele quie ta de quie xuzile.

<sup>15</sup>Lëscan' unè' rëbinè' leyaquè': —Gapale cuidado ta bisa'la'adyi'le ta de lao yedyi layu, como dan' nacaran belao quiele gata' yela' neban quiele tuzioli, cala ca ta sa'la'adyi'le ta de lao yedyi layu.

<sup>16</sup>Na'ra una Jesús tu ejemplo cani: —Uzu tu ben' uña'a. Guzanè' lao yu quienè'. Lega guca usecho quienè'. <sup>17</sup>Biži ben' uña'a guquè' pensari unè': “¿Ca biži hua'?” Bide ga udzi'a usecho quia', dan' lega gucana.” <sup>18</sup>Lena' guquè' pensari unè': “Banezda' ca ta hua'. Uquinuga' yu'u ga udzi'a usecho, bigaquen. Lena' huera'

tažera tacuenda gaquen ga udzi'a usecho quia' len yugulu ta de quia'." <sup>19</sup>Lëscan' guquë' pensari unë' cuinzinë': "Lega guca usecho quia'. Huaquen lao zë iza. Quie lena' abdyin hora yezila'adya', zua' contento, yo'oga', gaohua'." <sup>20</sup>Pero na' una Diuzi rëbinë' ben' uña'a: "Ben' tondo luë', na'ayela gatio'. Na' yugulu ta de quio', ĩnuži gaca quie len?" <sup>21</sup>Cana' nacan quie ben' uña'a chi rcuezanë' quië' cuinzinë' dza rdanë' lao yedyi layu. Na' biži Diuzi rlë'ënë' lëbë' ben' yëchi' gula.

**Rna'cazi Diuzi ben' nao xnezë'**

(Mt. 6.25-34)

<sup>22</sup>Beyudyi una Jesús cana', unë' rëbinë' yaca ben' quienë':  
—Con ca rnia' le'e, bidëbile ga za' ta gaole. Bidëbile ga za' ta gacole. <sup>23</sup>Nacaran belao hue quiele xti'idza' Diuzi dza rdale lao yedyi layu, cala ca ta idëbile ga za' ta gaole, ta gacole. <sup>24</sup>Ulena'cara ca raca quie yaca bguini. Birazara'nyacaba', biruerëyacaba' ga udze'yacaba' ta gaoba', den' rgaocazi Diuzi leyacaba'. Na' biži le'e, izaca'rale ca yaca bguini! <sup>25</sup>Nitu nitule, ba'ala'cazi rdëbitzeguele, bisaque' uda'rale ni itu hora ta yezurale lao yedyi layu bë' beya dza quiele. <sup>26</sup>Na' chi ni ilë'ëti' bisaque' uda'rale yezurale lao yedyi layu bë' beya dza quiele, ĩbixquien' rdëbile ga za' ta gaole, ga za' ta gacole?

<sup>27</sup>Ulena'cara ca re'eni yaca yo. Birueyacan dyin, bira'aban yëla. Na' biži rnia' le'e, ni rey Salomón, ba'ala'cazi guconë' la'ari' tzaol', la'ari' baquitu, bibetilan lëbizi yela' baquitu quie yo. <sup>28</sup>Cabë' rue Diuzi

rapë' yo ta de lao layëla, ba'ala'cazi gaca tu chopa dza huabidyin tzu'un lagui' tzeina, cana' huaparë Diuzi le'e, pero mazara le'e, ben' rdëbi ga za' ta gaole, ga za' ta gacole. <sup>29</sup>Quie lena', bitale idëbile quilole ga za' ta gaole, ga za' ta yo'ole. <sup>30</sup>Bihuele cana', dan' cana' rue yaca ben' rda lao yedyi layu, rdëbiyaquë' bi ta gata' quieyaquë'. Pero zucazi Xuziro Diuzi, rnë'ë le'e, banezinë' bi ta rdzioguele. <sup>31</sup>Ta nacaran belao hue quiele inaole xneza Diuzi, lëcana' gunnë' lao yugulute ta rdzioguele.

**Una Jesús ga reya'ala' gata' yela' uña'a quiero**

(Mt. 6.19-21)

Na' una Jesús:  
<sup>32</sup>—Bidzebile, nacale ca quie beco' ži'ila' quia', bia napa'. Ba'ala'cazi naca tu chopale, lega redaohue Xuziro Diuzi gunnë' lato yedyinle ga zunë' rnabë'në'. <sup>33</sup>Uleguti' ta de quiele. Dumi dan' guti'le ta de quiele, na' ulehue'n ben'bide quie. Cana' huacara tadya'a quiele guibá, gun Diuzi quiele ta de guibá. Na' ta gata' quiele guibá, bisaque' cuan benë' len, nica nu tzu'u udyiagui' len. <sup>34</sup>Con ga re'enle gata' yela' uña'a quiele, chi lao yedyi layu, chi guibá, lena' ulu'en ca bi pensari racale, chi quie cuinzile, chi quie Diuzi.

**Reya'ala' suro puesto cuezaro yeguida Cristo**

Na' una Jesús:  
<sup>35</sup>—Ulesu listo, ulehue ca rue ben' ruga'ala' lámpara quie, barbezë' chi ben' idyin žan yu'u. <sup>36</sup>Reya'ala' huele ca rue ben' zu rapa žan

yu'u quie xa'ne, ben' rbeza bè' yedyin xa'nnè' gan' tzioguè' ga raca huetzagana'. Rbezè' ulidza xa'nnè' lèbè' ru'a yu'u ta isaloguè' ta yeyu'u xa'nnè'. <sup>37</sup>Tahuen gula naca quie ben' rapa yu'u bè' yedyin xa'nnè', ilè'ènè' zuè', rnè'è birasinè'. Lèlena' nacan tali rnia' le'e, cuin xa'nnè' huabèchinè' lèbè' lao mesa, hue'nè' laze ta gao ben' rapa yu'u. <sup>38</sup>Lèzi tahuen gula naca quie ben' rapa yu'u chi zuè' rnè'è birasinè' bè' yedyin xa'nnè', ba'ala'cazi du gatzo yela, ba'ala'cazi du bala. <sup>39</sup>Uzènegale ca rnia' le'e ni. Chi tu ben' xan' yu'u ineziguè' bi hora idyin ben' uban, na'ra sunè' inè'è bigasinè', bihuè'nè' lato ta tzu'u ben' uban lu'u yu'u ta cuannè' ta de quienè'. <sup>40</sup>Na' bizi le'e, ulesu listo cuezale yeguida', como dan' caora bibi pensari racale yeguida', lao durpendizi yeguida' lao yedyi layu nè'èdi', bichi yugulu benè'.

**Ni rnèn quie ben' bzu di'idza' len  
ben' bibzu di'idza'**

(Mt. 24.45-51)

<sup>41</sup>Na'ra una Pedro rëbinè' Jesús: —¿Señor, unèlo' di'idza' ta nacan irupa iyunala para nètò'zi o chi unèlo'n lao dužetela?

<sup>42</sup>Na'ra una Jesús rëbinè' lèbè': —Rnia' di'idza' ta nacan irupa iyunala para nutezi ben' rioñe'e, para nutezi ben' ruzu di'idza' ca rna xa'nnè'. Lèben' na' hue xa'nnè' ladyina'anè' ta inè'è ben' nita' žan yu'u quienè' ta hue'nè' ta gaoyaquè' caora idyin hora gaoyaquè'. <sup>43</sup>Tahuen gula gaca quie ben' zu rapa yu'u quie xa'nnè', chi bè' yedyin xa'nnè' ilè'ènè' rzuguè'

di'idza' con can' gudyinè' xa'nnè' lèbè'. <sup>44</sup>Tali ca rnia', ben' naca xan' yu'u, hue'nè' ladyina'a yugulu ta de quienè' lao na'a ben' udapa yu'u quiè'. <sup>45</sup>Bizi chan' ben' zu rapa žan yu'u quie xa'nnè', chi racanè' pensari huadzè xa'nnè' biyedyinnežè', chi sulaonè' tilalènè' inèlènè' yaca ben' rue dyin žan yu'u quie xa'nnè', chi sulaocalanè' gaonè' yo'onè' xudyinè', <sup>46</sup>na'ra bè' yedyin xa'nnè' dza birbezè' yedyin xa'nnè', hualè'ènè' can' ruenè', huenè' lèbè' tu castigo huala gula, ise'elè' lèbè'ta tzionè' lado yaca los demàs ben' bibzu di'idza' quiè'.

<sup>47</sup>Nu ben' zu lao xa'nnè' nezinè' ca ta re'en xa'nnè' huenè', den' bibzunè' di'idza' huenè' ca gu'un xa'nnè', huata' castigo huala gula quienè'. <sup>48</sup>Pero nu ben' zu lao xa'nnè', pero binezinè' ca ta re'en xa'nnè' huenè', pues ba'ala'cazi reya'ala' gata' castigo quienè' cabè' bènè', pero dan' biunezinè' can' bènè', yubè'èzi castigo gata' quienè'. Nu ben' bè' Diuzi taže, lèlèbè' yenaba Diuzi yeyu'enè' tažera. Lèscan' nu ben' pca'n Diuzi tazè lao nè'è, lèlèbè' yenaba Diuzi ugedyinnè' tazèra lao nè'è.

**Una Jesús huaro yaca benè' chopacue'**

(Mt. 10.34-36)

Na' una Jesús:

<sup>49</sup>—Nè'èdi' bida' ta cuècha' ca quie gui' lao yedyi layu. Lena' re'entzegueda' ga'ala'n na'a. <sup>50</sup>Baza' dza gatia' lè'è yaga cruzo. Lega rutèbin nè'èdi' rbeza' bè' yeyudyi gatia'. <sup>51</sup>Na' rnia' le'e, çraquele bida' lao yedyi layu ta bira gata' zèdi

huedila quiele? Rnia' le'e, cala lena' bida', dechan' bida' ta iro chopa cue' yaca ben' nita' lao yedyi layu. <sup>52</sup>Ga sulaon na'a, ga sulaon quie dza zaza'ra. Huaca quie lao ga'yo' ben' nita' žan yu'u, huaroyaquë' chopacue'. Tzonayaquë' huaca condre quie chopayaquë'. Na' ichopayaquë' huaca condre quie tzonayaquë'. <sup>53</sup>Huaca xuzi žna' xcuidi' condre quie ži'iyaquë'. Na' huaca ži'iyaquë' condre quie xuzi žna'yacabi'. Huaca žna' be'mbyu condre quie žualidyinë'. Na' huaca žualidyinë' condre quie ben' gula quiebi'.

**Reya'ala' huero pensari cabë' raca quiero**

(Mt. 16.1-4; Mr. 8.11-13)

<sup>54</sup>Na'ra una Jesús rëbinë' yaca ben' nita' na':  
—Cati rlë'ële rasa beo ga reguin obidza, lena' inale huen nisayo, na'ra huen cabë' nale. <sup>55</sup>Lëzi cati rlë'ële baza' be tzala' ga reguin obidza, lena' inale huen žla, na'ra huen cabë' nale. <sup>56</sup>Le'e ben' rlidza Diuzi de di'idza' ladzazi, banezile huele pensari can' hue beo len can' hue be, žna' bixquien' binezile huele pensari can' raca quiele dza rdale lao yedyi layu?

**Reya'ala' yega'ntza'olëro ben' reya'ala'ro quie**

(Mt. 5.25-26)

Na' una Jesús:  
<sup>57</sup>—žBixquien' biracale pensari ca naca tali ca reya'ala' huele?  
<sup>58</sup>Chi zu tu ben' reya'ala'le quie, na' re'ennë' quizole quienë' uquië'në' le'e lao ben' napa dyin, ruen zi yega'ntza'ole laonë' tu neza tu

binedyinle lao ben' napa dyin. Chi baziolënenë' lao juez, hue juez mandado udze' policia le'e lu'u dyiguiba. <sup>59</sup>Na' rnia' le'e, gabi yerole hasta que quizole yugulute ca ta reya'ala'le.

**Nacan belao yetza'ro pensari quiero**

**13** Lëhora na' bdyin yaca benë' rëbiyaquë' Jesús can' bë Pilato bëtinë' chopa tzona ben' estado Galilea. Pquixinë' ren quieyaquë' len ren quie bia guixi' ta bdyiayaquë' lao becugo quie idao' rnabë'ra zu ciudad Jerusalén. <sup>2</sup>Na' una Jesús rëbinë' leyaquë':

—žCa biži pensari racale cabë' guca quie yaca ben' Galilea? žRaquele nacarayaquë' ben' bëra tamala quie, cala ca yaca ben' lao yedyi quiele? <sup>3</sup>Na'ra rnia' le'e, binacan can'. Na' le'e, chi biyetza'le pensari quiele inaole xneza Diuzi, biyezi' Diuzi le'e. <sup>4</sup>žCa biži pensari racale cabë' guca quie yaca chi'inu'betzona yaca ben' guti bdaco' torre Siloë leyaquë'? žRaquele nacarayaquë' ben' de dula' xquia quie, cala ca yaca los demás ben' nita' lao ciudad Jerusalén? <sup>5</sup>Lena' rnia' le'e, binacan can'. Na' le'e chi biyetza'le pensari quiele inaole xneza Diuzi, biyezi' Diuzi le'e.

**Unë Jesús tu di'idza' quie tu yaga higo bidyian tažixi**

<sup>6</sup>Na'ra una Jesús tu ejemplo ni:  
—Uzu tu be'mbyu zu tu yaga higo quienë' lao layela quienë'. Na'ra uzë'ë zioquë' tzena'në'n chi badyian higo, na' blë'ënë' ni tu higo bidyia lao yaga. <sup>7</sup>Na'ra una ben' zu yaga



higo quie, rëbinë' ben' rapa layela quië': "Una'cara, azio tzona iza rida' dena'a yaga higo ni chi dyian tažixi, pero ni tu higo binelë'ëda' cuialaonan. Mejorla ichugulo'n, ðbixquien' ru'eron lato zun layu niga, chi birbian higo?"<sup>8</sup> Na'ra una ben' rapa layela rëbinë' xa'nnë': "Señor, psan quien, biichuguron zazugaran itu iza na'a. Ta hua' cuëcha' tu pozo žannan tacuenda udyia'n bena.<sup>9</sup> Con ca hua' quien, a ver chi bicuian tažixi. Pero chi bicuian tažixi, na'tera ichuguron."

**Beyue Jesús tu nigula xcu'udzu bego dza huezila'adyi'**

<sup>10</sup>Uzu tu dza saodo, dza huezila'adyi' quieyaquë', uyu'u Jesús lu'u idao' sinagoga ga rsëdinë' yaca benë'.<sup>11</sup> Lëgan' na' zë tu nigula raca žhue'në'. Azio chi'inu'betzona iza uyu'unë' tu bichi be xi'ibi', na' beca'nnan lëbë' bego, bira guca yelinë'.<sup>12</sup> Biži cati blë'ë Jesús lëbë', na' gužinë' lëbë' unë' rëbinë' lëbë':  
—Nigula, hueyua' luë' ca naca yela' hue' yu'ulo'.

<sup>13</sup>Na'ra bda' na'anë' xcu'udzu nigula. Caora bda'në' në'ë nigula, labelitenë'. Na' uzulaonë' ruenë' Diuzi ben' že.

<sup>14</sup>Pero lega bdza' ben' napa dyin lu'u idao' sinagoga, dan' beyue Jesús ben' xcu'udzu bego dza huezila'adyi'. Na'ra unë ben' napa dyin lu'u idao' sinagoga rëbinë' yaca benë':

—Xopa dza nacan ta huero dyin. Lëdza na' reya'ala' guida ben' raca žhue' ta iyacayaquë', cala na'adza huezila'adyi'.

<sup>15</sup>Na'ra una Jesús rëbinë' lëbë':

—Luë' ben' rlidza Diuzi de di'idza' ladzazi, ðcala rxëdyo' huaga quio' o

burro quio' ta tzhua'alo'ba' yo'oba' nisa dza huezila'adyi'?<sup>16</sup> Na' nigula niga naquë' ži'li suba Abraham. Na' biži xan' taxi'ibi' Satanás nuquion lëbë' nuen bego xcu'udzunë' azio chi'inu'betzona iza. Na' biži luë', ðbixquien' nao' bireya'ala' yexëdya' tanuquio xan' taxi'ibi' nigula ni dza huezila'adyi'?

<sup>17</sup>Biži caora una Jesús can', bedue'tzegue yaca ben' rue condre lëbë'. Pero yaca los demás benë', lega redaohueyaquë' blë'ëyaquë' ca yela' huaca babë Jesús.

**Unë Jesús tu di'idza' quie bini mostaza**  
(Mt. 13.31-32; Mr. 4.30-32)

<sup>18</sup>Na'ra una Jesús rëbinë' yaca benë':

—¿Ca biži hua' ta yexi'idza' le'e ca naca ga rnabë' Diuzi? ¿Ca bi di'idza' re'ennan inia' le'e ta inezile dyë'ëdi?

<sup>19</sup>Nacan ca quie tu bini mostaza ta guza tu benë' lao layu quië'. Na' biži bini mostaza, la'acazi tu bini dao' bicu', pero gu'unin gucan tu yaga že gula. Na' bdyin yaca bia xila bëyacaba' lidyiba' lao taca'n.

**Unë Jesús tu di'idza' quie levadura**  
(Mt. 13.33)

<sup>20</sup>Lëscan' una Jesús rëbinë' leyaquë':  
—¿Ca bi di'idza' re'ennan inia' le'e ta inezile dyë'ëdi ca naca ga rnabë' Diuzi? <sup>21</sup>Nacan ca quie tu levadura ta rzi' nigula rla'adyi'në'n con tzona medida yezo. Conlë lena' rëžin duže cuba racan taže.

**Ga unë Jesús quie ru'a yu'u naca gui**  
(Mt. 7.13-14, 21-23)

<sup>22</sup>Na'ra uza' Jesús uyu'unë' neza tatula zionë' ciudad Jerusalén. Na'

ga rdyinnèl tu tu yedyi neza ciudad Jerusalén uzulaonèl rguixogue'nèl xti'idza' Diuzi. <sup>23</sup>Na'ra unaba tu benèl lèbèl rëbinèl lèbèl:

—Señor, ¿huezil Diuzi ben' zè yeyoyaquèl guibá o chi tu chopaziyaquèl'?

<sup>24</sup>Na'ra una Jesús rëbinèl lèbèl:

—Naca gui ru'a yu'u guibá.

Dula'adyil'le ulehue quiele tacuenda saque' tzu'u'le lëru'a yu'u naca gui. Rnia' le'e, ben' zè gula inita' gue'enyaguèl' tzu'u'yaquèl', pero bisaque'. <sup>25</sup>Caora bapsio ben' xan' yu'u na', biži le'e inita'le lali'a, na' ibiga'le ru'a yu'u, uxidyile ru'a yu'u, na' inale: “Señor, isalolo' ru'a yu'u niga.” Na' biži ben' xan' yu'u inènèl lu'u yu'ute yëbinèl' le'e: “Binubèl'da' nu le'e.” <sup>26</sup>Na'ra le'e inale yëbile ben' xan' yu'u: “Aodaolëndo' luèl, bahue'elëndo' luèl tuzi. Lëzi psëdio' yaca benèl' yedyi quiendo' xti'idza' Diuzi.” <sup>27</sup>Na'ra inè ben' xan' yu'u yëbinèl' le'e: “Baonia' le'e, binubèl'da' le'e. Uleyo bira huele nè'èdi' zëdi, le'e ben' mala.” <sup>28</sup>Quie lena' cuedyile zil'laza gula gao leile caora ilè'ële Abraham, len Isaac, len Jacob, len yaca los demás ben' udixogue' xti'idza' Diuzi dza na'la anita'yaquèl' guibá, na' biži le'e, naca bayëchi' quiele inita'le lali'a. <sup>29</sup>Rnia' le'e, huida yaca ben' uza' lao duže yedyi layu yegu'udi'yaquèl' guibá ta cue'yaquèl' lao mesa quie Diuzi ta gaoyaquèl'. <sup>30</sup>Bala ben' nita' lao yedyi layu niga, binacajè' ben' že, pero huacajè' ben' že dza yedyinjè' ga zu Diuzi. Lëscan' bala ben' naca ben' že lao yedyi layu niga, bira nacajè' ben' že dza yedyinjè' ga zu Diuzi.

**Uredyi Jesús cabèl' bè yaca ben' nita' ciudad Jerusalén**

(Mt. 23.37-39)

<sup>31</sup>Lédza na' bdyin yaca ben' partido fariseo gudyiyaquèl' Jesús: —Uza' uyo ga tula, dan' re'len rey Herodes gutinèl' luèl.

<sup>32</sup>Na' una Jesús rëbinèl' leyaquèl':

—Uleyo uletzeguèdyi lëben' mañoso ca rnia' le'e, nia': “Itu chopa tzona dza sua' yebioga' bichi be xi'ibi' yu'u yaca benèl', yeyueria' yaca ben' raca žhue'. Na' baruen bago dza iyudyi hua' dyin quia'.” <sup>33</sup>Pero decazide hua' dyin cabèl' dyin nangun Diuzi hua'. Nerdziogue itu chopa tzona dza ga idyintia' ciudad Jerusalén como dan' lëciudad na' nacan ciudad ga rutiyaquèl' ben' rguixogue' xti'idza' Diuzi.

<sup>34</sup>Le'e ben' ciudad Jerusalén, rutilè yaca ben' za' rguixogue' xti'idza' Diuzi. Lëzi le'e ben' ciudad Jerusalén, rguile yo yaca ben' use'ela' Diuzi laole. Zè lasa gu'unda' gapa' le'e cabèl' rue nu biu bena', rapaba' ži'iba', rguèdyiba' ži'iba' žan xilaba'. Pero na' le'e, bigu'unle. <sup>35</sup>Lena' apsanla'adyil' Diuzi le'e. Na'ra rnia' le'e, ibaba dza bira ilè'ële nè'èdi'. Hasta quie idyin dza yëbile nè'èdi': “Ben' naca la'iya luèl, ben' use'ela' Diuzi, na'tera ilè'ële nè'èdi' tatula.”

**Beyue Jesús tu ben' yu'u gui**

**14** Biži bezu dza tula, dza huezila'adyil'. Caora na' zio Jesús ta gaohuè' žan yu'u quie ben' napa dyin, ben' naca partido fariseo. Na'ra rbè'nao yaca ben'

laguedyinè' chi bi hue Jesús dza huezila'adyi'. <sup>2</sup>Na' lëgan' na' zë tu ben' yu'u yela' hue' gui. <sup>3</sup>Na'ra una Jesús rëbinè' yaca ben' rusëdi ley quie Moisés, len yaca ben' naca partido fariseo:

—¿Biži na lao ley? ¿Ru'len lato yeyua' ben' raca žhue' dza huezila'adyi'?

<sup>4</sup>Caora na' bega'nyaquë' chizi, bira unëyaquë'. Na'ra bëxunè' na'a ben' yu'u gui, beyuenè' lëbè'. Ude na' una Jesús gudyinè' ben' beyuenè': "Aoca, beyo." <sup>5</sup>Na' una Jesús gudyinè' ben' partido fariseo:

—Chi nu le'e rguino burro o huaga quiele lu'u barranca, ba'ala'cazi nacan dza huezila'adyi', ¿quiele huayole tzalioleba'?

<sup>6</sup>Na'ra bira ubinyaquë' bi yëbiyaquë' lëbè'.

#### Ga unë Jesús quie ben' rue lani

<sup>7</sup>Bè' blë'è Jesús ca rue yaca ben' bdyin ga zë'è, blë'ënè' rsereyaquë' ga cue'yaquë' re'enyacuë' cue'yaquë' ga cue' ben' bala'anara. <sup>8</sup>Na' unè' rëbinè' leyaquë' tu di'idza':

—Cati ziole ga raca huetzagana', bicue'le ga rbe' ben' bala'anara. Biži chan' zaza'ra ben' nacara belao cue'nè' gan' re'lo' na'. <sup>9</sup>Biži bare'lo' ga rbe' ben' bala'anara, na' inè' ben' rue lani yëbinè' luè': "Uzuli, bè' lato cue' ben' niga gan' bare'lo'." Cati inanè' luè' cana', cana' yedue'lo' yeyolo' tzare'lo' xcu'udzula. <sup>10</sup>Na' ca ta reya'ala' huele cati tziole lani, cue'le xcu'udzutela. Na'ra cati ilë'è ben' rue lani re'lo' xcu'udzutela, na'ra inè' luè': "Amigo, ude nila cue'lo' ga rbe' ben' bala'anara." Cana' gaca bala'ana quiele len yaca

ben' bare' lao mesa. <sup>11</sup>Na' rnia' le'e, nu ben' rue že cuine, huadyin dza hue Diuzi lëbè' ben' yube'ezi. Na' biži nu ben' rue yube'ezi cuine, huadyin dza hue Diuzi lëbè' ben' že. —Cana' una Jesús rëbinè' leyaquë'.

<sup>12</sup>Lëzi unërë Jesús rëbinè' ben' rue lani:

—Cati huelo' lani biguëzo' ben' naca amigo quio', ni bi' bicho', ni xuzi žnao', nica ben' uña'a, como dan' huadyin dza yeyueyaquë' laohue quio', gunrëyaquë' ta gaolo'. Conlë lëzin yeyuen laohue quio'. <sup>13</sup>Na' ca ta reya'ala' huelo' cati huelo' lani, reya'ala' guëzo' yaca ben' yëchi', len yaca ben' ca guicho ca lao, len yaca ben' ži, len yaca ben' laochula. <sup>14</sup>Chi huelo' cana', cana' gata' tahuen gulara quio' yedaohuelo' bè' idyin dza useban Diuzi ben' bë quie xti'idza'nè'. Huata' tadya'a quio' lao Diuzi dan' bè'lo' ta udao yaca ben' raca bayëchi' quie, ba'ala'cazi bide dumi ta quižoyaquë'n ni ta yeyueyaquë' laohue quio'.

#### Ga unë Jesús tu di'idza' quie ben' rëzi ben' gao yaca

<sup>15</sup>Biži bè' be tu ben' re' lao mesa cabè' una Jesús, na'ra unè':

—Lega gaca huen quie ben' gao yela' huao ga zu Diuzi r nabè'nè'.

<sup>16</sup>Na'ra una Jesús rëbinè' lëbè':

—Uzu tu be'mbyu dza na', bè'nè' laze ta gao yaca ben' zë, ben' guëžinè'. <sup>17</sup>Bè' beyudyi bapcuezè' ta gao yaca benè' guëžinè', na' use'ela'nè' criado quienè' unè' rëbinè' lëbè': "Uyo, yexi' yaca ben' guida gao yaca. Banaca laze ta gaoyaquë'." <sup>18</sup>Biži yaca ben'

rëžinë' ta gao, unabayaquë' ta yezi'ženë' quieyaquë'. Na'ra ben' nëro unë' gudyinë' criado quie ben' na': "Zabeyudyi hua'a tu layu. Len re'enda' tzena'a. Ta nacan' nia' luë' yëbo'në' yezi'ženë' quia'." <sup>19</sup>Na' unë ben' urupe rëbinë' ben' zio tzexi' lëbë': "Baožia' ga'yo' pare bëdyihuaga. Lëba' tza'lia' hua'ba' prueba. Lena' nia' bisaque' sa'a, yezi'ženë' quia'." <sup>20</sup>Na' una ben' uyune rëbinë' ben' zio tzexi' lëbë': "Zabeyudyi ptzagana'a. Yela' na' bisaque' sa'a." <sup>21</sup>Biži bë' bedyin criado, na' udixogue'në' xa'nnë' cabë' gudyi yaca benë' lëbë'. Na'ra bdza'tzegue xa'nnë' unë' rëbinë' criado quië': "Uyo yena' la'o yedyi, yexi' yaca ben' yëchi', len yaca ben' ca guicho ca lao, len yaca ben' ži, len yaca ben' laochula." <sup>22</sup>Na'ra bedyin criado quie ben' na' unë' rëbinë' lëbë': "Señor, babia' ca mandado bao'. Pero nerunnan lato guidara benë'." <sup>23</sup>Na'ra una xa'nnë' tatula rëbinë' lëbë': "Uyo yena' la'o yedyi du tu neza. Bë bala iquië'lo'yaquë' cuenda yedza' yaca benë' lu'u yu'u quia'. <sup>24</sup>Yela' na' rnia', ni tu yaca ben' baguža' tanëro, ben' bibida gao quia', bira de lato gaoyaquë' ta pcueza'."

#### Ruen zi inaoro xneza Cristo

<sup>25</sup>Ben' zë gula zenaoyaquë' Jesús. Na'ra unë' rëbinë' leyaquë':

<sup>26</sup>—Chi nu ben' re'en inao në'ëdi', ruen zi idyë'ëranë' në'ëdi' cala ca xuzë', ca žnë'ë, ca žgulanë', ca ži'inë', ca bi' bichinë', ca bi' zannë', cala ca yela' neban quienë'. Chi binedyë'ëranë' në'ëdi' cala ca familia quienë', ca yela' neban

quienë', bisaque' gacanë' ben' quia'. <sup>27</sup>Nu ben' rdzebi inao xneza' nun quie ruen žudyi guti benë' lëbë', bisaque' gacanë' ben' quia'. <sup>28</sup>Chi le'le re'enle huele tu yu'u žcala reya'ala' huele pensari usaque'le chi huaque dumi quiele ta useyudyile yu'u? <sup>29</sup>Chi tu ben' uzulaohue rcua'në' lu'u yu barbëchinë' xnila besu, na' biži chi biguque dumi quienë' ta useyudyinë' yu'u, na' yaca ben' ilë'ë, utituyaquë' užidyiyaquë' lëbë'. <sup>30</sup>Na' inayaquë' quienë': "Ben' niga aozulaonë' ruenë' yu'u quienë', na' biguque dumi quienë' ta useyudyinë'n." <sup>31</sup>Chi zu tu rey, na' zu itu rey re'ennë' tilalënë' lëbë'. Na' napë' chi mila soldado. Na' biži itu rey napë' galo mila soldado quienë'. Caora cati baza' tilarëyaquë', žcala reya'ala' huenë' pensari chi huaque chi mila soldado quienë' ta tilalënë' ben' napa galo mila soldado? <sup>32</sup>Chi bapsaquenë' bisuenë' tilalënë' itu rey, na'ra tu nezu itu rey zitu', reya'ala' ise'ela'në' tu ben' tzio lao lazë' ta tzeguedyinë' itu rey ta yega'ntza'oyaquë' bitilayaquë'. <sup>33</sup>Lena' unia' le'le ta inezile nuti'tezile re'enle inaole në'ëdi', chi bisule puesto ta usanle yugulu ta de quiele inaole në'ëdi', bisaque' gacale ben' quia'.

#### Ga ru'en di'idza' quie zedi' bira nacan sna'a

(Mt. 5.13; Mr. 9.50)

Na' una Jesús:

<sup>34</sup>—De ga hue zedi'dyin chi nacan sna'a. Pero chi bira nacan sna'a, žca biži huero ta iyacan sna'a? <sup>35</sup>Bibi dyin huena, ni para quie layu, ni

para bena. Nacan ta chu'unro. Nule babe, ulezënaga cabè' baonia'.

**Unë Jesús tu ejemplo quie tu beco' ži'ila' bia uniti**

(Mt. 18.10-14)

**15** Biži yaca ben' zè, ben' huequižu len yaca ben' nao neza mala, begu'udi'yaquè' zè lasa gan' zè Jesús ta uzëmagayaquè' cabè' unè'. <sup>2</sup>Na' biži yaca ben' partido fariseo, len yaca ben' rusèdi ley quie Moisés, rtzaloyaquè' can' rue Jesús, unayaquè' rëbiyaquè' laguediyayaquè':

—Ben' niga rezi'nè' yaca ben' nao neza mala, raolënè' leyaquè' tzaže.

<sup>3</sup>Na' tu di'idza' ni una Jesús rëbinè' leyaquè':

<sup>4</sup>—Chi zu tu gayuhua beco' ži'ila' quiele, na' aoniti tuba', òcala uca'nle yaca bia biuniti ga nita'yacaba' dya'a? ¿Cala huayole tzedilole itu bia neniti hasta que yedzeleleba'?

<sup>5</sup>Bè' yedzeleleba' òcala lega yedaohuele huezi'leba' yequiè'leba' žan yu'u? <sup>6</sup>Na' bè' bedyinle žan yu'u quiele òcala guèžile yaca ben' naca amigo quiele? ¿Cala yëbilyaquè': “Huero lani, dan' babedzeleda' beco' ži'ila' quia', bia uniti”? <sup>7</sup>Lena' rnia' le'e, cabè' guca quie xan' beco' ži'ila', cana' nacaré quie Diuzi. Yedaohueranè' quie tu ben' betza' pensari quie, ben' unao neza mala, na' inaonè' xneza Diuzi, cala ca yaca ben' zè, yaca ben' ziocazi nao xnezè'.

**Unë Jesús tu di'idza' quie tu dumi ta uniti**

Na' itu di'idza' ni una Jesús rëbinè' leyaquè':

<sup>8</sup>—Lëzi rnia' le'e, chi zu tu nigula de chi dumi plata quie', na' bëxo tun, òcala uga'ala'nè' lámpara quie', ulubanè' lu'u yu'u quienè' dyè'èdi, yeguilonè'n hasta que yedzelenè'n?

<sup>9</sup>Na' biži bè' bedzelenè'n, lega bedaohuenè'. Na' guèžinè'yaca amiga quienè' inè' yëbinè' leyaquè': “Huero tu lani, dan' babedzeleda' dumi quia' ta uniti.” <sup>10</sup>Lëzi rnia' le'e, can' guca bedaohue nigula, cana' yedaohuerè yaca ángel quie Diuzi cati yetza' pensari quie tu ben' unao neza mala, na' inaonè' xneza Diuzi.

**Unë Jesús tu di'idza' quie tu ben' uzu chopa ži'inè' byu**

<sup>11</sup>Lëscan' una Jesús rëbinè' leyaquè':

—Uzu tu be'mbyu uzu chopa ži'inè' byu. <sup>12</sup>Na' biži ži'inè' byu, bi' nëchi'la, unabi' rëbibi' xuzibi': “Xuza', òbigunlo' në'èdi' ta redu'uleda' si'a? Na'ra xuzibi' bè'nè' laze, bè'nè'bi' ta redu'ulebi' si'bi'.

<sup>13</sup>Biži guca tu chopa tzona dza, ptupa ži'inè' nëchi' ta de quiebi' bi'abi' yuguluten. Na' uza'bi' ziobi' yedyi re' zitu' ga beditobi' dumi quiebi' uyu'ubi' pensari mala ca bëbi'. <sup>14</sup>Pero bè' beditobi' yugulu ta de quiebi', na' bdyin dza guca tu ubin huala gula yedyi na'. Bira guta' ta gaobi', na' lega uduebi'. <sup>15</sup>Na'ra uza'bi' ziobi' tzetilobi' bi dyin huebi' lao tu ben' zu lao yedyi gan' bdyimbi'. Na' biži ben' na' use'ela'nè'bi' ga de layu quienè' ta gapabi' cuchi quienè'. <sup>16</sup>Tanto uduebi' gu'umbi' gaobi' ca ta bë'yaquè' yaca cuchi ta gaoba'. Pero na' lëbi' nunu bè' ta gaobi'. <sup>17</sup>Na'ra

gucabi' pensari: "iNacala ben' zë rueyaquë' dyin žan yu'u quie zuza', birdziogueyaquë' ta gaoyaquë'! iNa' niga nê'ëdi' ruda'a huatia' yela' rdue quia'! <sup>18</sup>Yeza'cala' yeya'a žan yu'u quie zuza' ta yëpa'nê': Xuza', uži'že quia'. Baoquixa' lao Diuzi. Baoquixa' laolo'. <sup>19</sup>Bira bizaca' inao' nê'ëdi' naca' ži'ilo'. Bë nê'ëdi' cuenda ca nu ben' rue dyin quio'." <sup>20</sup>Na'ra beza'bi' beyu'ubi' neza zeyobi' žan yu'u quie xuzibi'. 'Nezeza'bi' tu neza zitu' caora blë'ë xuzibi' bazeza'bi'. Na' beyëchi'la'adyi'nê' lëbi' zionë' udëdyinë'bi' udaonë'bi' situ xagabi'. <sup>21</sup>Na' biži una bi'byu na' rëbibi' xuzibi': "Xuza', uži'že quia'. Baoquixa' lao Diuzi. Baoquixa' laolo'." <sup>22</sup>Na' biži una xuzibi' rëbinë' yaca bi' criado quië': "Uletzio cuiole tu cue' la'ari' dya'ara ta ugacolebi'. Lëzi uletzexi' tu anillo ta udze'le žbebi' len itu cue' guidi ta udze'le ni'abi'. <sup>23</sup>Lëzi uletzio tzexi'le tu bëdyihuaga, bia nacara nu'unu, bia gutiro gaoro ta huero lani. <sup>24</sup>Cana' huero como dan' ži'ina' niga anaca quiebi' ca quie tu ben' baguti beban. Aonitibi', pero na' babelabi' bazulëbi' ra'o niga." Na' uzulaoyaquë' rueyaquë' lani. <sup>25</sup>Na' biži ži'inë' bi' huaca, nega'mbi' layela. Bë' beza'bi' layela bedyimbi' bago gan' zu yu'u, bebi' rgüedyi raca hueya'a. <sup>26</sup>Na'ra gužibi' tu criado quie xuzibi' unababi' lëbi' bi guca žan yu'u. <sup>27</sup>Na' una bi' criado rëbibi' lëbi': "Babela' bi' bicho'. Na' bë xuzo' mandado babëtiyaquë' tu bëdyihuaga nu'unu, dan' babelabi' bicho' dya'a, bibi guca quiebi'."

<sup>28</sup>Na' biži bi' bichibi' huaca, lega rdza'bi' bire'embu' yeyu'ubi' lu'u yu'u. Lena' bro xuzibi' unabanë' cule laobi' ta yeyu'ubi' lu'u yu'u. <sup>29</sup>Na'ra una bi' bichibi' huaca rëbibi' xuzibi': "Luë' nezo' dyë'ëdi gula azio zë iza zua' rua' dyin quio'. Bireguitzoga' di'idza' quio'. Ni tu lasa bibenlo' nê'ëdi' ni tu chivo ta gutia' hua' lani gaolia' yaca bi' amigo quia'. <sup>30</sup>Na' ži'ilo' niga, babelabi' tatula. Baoyobi' beditobi' dumi babë'lo'bi' conlë yaca nigula mala. Na' luë' babetio' bëdyihuaga nu'unu ta gaole huele lani." <sup>31</sup>Na'ra una xuzibi' rëbinë'bi': "Ži'ina', zucazo' ni len nê'ëdi' yugu dza. Tana' lena' yugulu ta de quia' nacacazin quio'. <sup>32</sup>Pero nacacazin huen huero lani yedaohuero, dan' babelabi' bicho'. Naca quiebi' ca quie ben' baguti beban. Aonitibi' belabi' bazulëbi' ra'o tatula." — Cana' una Jesús gudyinë' leyaquë'.

Unë Jesús tu di'idza' quie  
tu ben' guca ladyinë'ë quie  
xa'ne, bëguë' tamala

**16** Lëzi cani una Jesús rëbinë' yaca ben' quienë':  
—Uzu tu ben' uña'a zu tu ben' nu'enë' ladyina'anë' ta de quienë'. Na' biži una yaca benë' unayaquë' rëbiyaquë' lëbë': "Ben' nu'elo' ladyinë'ë ta de quio', lega rueditoguë' ta de quio'." <sup>2</sup>Na'ra ben' naca xa'nnë' gužinë' lëbë' yëbinë' lëbë': "¿Biži bëlo' conlë ta de quia' de que na yaca benë' rueditolo' ta de quia'? Besio cuenda quie dyin babao', dan' bira re'enda' gaca ladyinao' ta de quia'." <sup>3</sup>Na' biži ben' naca ladyinë'ë ta de quie xa'ne, na'

guquë' pensari: "¿Ca biži hua' chi yeguba xa'na' xchina'? Biraca' hua' dyin guixi'. Lëzi rehue'da' ta'a tu tu yu'u inaba' ta gaohua'. <sup>4</sup>Na'a banezda' ca hua' cuenda inita' ben' gacalë në'ëdi' cati babeguba xa'na' xchina'." <sup>5</sup>Na'ra gužinë' tu huio yaca ben' reya'ala' quie xa'nnë'. Na'ra unabë' ben' nëro rëbinë' lëbë: "¿Gaca tu reya'alo' quie ben' xa'na'?" <sup>6</sup>Na'ra bequëbinë' unë: "Reya'ala' tu gayuhua frasco aceite." Na' una ben' naca ladyinë'ë rëbinë' lëbë: "Ni zia' guichi nexubo' lao xa'na'. Caga na'a ure' bë itu guichi de gatzo gayuhuazi." <sup>7</sup>Biži na' unë' rëbinë' ben' urupe: "Na' luë', ¿gacaži reya'alo' quie xa'na'?" Na'ra una ben' na': "Reya'ala' tu gayuhua bolsa bini trigo." Na'ra unë' rëbinë' lëbë: "Ni zia' guichi nexubo' lao xa'na'. Caga na'a bë itu guichi de tapa galoz." <sup>8</sup>Na' biži xan' ben' na', bezaquenë' ca bë ben' bë'në' ladyinë'ë, naquë' listo ta si'në' benë' yë'.

Na' una Jesús rëbinë' yaca ben' quienë':

—Lëcana' nacan quie yaca ben' rda birnao xneza Diuzi, lega rzebila'adyi'yaquë' nacayaquë' listo ta si'yaquë' benë' yë', cala ca yaca ben' rda rnao xneza Diuzi.

<sup>9</sup>¿Cabiži re'enle inia' le'e quie ben' guca ladyinë'ë? ¿Re'enle inia' le'e huele ca lëbë' si'le ben' yë' cuenda gata' dumi quiele hue'len yaca ben' re'enle gaca amigo quiele? ¿Re'enle inia' le'e cana' huele tacuenda gacalë amigo quiele le'e ta yezi' Diuzi le'e sulëlenë' tuzioli'?

<sup>10</sup>'Bigaca inia' le'e can', como dan' chi nu ben' rapa dyë'ëdi

tadao' lë'ëti' nu'e xa'nnë' lëbë', lena' ulu'ena quienë' gaparë' dyë'ëdi tazëra hue' xa'nnë' lëbë'. <sup>11</sup>Lëzi chi le'e ziole rueditole con ganzi ta de quiele lao yedyi layu niga, ¿cómo na'a gue'enrële gun Diuzi le'e ta de quienë' guibá'?

<sup>12</sup>'Chi le'e biziole gapale dyë'ëdi ta de quie ben' tula, ¿bixquien' raquele gun Diuzi ta gata' quiecazile? <sup>13</sup>Nu ben' rue dyin lao xa'ne, bisaque' uzunë' chopaxa'nnë'. Huata' zëdi quië' quie lao rupa yaca ben' xa'nnë'. Tuë' huatzaxenë', na' ituë' bitzaxenë'. Tuë' biuzunë' di'idza' quië', na' ituë' uzunë' di'idza' quië'. Chi rza'la'adyi'le dumi, bisaque' huele dyin quie Diuzi. —Cana' una Jesús gudyinë' leyaquë'.

<sup>14</sup>Biži yaca ben' naca partido fariseo, unita'yaquë' rzënegayaquë' can' una Jesús quie dumi. Dan' lega rexeyaquë' gata' dumi quieyaquë', tana' lena' uzulaoyaquë' rrituyaquë' lëbë'. <sup>15</sup>Na'ra una Jesús rëbinë' leyaquë':

—Le'e, lega re'enle ilë'ë yaca benë' le'e ben' huen. Pero nezi Diuzi ca naca pensari mala yu'u lu'u guicho laxta'ole. Rapa yaca benë' le'e bala'ana, pero Diuzi ratzanë' ca ruele.

### Ga rnën quie ley len quie yela' r nabë' quie Diuzi

Na' una Jesús:

<sup>16</sup>—Hasta dza uzu Juan lao yedyi layu unabë' ley quie Moisés len di'idza' ca una yaca ben' profeta. Desde lëdza na' rguixogue' yaca benë' de que baza' dza inabë' Diuzi lao yedyi layu. Lëcana' baregu'udi'

yaca ben' zè, yaca ben' re'en hue bala inabè' Diuzi leyaquè'.

<sup>17</sup> Pero ca naca quie lao ley, nacaran yalo yeyudyi yedu quie guibá len yedyi layu, cala ca biuzun di'idza' ca rnan lè'è guichi ga yu'u ley quie Diuzi.

### Unè Jesús quie ben' rsan laguedyi

(Mt. 19.1-12; Mr. 10.1-12)

Na' una Jesús:

<sup>18</sup>—Chi tu be'mbyu bapsannè' nigula zulènè', na' bezi'nè' nigula tula, aoquixinè' nacan xquia quienè' lao Diuzi. Na' lèzi, chi tu be'mbyu bezi'nè' nigula psan xquiuhue, aoquixinè' nacan xquia quienè' lao Diuzi.

### Ga una Jesús quie tu ben' uña'a len tu ben' yèchi' lao Lázaro

Na' una Jesús:

<sup>19</sup>—Lèscan' inia' le'e, uzu tu ben' uña'a guconè' la'ari' dya'a, la'ari' baquitu. Na' biži ruenè' lani yugu dza, udaonè' tadya'a gula. <sup>20</sup>Lèscan' uzu tu ben' yèchi' gula laonè' Lázaro. Lega dyianè' yedzo' zidzo. Na' rbe'nè' layu ru'a yu'u quie ben' uña'a yugu dza. <sup>21</sup>Biži ben' yèchi' rbezè' rnè'è chi hue' ben' uña'a lè'èti' ta began' udaohuè'. Na' yaca beco' ubiga'yacaba' rlè'èyacaba' yedzo' dyianè'. <sup>22</sup>Biži bdyin dza guti Lázaro. Na'ra bequie' yaca ángel lèbè' ta sunè' guibá gan' zu Abraham. Na' lèzi ben' uña'a gutinè' pcachi'yaquè' lèbè' lu'u yu. <sup>23</sup>Na'ra uyu'unè' lu'u gui' gabila ga redzagalaohuè'. Cati bechisa laonè' rnè'è zitu' ga zu Abraham len Lázaro. <sup>24</sup>Na'ra uredyiya'nè' zidzo unè': "Xuzza' Abraham, beyèchi'la'adyi' nè'èdi', use'ela' Lázaro ula'onè' žbenè' nisa

ta guidè' dedze'nè'n lu'u ru'a yeya'ala' lè'èti' gan' yu'a niga, porque lega tahuala redzagalaohua' gan' yu'a lagui' niga." <sup>25</sup>Na'ra una Abraham gudyinè' lèbè': "Ži'ina', beza'la'adyi' guca dya'a gula quio' dza uzulo' lao yedyi layu. Na' biži Lázaro niga, biguca dya'a quienè'. Lena' rezila'adyi'nè' zunè' niga len nè'èdi'. Na' luè' redzagalaolo' gan' yu'ulo'. <sup>26</sup>Lèzi zu tu barranca ga nita'ndo' niga. Na' bisaque' guidando' ga zulo'. Lèzi luè' bisaque' guido' niga." <sup>27</sup>Na'ra unè ben' uña'a rëbinè' Abraham: "Rnabayècha' laolo', xuzza' Abraham, ta ise'elo' Lázaro žan yu'u quie xuzza' <sup>28</sup>gan' nita' ga'yo' bi' bicha' ta yëbinè' leyacabi' can' raca quia' niga tacuenda biguidayacabi' gan' yu'a niga redzagalohua'." <sup>29</sup>Na'ra una Abraham rëbinè' lèbè': "Decazi guichi ga yu'u xti'idza' Diuzi ta pca'nnè' lao na'a Moisés len yaca los demás ben' udixogue' xti'idzè'. Lena' reya'ala' hueyaquè' bala ulabayaquè'n." <sup>30</sup>Na'ra unè ben' na' rëbinè' Abraham: "Nacan tali ca nao', xuzza' Abraham, pero chi tzio tu ben' baguti beban tzetixogue'nè' leyacabi', cana' yetza'yacabi' pensari quieyacabi'." <sup>31</sup>Na'ra una Abraham rëbinè' lèbè': "Chi bihueyacabi' bala cabè' di'idza' yu'u lè'è guichi la'iya quie Diuzi ta pca'nnè' lao na'a Moisés, len yaca los demás ben' udixogue' xti'idzè', nica yetza'yacabi' pensari quieyacabi' ba'ala'cazi tzio tu ben' baguti beban tzetixogue'nè' leyacabi'."

### Ruen žudyi gula quie ben' udze'yela laguedyi

(Mt. 18.6-7, 21-22; Mr. 9.42)

**17** Na' una Jesús rëbinè' yaca ben' quie':



—Birdziogue nu ben' udze'yela laguedyi ta inën leyaquë' hueyaquë' tamala. Pero hue Diuzi tu castigo huala gula quie ben' udze'yela laguedyi. <sup>2</sup>Quie nu ben' rudze'yela xcuidi', huacaran huen quienë' chi uquiyoaquë' tu yo že luba'në', na' uzalayaquë' lëbë' lu'u yao že gatinë' lu'u nisa, cala ca castigo hue Diuzi lëbë'. <sup>3</sup>Ulegapa cuidado cabë' ruele.

<sup>4</sup>Uletila bi' bichile chan' uquixibi' bëbi' condre le'e. Na' chi betza'bi' pensari quiebi', ulezi'že quiebi'.

<sup>4</sup>Ba'ala'cazi baoquixibi' babëbi' condre le'e gadyi lasa lao tu dza, ba'ala'cazi gadyi lasa bidabi' unabi' le'e: “Uži'že quia', bira hua' cana'”, ulezi'že quiebi'.

**Ruen yaca ben' quie Jesús zi sudyi'ilëyaquë' Diuzi dyë'ëdi**

<sup>5</sup>Na' una yaca ben' quie Jesús rëbiyaquë' lëbë':

—Gacalao' nëto' ta sudyi'ilëndo' Diuzi dyë'ëdi.

<sup>6</sup>Na' una Jesús rëbinë' leyaquë': —Chi tali sudyi'ilële Diuzi, la'acazi lë'ëti'zi, huazaque' yëbile tu yaga: “Uza', uyo yetzu'u lu'u yao že”, na' yaga hualen quiele cabë' yëbilen.

**Ga ru'en di'idza' ca reya'ala' hue ben' nao xneza Diuzi**

Na' una Jesús:

<sup>7</sup>—Chi zu tu ben' rue dyin žan yu'u quiele ¿cala tanëro reya'ala' usiña'në' ta gaole, te na' huazaque' gaorënë', ba'ala'cazi babënë' dyin bedu dza? <sup>8</sup>¿Cala tali na' yëbilyaquë': “Psiña' ta gaohua', te aodaohua' bahu'a, natera huazaque' gaolo' yo'olo'”? <sup>9</sup>¿Cala tali na' biyëbile ben' rue dyin žan

yu'u quiele: “Diuxcalele babële ca ta re'enda' huele”, como dan' ca ta reya'ala' huecaziyaquë' bëyaquë'? <sup>10</sup>Lëscan' cana' nacarën quie le'e. Caora babeyudyi babële yugulu ca una Diuzi le'e, na'tera reya'ala' yëbile Diuzi: “Nacando' ben' bibi zaca'te inao' nëto' diuxcalele, como dan' ca ta reya'ala'cazi huendo' bëndo'.” —Cana' una Jesús gudyinë' leyaquë'.

<sup>11</sup>Na' uza' Jesús uyu'unë' neza ta zionë' ciudad Jerusalén udenë' lao beza' estado Galilea ga sulao estado Samaria. <sup>12</sup>Bë' bdyinnë' gan' de tu yedyi, lëgan' na' bro chi ben' yu'u yela' hue' ca mal de pindo. Bega'nyaquë' zitu' con gan' zë Jesús. <sup>13</sup>Na' urediyi'yaquë' zidzo rëbiyaquë' lëbë':

—iJesús, Maestro, yeyëchi'la'adyo' nëto' ca nacando'!

<sup>14</sup>Cati blëë Jesús leyaquë' cabë' nacayaquë', unë' rëbinë' leyaquë':

—Uletzio uletzelu'e cuinle lao pxuzi.

Caora na' uza'yaquë' zioyaquë'. Biži tu neza gan' zioyaquë' beži yela' hue' yu'uyaquë'. <sup>15</sup>Na'ra bë' blëë tunë' babežinë' ca naca yela' hue' yu'unë', na' bebi'në' zeyonë' gan' zë Jesús unënë' zidzo ruënë' Diuzi ben' že. <sup>16</sup>Na' ure'në' udituz žibinë' lao Jesús, bda'te laohue layu ta rëbinë' Jesús: “Diuxcalelo'.” Lëben' na' naquë' ben' estado Samaria. <sup>17</sup>Na'ra una Jesús rëbinë' lëbë':

—¿Cala chi le'e beyaca? ¿Ganaži iga yaca ben' beyacarë? <sup>18</sup>Lëben' niga, ben' binaca ben' Israel, žtuzi lëbë' bebi'në' zeza'në' niga ta ruënë' Diuzi ben' že?

<sup>19</sup>Na'ra una Jesús rēbinē' lēbē':  
—Bezuli, beyo. Dan' rzudyi'ilēlo'  
Diuzi, lena' babeži yela' hue' yu'ulo'.

**Udixogue' Jesús ca gaca bē' yeguidē'  
tatula lao yedyi layu**

(Mt. 24.23-28, 36-41)

<sup>20</sup>Na' bdyin tu dza una yaca ben'  
partido fariseo rēbiyaquē' Jesús:  
—¿Bata sulao inabē' Diuzi lao  
yedyi layu?

Na' una Jesús rēbinē' leyaquē':  
—Bide bi ilē'ēle cati sulao inabē'  
Diuzi lao yedyi layu. <sup>21</sup>Bisaque'  
yēbile benē': “Barnabē' Diuzi yedyi  
ni' o “Barnabē' Diuzi yedyi na'”  
como dan' pensari yu'u lu'u guicho  
laxta'ole, lena' inabē' Diuzi.

<sup>22</sup>Na' bezu dza tula una Jesús  
rēbinē' yaca ben' quienē':  
—Huadyin dza cati gue'enle  
sulia' le'e siquiera itu dzazi, pero  
bisaque'. <sup>23</sup>Lēdza na' ina yaca benē'  
le'e: “Bazunē' ni” o “Bazunē' na'”  
na' bigalele quieyaquē'. Bitzirole  
inaole leyaquē' ga tzioyaquē'.  
<sup>24</sup>Cabē' rlē'ēle quie bdyito hueziu'  
ratzo rtinan žan guibá, cana'  
ilē'ēle nē'ēdi', bichi yugulu benē',  
cati idyin dza yeguida' lao yedyi  
layu. <sup>25</sup>Pero ca naca na'a, ruen  
zi yedzagalaotzaguia' usebi' yaca  
ben' nita' na'a nē'ēdi'. <sup>26</sup>Cabē' bē  
yaca ben' unita' lao yedyi layu  
tiempote caora uzu Noé, cana'  
huerē yaca ben' inita' lao yedyi  
layu caora yeguida' tatula nē'ēdi',  
bichi yugulu benē'. <sup>27</sup>Ri'o raoyaquē',  
rtzagana'yaquē', rtzagana'rē  
žī'iyaquē' hasta bdyin dza uyuu'  
Noé len familia quienē' lu'u barco  
quienē'. Lēcana' ben yusiu' huala  
gula, guca juicio quie nisa, guti

lao yuguluteyaquē'. <sup>28</sup>Lēzi cana'  
bērē yaca ben' unita' lao yedyi  
layu tiempote caora uzu Lot.  
Ri'o raoyaquē', ra'o ruti'yaquē',  
razara'nyaquē' rueyaquē' yu'u  
quieyaquē'. <sup>29</sup>Pero cati bro Lot  
ciudad Sodoma, lēcana' bžexo  
Diuzi juicio gui', uyēzin žan guibá,  
bētín yuguluteyaquē'. <sup>30</sup>Lēzi cana'  
gacarē quie yaca benē' inita' dza  
bē' yeguida' lao yedyi layu nē'ēdi',  
bichi yugulu benē'.

<sup>31</sup>Lēdza bē' yeguida' tatula, chi  
inita' yaca benē' lali'a, bireya'ala'  
yeyu'uyaquē' lu'u yu'u quieyaquē'  
ta cuioyaquē' ta de quieyaquē'  
nun quie dan' ruen baguinzi  
ižunoyaquē'. Lēscan' chi ziorēyaquē'  
layela, bireya'ala' yeyoyaquē'  
žan yu'u quieyaquē' nun quie  
dan' ruen baguinzi ižunoyaquē'.  
<sup>32</sup>Bigalala'adyi'le cabē' guca quie  
žgula Lot. <sup>33</sup>Nu ben' rdzebi gati,  
yela' na' binaoyaquē' nē'ēdi', bigata'  
yela' neban quieyaquē' tuzioli. Pero  
nu yaca ben' birdzebi gati, yaca  
ben' nao nē'ēdi', huata' yela' neban  
quieyaquē' tuzioli.

<sup>34</sup>Cani rnia' le'e, lēyela cati  
yeguida' tatula, useria' yaca ben'  
nao nē'ēdi', na' iquiē' yaca ángel  
leyaquē'. Por ejemplo, chi rasi  
chopa benē' tzaže lao belaga, iquiē'  
yaca ángel tunē', na' yega'n itunē'.  
<sup>35</sup>Chi zu chopa nigula rutuyaquē'  
tzaže lao guichi, iquiē' yaca ángel  
tunē', na' yega'n itunē'. <sup>36</sup>Chi zu  
chopa be'mbyu rueyaquē' dyin  
tzaže layela, iquiē' yaca ángel tunē',  
na' yega'n itunē'.

<sup>37</sup>Bē' beyaquē' can' unē', na'ra  
unayaquē' rēbiyaquē' lēbē':  
—¿Gaži gaca can' baonao', Señor?

Na'ra bequëbinë' rëbinë' leyaquë':  
—Caora rlë'ële rëcho yaca bëchi  
ladza, cana' inezile de ta zigo  
raoyacaba'. Lëcana' gaca inezile  
gan' gaca can' baonia'.

**Una Jesús tu di'idza' quie tu nigula  
bagui xquiuhue len tu juez mala**

**18** Una Jesús tu di'idza' ni  
psëdinë' yaca ben' quienë'  
ca ta reya'ala' hue'lëyaquë' Diuzi  
di'idza' yugu dza. Bireya'ala'  
yeyatiyaquë', bireya'ala'  
usanla'adyi'yaquë' ulidzayaquë'  
Diuzi. <sup>2</sup>Na'ra unë' rëbinë' leyaquë':  
—Biži de tu yedyi ga uzu tu juez  
birapala'nnë' Diuzi, nica rapala'nnë'  
benë'. <sup>3</sup>Lëläo yedyi na', lëzi uzurë  
tu nigula, ben' baguti xquiuhue.  
Riotezi rionë' lao juez ta r nabë'  
huenë' justicia quië' len quie ben'  
raca dilalënë'. <sup>4</sup>Baguca zë lasa  
bigu'un juez huenë' justicia quie  
nigula. Biži na'ra guca juez pensari  
unë': “Ba'ala'cazi nunu rdzeba', nica  
Diuzi, nica yaca benë', <sup>5</sup>por nun quie  
dan' nigula niga rdazi rdë' ruenë'  
në'ëdi' zëdi, tana' lena' huacalia'në'  
hua' justicia quië' cuenda bira guidë'  
hueranë' në'ëdi' zëdi. Bardanë'ëda'  
rdazi rdanë' ruenë' në'ëdi' zëdi.”

<sup>6</sup>Na' una Jesús rëbinë' leyaquë':  
—Cana'la bë juez mala pensari ca  
unë'. <sup>7</sup>Na' nia' le'e, çbiži raquele ca  
hue Diuzi? ¿Raquele bigacalë Diuzi  
yaca ben' quienë', ben' rulidza  
lëbë' yugu dza yugu yela? ¿Raquele  
huadzë Diuzi bigacalënë' yaca ben'  
quienë'? <sup>8</sup>Rnia' le'e, bitzë Diuzi.  
Labezi gacalënë' yaca ben' quië'.  
Pero cati yeguida' në'ëdi', bichi  
yugulu benë', çhuadzeleda' ben'  
rzudyi'ilë Diuzi, lao yedyi layu?

**Una Jesús tu di'idza' quie tu ben'  
partido fariseo len tu ben' huequižu**

<sup>9</sup>Lëzi itu di'idza' ni una Jesús  
quie yaca ben' rlë'ë cuine ben' dya'a,  
na' rlë'ëyaquë' laguedyiaquë' ben'  
mala. Na' una Jesús:

<sup>10</sup>—Uyo chopa benë' lu'u idao'  
r nabë'ra ta ulidzayaquë' Diuzi. Tunë'  
naquë' ben' partido fariseo. Na' itunë'  
naquë' ben' huequižu pquižunë' benë'  
mazara ca ta redu'ulanë' si'në'. <sup>11</sup>Biži  
zutezi ben' partido fariseo rulidzanë'  
Diuzi unë' cani: “Xuza' Diuzi, nia'  
diuxcalelo' como dan' binaca' ca ben'  
uban, binaca' ca ben' mala, binaca'  
ca ben' rutilë nigula quie ben' tula.  
Binaca' ca ben' huequižu niga. <sup>12</sup>Në'ëdi'  
rua' ubasi chopa lasa lao tu xman. Na'  
runa' tu cue' lao chi cue' ca tu ta rua'  
gan.” Cana' unë' gudyinë' Diuzi. <sup>13</sup>Na'  
biži ben' huequižu, bega'nnë' zë' zitu'la  
gan' zë ben' fariseo. Nica reyažonë'  
yechisa laonë' ladza. Na' uzulaonë'  
rcudyinë' ru'achu'unnë' unë' rëbinë'  
Diuzi: “Xuza' Diuzi, beyëchi'la'adyi'  
në'ëdi' como dan' de dula' xquia quia'.”  
<sup>14</sup>Na'ra inia' le'e, bezi'že Diuzi dula'  
xquia de quie ben' huequižu, zeyoguë'  
žan yu'u quienë'. Biži quie ben' partido  
fariseo nenaocazi dula' xquia quië'  
lëbë'. Rnia' le'e, nu ben' rue že cuine,  
huadyin dza hue Diuzi lëbë' ben'  
yube'ezi. Na' biži nu ben' rue yube'ezi  
cuine, huadyin dza hue Diuzi lëbë' ben'  
že.

**Bëla'iya Jesús yaca xcuidi'**

(Mt. 19.13-15; Mr. 10.13-16)

<sup>15</sup>Na' guca dza bdyin yaca benë'  
gan' zë Jesús, nequië'yaquë' xcuidi'  
quieyaquë' ta uquichinë' na'anë'  
ta huela'iyane' leyacabi'. Na' biži

cati blè'è yaca ben' quie Jesús nequiè'yaquè' xcuidi' quieyaquè', na' udilayaquè' leyaquè'. <sup>16</sup>Na'ra guzi Jesús yaca ben' quienè' rëbinè' leyaquè':

—Biudzunle yaca xcuidi'.

Guidagarayacabi' ni como dan' ca naca quieyacabi', rue quieyacabi' quie xuziyacabi', lëcana' nacarën quie ben' zio rue quie xti'idza' Diuzi. <sup>17</sup>Tali ca rnia' le'e, chi nu yaca ben' birue quieyaquè' xti'idza' Diuzi ca rue xcuidi' quie xuzibi', bisaque' yeyoyaquè' guibá gan' zu Diuzi.

**Tu ben' uña'a bè'lënë Jesús di'idza'**

(Mt. 19.16-30; Mr. 10.17-31)

<sup>18</sup>Biži bdyin tu ben' r nabè' gan' zë Jesús, na' unè' rëbinè' lëbè':

—Maestro, ben' huen naco'.

Nainao', ¿ca biži reya'ala' hua' ta gata' yela' neban quia' tuzioli?

<sup>19</sup>Na' una Jesús rëbinè' lëbè':

—¿Bixquien' nao' naca' ben' huen? Tahuencazi nao' cana', como tuzi Diuzi naquè' ben' huen. <sup>20</sup>Luè' banezilo' ca rna lè'è guichi la'iya quie Diuzi: “Biutilo' nigula quie ben' tula. Bigutio' benè'. Bicianlo' quie benè'. Bisiu' benè' yè'. Lëzi udapala'n xuzo' len žnao'.” <sup>21</sup>Na'ra unè ben' na' rëbinè' Jesús:

—Yugulu ca rnao', ruequiecaza' len za'caza' naohua'n desde nacatia' xcuidi'.

<sup>22</sup>Bè' be Jesús can' unè', na'ra unè' rëbinè' lëbè':

—De tu ta nerdzioguelo' huelo'.

Bèti' yugulu ta de quio', na' bè'n yaca ben' yèchi'. Cana' gunra Diuzi taže quio' bè' yedyinlo' gan' zunè' guibá. Na' uda unao nè'èdi' gaco' ben' quia'.

<sup>23</sup>Na' biži bè' be ben' na' ca una Jesús, na' bega'nnè' guquenè' beyèchi' gula, como dan' naquè' ben' uña'a huala gula. <sup>24</sup>Caora blè'è Jesús guqueyèchi'nè', na'ra unè' rëbinè' yaca benè':

—Zèdi gula nacan quie yaca ben' uña'a ta yeyoyaquè' guibá gan' zu Diuzi. <sup>25</sup>Nacaran yalo te tu camello naga yèchi', cala ca ta yeyu'u ben' uña'a guibá gan' zu Diuzi.

<sup>26</sup>Na' yaca ben' be can' unè', unayaquè' rëbiyaquè' lëbè':

—Chi nacan zèdi gula yeyu'u yaca ben' uña'a guibá gan' zu Diuzi, ¿ca nuži saque' yeyu'u?

<sup>27</sup>Na'ra una Jesús rëbinè' leyaquè':

—Tu ta bisaque' hue yaca benè', Diuzi sí, huazaque'nè' huenè'n.

<sup>28</sup>Na' biži unè Pedro rëbinè' Jesús: —Señor, nètò' bapca'nndo' yugulu ta de quiendo' cuenda za'ndo' inaondo' luè'.

<sup>29</sup>Na'ra una Jesús rëbinè' lëbè':

—Nacan tali can' rnia' le'e. Con nuti'tezi ben' pca'n nu yu'u, nu xuzi, nu žnè'è, nu bichi, nu žgule, nu ži'ine tanun quie dan' bazionè' naonè' xneza Diuzi, <sup>30</sup>hueyu'era Diuzi tažera quienè' dza rdanè' lao yedyi layu cala ca tu ta pca'nnè'. Na' bè' yedyinnè' guibá gan' zu Diuzi, hue'nè' lëbè' yela' neban tuzioli.

**Una Jesús tatula cabè' gaca quiè' gatinè'**

(Mt. 20.17-19; Mr. 10.32-34)

<sup>31</sup>Na' guzi Jesús lao chipchopa ben' quienè' ubiga'yaquè' tzala'la unè' rëbinè' leyaquè':

—Uletza' tzioro ciudad Jerusalén ga uzu di'idza' ca di'idza' bzu yaca

ben' quie Diuzi lë'ë guichi dza na'te. Lë'ë lëguichi na' rguixogue'n cabè' usaca' yaca benè' nē'ēdi', bichi yugulu benè'. <sup>32</sup>Na' yaca ben' yedyi quia' usedyinyaquē' nē'ēdi' lao na'a ben' tula ta utituyaquē' utasi unioyaquē' nē'ēdi', uda'yaquē' žen' laohua'. <sup>33</sup>Lëzi huaguiyaquē' gutiyaquē' nē'ēdi'. Biži bē' gaca lao tzona dza, huebana' yeroga' gan' ucachi'yaquē' nē'ēdi'. <sup>34</sup>Pero yaca ben' quie Jesús biuyoñe'yaquē' cabè' gudyi Jesús leyaquē'. Binacan quieyaquē' ta tzioñe'yaquē' can' unē'.

**Beyue Jesús tu ben' laochula, ben' yedyi Jericó**

(Mt. 20.29-34; Mr. 10.46-52)

<sup>35</sup>Bagazi idyinyaquē' yedyi Jericó, na' re' tu ben' laochula tu neza gan' zioyaquē' r nabè' caridad. <sup>36</sup>Biži bē' be ben' laochula rde yaca ben' zē gula, caora na' unabanè' yaca ben' bin' guca dan' rdezi rdeyaquē'. <sup>37</sup>Na'ra unayaquē' rēbiyaquē' lëbè': —Huade Jesús, ben' yedyi Nazaret, gan' re'lo' niga.

<sup>38</sup>Quie lena' unē' zidzo: —iJesús, ži'i suba rey David, beyēchi'la'adyi' nē'ēdi'!

<sup>39</sup>Biži yaca ben' dyialao laohuē', rdilayaquē' lëbè' ta bira inēnē', pero unērè' zidzora unē':

—Ži'i suba rey David, beyēchi'la'adyi' nē'ēdi'.

<sup>40</sup>Biži uleza Jesús, bēnē' mandado yexi'yaquē' ben' laochula. Caora bdyinnē' ga'ala' gan' zē Jesús, na'ra unaba Jesús lëbè':

<sup>41</sup>—¿Ca biži re'enlo' hua' quio'?

Na' bequēbi ben' laochula nē':

—Señor, re'enda' yelē'ēda'.

<sup>42</sup>Na'ra una Jesús rēbinē' lëbè': —Babeyaco', barelè'ēlo' na'a nun quie rzudyi'ilëlo' Diuzi.

<sup>43</sup>Ca tu beyudyizi unē' cana', labelè'ēte ben' laochula, uži'nē' zionē' naonē' Jesús ruenē' Diuzi ben' že. Lëzi yaca ben' blè'ē can' bēnē' quie ben' laochula, bëyaquē' Diuzi ben' že.

**Uyo Jesús lidyi Zaqueo**

**19** Na'ra bē' bdyin Jesús yedyi Jericó udenē' lao yedyi na'. <sup>2</sup>Lëlao yedyi na' uzu tu ben' uña'a laonē' Zaqueo. Nacanē' xan' ben' huequižu. <sup>3</sup>LëZaqueo re'ennē' ilè'ēnē' Jesús cuenda huebè'nē' lëbè'. Pero birzaque'nē' ilè'ēnē' lëbè', dan' lega bgu'udi' yaca ben' zē gula. Na' lëbè' naquē' ben' chaco, binaquē' ben' huego'. <sup>4</sup>Na'ra zionē' taria udyialaonē' bdyinnē' gan' zu tu yaga laona sicómoro cuēta neza gan' zio Jesús. Biži na' urēnē' lao yaga ta ilè'ēnē' Jesús dyē'ēdi. <sup>5</sup>Biži cati bdyin Jesús gan', bechisa laonē' rna'nē' lao yaga gan' dyia Zaqueo. Na' unē' rēbinē' lëbè':

—Zaqueo, labe beyēzi gan' dyialo' como dan' žan yu'u quio' idyina' na'.

<sup>6</sup>Biži Zaqueo labezi beyēzinē' gan' dyianē' lao yaga. Bedaohuenē' bequiē'nē' Jesús žan yu'u quienē'. <sup>7</sup>Bē' blè'ē yaca benē' bazio Jesús žan yu'u quie Zaqueo, na'ra uzuloyaquē' rtzaloyaquē' rēbiyaquē' laguedyiyaquē' unayaquē' bazio Jesús yedyinnē' žan yu'u quie tu ben' huezi' yē', ben' mala gula.

<sup>8</sup>Na'ra bare'yaquē' lu'u lidyi Zaqueo, uzulinē' unē' rēbinē' Jesús:

—Señor, hua' yaca ben' yēchi' gatzo ta de quia'. Chi baožia'

benë' yë' ulana' quieyaquë', na' yeyu'ayaquë' lao tapa cue' ta aožia' quieyaquë'.

<sup>9</sup>Na'ra una Jesús rëbinë' Zaqueo: —Lena' rulu'en talí abetza'lo' pensari quio', na' barue quio' xti'idza' Diuzi. Banaco' dugalo ži'i suba Abraham. <sup>10</sup>Në'ëdi', bichi yugulu benë', bida' lao yedyi layu ta ute usela' ben' ruen žudyi quie yeyoyaquë' lao gui' gabila.

**Una Jesús tu di'idza' quie ben' bë' ben' gaca ladyinë'ë dumi**

<sup>11</sup>Tu nerzënaga yaca benë' ca rna Jesús, unë' itu di'idza' dan' barega'n ga'ala' ga re' ciudad Jerusalén, lëscan' dan' guqueyaquë' ilë'ëti'zi rdziogue ta idyin dza inabë' Diuzi lao yedyi layu. <sup>12</sup>Na'ra unë' rëbinë' leyaquë':

—Uzu tu ben' bala'ana. Na' uzë'ë zionë' yedyi re' zitu' ta cuioyaquë' lëbë' gaquë' rey yedyinnë' tatula ta inabë'në' lao yedyi quienë'. <sup>13</sup>Pero tu zaironë' sa'në', na' gužinë' lao chi yaca ben' hue'në' ladyinë'ë. Na' bë'në' quie quieyaquë' tu dumi že. Tana' unë' gudyinë' leyaquë': “Ulehue negocio conlë dumi babëna' le'e. Na' bë' yeguida' huero cuenda.”

<sup>14</sup>Na' biži yaca ben' lao yedyi quienë', lega rudieyaquë' lëbë'. Caora na' use'ela'yaquë' yaca benë' zio zenaoyaquë' lëbë' ta yëbiyaquë' ben' re' yedyi gan' zioyaquë': “Birexendo' ben' ni ta gaquë' rey quiendo’.” <sup>15</sup>Pero gucazinë' rey quieyaquë'. Ude na' bedyinnë' lao yedyi quienë'. Cati bedyinnë', na' gužinë' yaca ben' nu'enë' ladyinë'ë dumi quienë' ta inezinë' gaca tu ta bëlëyaquë' gan dumi quienë'.

<sup>16</sup>Na'ra unë ben' nëro rëbinë' lëbë': “Señor, dumi benlo' në'ëdi', babëlia'n gan ichi cue' mazara ca tu ta benlo' në'ëdi'.” <sup>17</sup>Na'ra una rey na' rëbinë' lëbë': “Tahuen gula babao'. Na' nun quie bzulo' di'idza' bao' huen conlë lë'ëti'zi pca'na' lao na'alo', na'ra gaco' ben' rna'bë' quie lao chi yedyi.” <sup>18</sup>Lëzi bdyin ben' urupe unë' rëbinë' rey na': “Señor, dumi quio' benlo' në'ëdi', babëlia'n gan iga'yo cue' mazara ca tu ta benlo' në'ëdi'.” <sup>19</sup>Na'ra una rey na' rëbinë' lëbë': “Gaco' ben' rna'bë' lao ga'yo' yedyi.” <sup>20</sup>Biži bdyin ben' uyune unë' rëbinë' rey na': “Señor, ni zeyu'a dumi benlo' në'ëdi'. Ptuba'n la'ari' bdze'tza'ohua'n. <sup>21</sup>Bibëlia' dumi quio' negocio, dan' rdzeba' chan' initin idza'lo' në'ëdi', dan' nezda' naco' ben' reguë'ë bire'enlo' initi ta de quio'. Nezda' ruelao' dumi quio' negocio ga gacan seguro hue guichon.” <sup>22</sup>Na'ra una rey na' rëbinë' ben' na': “Ben' mala gula naco'. Con can' rnao' rulu'en quio' aoquixo' bibë quio' huelo' ca re'lenda'. Chi nezo' naca' ben' reguë'ë, ben' rue negocio ga gacan seguro hue guichon, <sup>23</sup>žbixquien' biyelëcho' dumi quia' lao banco tacuenda hue guichon yezi'a dumi quia' len guichon bë' yela' žan yu'u?” <sup>24</sup>Na'ra una rey na' gudyinë' yaca ben' nita' na': “Ulesi' dumi bi'a ben' na', na' ulehue'na ben' bi'a chi dumi.” <sup>25</sup>Na' unayaquë' rëbiyaquë' rey na': “Pero Señor, badecazi chi dumi quienë'.” <sup>26</sup>Na' una rey na' rëbinë' leyaquë': “Nu ben' rue quie ca ta pca'n xa'nnë' ladyinë'ë, lë'lëbë' hue'ra xa'nnë' lëbë' mazara. Pero nu ben' birue quie ca ta

pca'n xa'nnë' ladyinë'ë, hueguba xa'nnë' ca ta bënë' lëbë'. <sup>27</sup>Pero ca naca yaca ben' rudie në'ëdi', yaca ben' birexe gaca' rey quieyaquë', uletzëxi'yaquë' gutileyaquë' zaquë' laohua' ni."

### Bdyin Jesús ciudad Jerusalén

(Mt. 21.1-11; Mr. 11.1-11; Jn. 12.12-19)

<sup>28</sup>Bë' beyudyi una Jesús cana', beyu'uyaquë' neza tatula uza'yaquë' zioyaquë' ciudad Jerusalén. <sup>29</sup>Cati baruen bago idyinyaquë' yedyi Betfagé len yedyi Betania, ga nacan ga'ala' gan' zu tu ya'a Olivos, lëgan' na' use'ela'në' chopa ben' quienë'. <sup>30</sup>Na' unë' gudyinë' leyaquë':

—Uletzio yedyi re' ni' ga'ala'. Bë' idyinle gan', huatzaxacale tu burra nerioaba', bia nitu nunu necuia. Uxëdyileba' nadahua'aleba' niga. <sup>31</sup>Chi ilë'ë yaca benë' le'le inayaquë' le'e bixquien' rxëdyileba', na' reya'ala' yëbileyaquë' re'en Señor lëba' ta cuianë'ba'.

<sup>32</sup>Na'ra uza' yaca ben' quie Jesús zioyaquë' gan' use'ela'në' leyaquë'. Na' laga guca quieyaquë' cabë' gudyi Jesús leyaquë' yexacayaquë' lëgan' nerio burra. <sup>33</sup>Na' caora barxëdyiyaquë' burra, cana' bdyincazi xan' burra, na' unë' rëbinë' leyaquë':

—¿Bixquien' rxëdyile burra quia'?

<sup>34</sup>Na'ra unayaquë' rëbiyaquë' lëbë':

—Re'en Señor lëba' ta cuianë'ba'. Bë' idyinnë' gan' ziondo', nadesanndo'ba'.

<sup>35</sup>Na' bequie'yaquë'ba' gan' zë Jesús, uxubayaquë' žabayaquë' xcu'udzu burra ta udyianë' lëba'.

<sup>36</sup>Tu neyu'u Jesús neza zionë'

ciudad Jerusalén, ulëchoyaquë' žabayaquë' udixuyaquë'n tu neza gan' tenë'. <sup>37</sup>Caora bdyinyaquë' gan' zu leto quie ya'a Olivos, cana' uzulao yaca ben' zio nao Jesús unëyaquë' zidzo. Lega redaohueyaquë' bëyaquë' Diuzi ben' že ca naca yela' huaca benë' blë'ëyaquë'. <sup>38</sup>Lena' unayaquë' zidzo:

—Ben' naca la'ya ben' niga. Naquë' rey quiero. Diuzi use'ela'në' lëbë'. Redaohue yaca ben' nita' guibá ca ruenë'. Naca Diuzi ben' že gula. —Cana' unayaquë'.

<sup>39</sup>Na' biži nita' bala yaca ben' partido fariseo lado yaca ben' zio nao Jesús. Na' unayaquë' rëbiyaquë' lëbë':

—Maestro, reya'ala' tilo' yaca ben' za' nao luë' niga ta bira inayaquë' can' nayaquë'.

<sup>40</sup>Na' bequëbi Jesús rëbinë' leyaquë':

—Rnia' le'e, chi yega'n yaca ben' niga chizi, huanë yaca yo ni zidzo lao lazayaquë'.

<sup>41</sup>Cati bdyinyaquë' ga'ala' ga re' ciudad Jerusalén, na' blë'ënë' ciudad na', na' uredyinë'. <sup>42</sup>Quie lao ciudad na' unë' cani:

—Bida' ta ucuasa ucui'oga' le'e cue' chizi laxta'ole tuzioli, pero bire'enle birezaquele në'ëdi'. Quie lena' baode quiele na'a. <sup>43</sup>Baza' dza gaca bayëchi' gula quiele. Huala' yaca ben' zë, yaca ben' rudie le'e. Huayëchoyaquë' lao ciudad quiele uza'agayaquë' le'e. <sup>44</sup>Gutiyaquë' le'e len žgulale len ži'ile. Yela'te uquinuyaquë' yu'u quiele. Cana' gaca quiele como dan' bibë quiele në'ëdi' dza bida' gu'unda' sulia' le'e tuže.

**Blao Jesús yaca ben' yu'u huëti' lu'u idao' rñabë'ra**

(Mt. 21.12-17; Mr. 11.15-19; Jn. 2.13-22)

<sup>45</sup>Na'ra uyu'u Jesús lu'u idao' rñabë'ra blaonë' yaca ben' yu'u ra'o ruti'. <sup>46</sup>Na' unë' rëbinë' leyaquë':

—Lë'ë guichi gan' yu'u di'idza' la'ya quie Diuzi nan cani: “Lu'u idao' rñabë'ra ni nacan ga rlidza yaca benë' Diuzi.” Pero le'e abetza'len ruelen ca quie belö ga yu'u ben' uban. —Cana' una Jesús gudyinë' leyaquë'.

<sup>47</sup>Pero yugu dza rio Jesús lu'u idao' rñabë'ra ruxi'idze'në' yaca benë'. Pero yaca xan' pxuzi, len yaca ben' rusëdi ley quie Moisés, len yaca ben' napa dyin quie lao yedyi, reguilola'adyi'yaquë' rna'yaquë' ca hueyaquë' ta gutiyaquë' lëbë'. <sup>48</sup>Pero biubinyaquë' bi hueyaquë' ta gutiyaquë' lëbë', como dan' nita' yaca ben' zë gula rexeyaquë' uzëmagayaquë' can' rnë'.

**Bë'yaquë' di'idza' quie yela' rñabë' quie Jesús**

(Mt. 21.23-27; Mr. 11.27-33)

**20** Bi'zi bdyin tu dza zë Jesús lu'u idao' rñabë'ra ruxi'idzë' yaca benë' ca re'en Diuzi hueyaquë' ta yeyëri laxta'oyaquë' laohuë'. Na' bdyin yaca xan' pxuzi, len yaca ben' rusëdi ley quie Moisés, len yaca ben' napa dyin quie yulao'. <sup>2</sup>Na'ra unayaquë' rëbiyaquë' lëbë':

—Una nëto' çnu ben yela' rñabë' quio', dan' bablaolo' yaca ben' yu'u huëti' lu'u idao' rñabë'ra?

<sup>3</sup>Na' una Jesús rëbinë' leyaquë':

—Lëscan' re'enda' inaba' le'e tu di'idza'. Na' yequëbile quia': <sup>4</sup>çNu'zi

use'ela' Juan bautista? çUse'ela' Diuzi lëbë' o ta racazi la'adyi'në' bidë'?

<sup>5</sup>Na'ra uzulaoyaquë' rtzaloyaquë' ru'elëyaquë' laguediyaquë' di'idza' unayaquë':

—çCabi'zi yëbironë'? Chan' yëbironë': “Diuzi use'elë' lëbë'”, na' huanë' ra'o: “çBixquien' bigulele quienë'?” <sup>6</sup>Na' chi yëbironë':

“Ta racazi la'adyi'në' bidë'”, na' huadza' yaca benë' ra'o, ruen žudyi huaguiaquë' ra'o yo, gutiyaquë' ra'o como dan' rnyaquë' use'ela' Diuzi Juan rguixogue'në' xti'idzë'.

<sup>7</sup>Na'ra unayaquë' rëbiyaquë' Jesús:

—Binezindo' nu ben' use'ela' Juan bautista.

<sup>8</sup>Lëzi unarë Jesús rëbinë' leyaquë':

—Lëscan' në'ëdi', biinia' le'e nu ben yela' rñabë' quia' bablaohua' yaca ben' yu'u huëti' lu'u idao' rñabë'ra.

**Una Jesús tu di'idza' quie ben' mala, ben' guca ladyinë'ë quie xa'ne**

(Mt. 21.33-44; Mr. 12.1-11)

<sup>9</sup>Na'ra una Jesús itu di'idza' ni rëbinë' yaca benë':

—Uzu tu ben' guzanë' bedzuli' lao layu quienë'. Ude na' pca'nnë'n lao na'a yaca ben' gaca ladyinë'ë layela quienë'. Na' uzë'ë zioquë' yedyi re' zitu'. <sup>10</sup>Bi'zi cati bdyin biu' quie usecho quie bedzuli', na' bese'ela' xan' layela tu ben' zu laohuë' ta tzenabanë' tu ta redu'ulanë' si'në' quie bedzuli' quienë'. Pero bela'cala bë'yaquë' zi' ben' use'ela' xa'nyaquë'. Na' beza'në' gabi zeyu'anë', bedyinë'



lao xa'nnè'. <sup>11</sup>Na'ra bese'ela' ben' xan' layela ben' tula zioquè'. Pero lèzi utasi unioyaquè' lèbè', bè'yaquè' lèbè' zi', gabi bè'yaquè' lèbè'. Na' zeyoguè' bedyinè' lao xa'nnè', gabi zeyu'anè'. <sup>12</sup>Bi'zi ben' xan' layela, tatula bese'ela'nè' ben' tula, ben' uyune. Lèzi bërèyaquè' lèbè' hue', blaoyaquè' lèbè', gabi zeyu'anè'.

<sup>13</sup>Pues guca ben' xan' layela pensari unè': "¿Ca bízira hua'? Na' ise'ela' ži'ina' bi' nedyè'èda'. Cati ilè'èyaquè' lèbi', chica huapala'nyaquè' lèbi'." <sup>14</sup>Pero bè' blè'è yaca ben' naca ladyinè'è layela babdyin ži'li xa'nyaquè', na'ra unayaquè' rëbiyaquè' laguediyiaquè': "Bi' niga gaca quiebi' layu niga cati bagati xuzibi'. Uletza' gutirobi' cuenda si'ro layu niga gacan quiero." <sup>15</sup>Na'ra bëxoyaquè'bi', ulioyaquè'bi' gan' de layela, bëtiyaquè' lèbi'.

Na'ra unaba Jesús yaca ben' nita' na' tu di'idza' unè':

—¿Cabizi hue xan' layela len leyaquè'? <sup>16</sup>Pues huedyinnè' gan' de layela quienè' ta gutinè' yaca ben' nu'enè' ladyinè'è, hue'nè' yaca ben' tula gaca ladyina'ayaquè' layela quienè'.

Na'ra caora be yaca benè' cabè' una Jesús, na' unayaquè' rëbiyaquè' lèbè':

—Birda chi tamala ca tamala bë yaca ben' guca ladyinè'è layela.

<sup>17</sup>Na'ra una' Jesús leyaquè' unè' rëbinè' leyaquè':

—Chi nacan can' rnale, ¿ga huen dyin di'idza' yu'u lè'è guichi la'iya quie Diuzi rnèn caniga':

Yo laga' ta baoru'un ben' hue huecua', lèyo na' bezi' Diuzi

bzunè'n ga naca belao, ga rzulao besu.

<sup>18</sup>Na' rnia' le'e, nu yaca ben' iguino lèlao yo na', huayožo iguinoyaquè'. Lèscan' chi iguino yo idacon leyaquè', huatzutzon leyaquè'.

### Unabayaquè' Jesús ca naca quie impuesto

(Mt. 21.45-46; 22.15-22; Mr. 12.13-17)

<sup>19</sup>Na'ra yaca xan' pxuzi, len yaca ben' rusèdi ley quie Moisés, gu'unyaquè' guxuyaquè' Jesús luegozi, dan' bezaqueyaquè' quieyaquè' unè Jesús di'idza' quie yaca ben' guca ladyinè'è layela. Pero bibeyažoyaquè' bi hueyaquè' quienè', dan' rdzebiyaquè' bi hue yaca benè' quieyaquè'. <sup>20</sup>Bi'zi cabè' beguilola'adyi'yaquè' bëyaquè', use'ela'yaquè' ben' ruezi cuine ca ben' bala'ana ta tzenabayaquè' Jesús di'idza' chi iquixinè' inè' calèla tacuenda ga saque' gaoyaquè' lèbè' xquia lao ben' naca gobierno. <sup>21</sup>Quie lena' bdyinyaquè' gan' zè Jesús unayaquè' rëbiyaquè' Jesús: —Maestro, banezindo' luè' rxi'idze'lo' yaca benè' di'idza' naca li. Na' biru' cuenda bi naque yaca benè', sino rxi'idze'lo' benè' tali ca naca xneza Diuzi. <sup>22</sup>Unacara nètò': ¿Ru'en lato quizoro quie impuesto quie ben' naca gobierno romano? ¿Huaguizoron o biquizoron?

<sup>23</sup>Pero banezi Jesús ca naca pensari mala yu'uyaquè' regulola'adyi'yaquè' bi hueyaquè' quienè'. Na' unè' rëbinè' leyaquè': —¿Bixquien' re'enle cuèchile trampa quia'? <sup>24</sup>Uleulu'ecara nè'èdi' tu dumi. ¿Nu guicho, nu laohue da' lè'en?

Na'ra unayaquë' rëbiyaquë' lëbë':  
—Da' lë'ë dumi nu guicho, nu lao  
ben' naca gobierno.

<sup>25</sup>Na' una Jesús rëbinë' leyaquë':  
—Ulehue' ben' naca gobierno ta  
redu'ulanë' si'në'. Lëscan' ulehue'  
Diuzi ta redu'ulanë' si'në'.

<sup>26</sup>Na' gabi užaque'yaquë' ga  
iquixi Jesús ca di'idza' rnë' lao  
benë'. Bela'cala tu bebanziyaquë'  
can' unë'. Babira biubinyaquë' bi  
yëbiyaquë' lëbë'.

### Unabayaquë' Jesús quie ben' baguti beban

(Mt. 22.23-33; Mr. 12.18-27)

<sup>27</sup>Ude na' uyorë yaca ben' partido  
saduceo gan' zë Jesús. Na'ra rna  
yaca ben' partido saduceo biyeban  
yaca ben' baguti. Quie lena'  
unayaquë' rëbiyaquë' Jesús:

<sup>28</sup>—Maestro, ca naca di'idza' bzu  
Moisés lë'ë guichi, rnën chi baguti  
tu be'mbyu, na' bega'n žgulanë' tu  
cuinzë', nunu ži'iyaquë' uzu, ruen  
zi yezi' bi' bichinë' nigula quie ben'  
baguti tacuenda yezu xcuidi' yezi'  
lao ben' baguti. <sup>29</sup>Na' ugunro guca  
gadyi bichiyaquë'. Na' ben' nëro  
uži'në' nigula quienë'. Pero ni tu  
ži'iyaquë' biuzu gutinë'. <sup>30</sup>Na' biži  
ben' urupe bezi'në' nigula quie ben'  
bichinë', ben' baguti. Lëzi gutirënë',  
nunu ži'iyaquë' uzurë. <sup>31</sup>Na' biži  
ben' uyune bezi'rënë' nigula quie  
ben' bichinë', ben' baguti. Lëzirë  
gutirënë' nunu ži'iyaquë' uzurë.  
Cana' guca quie lao gadyiteyaquë',  
yaca ben' uzulë nigula. <sup>32</sup>Ga  
beyudyicala quie nigula, gutirënë'.  
<sup>33</sup>Na'ra chi tali na' yeban yaca  
ben' huati, čca nurlayaquë' naca  
žgulayaquë' nigula na', como dan'

lao gadyi bichiyaquë' uzulëyaquë'  
lëbë'?

<sup>34</sup>Na' bequëbi Jesús rëbinë'  
leyaquë':

—Lao yedyi layu niga rzulë  
be'mbyu nigula, lëscan' rzulë  
nigula be'mbyu. <sup>35</sup>Pero yaca ben'  
yeban yeyo guibá ga zu Diuzi, bira  
sulëyaquë' laguediyayaquë' ca nu  
žgulayaquë', ca nu xquiuyaquë'.

<sup>36</sup>Lëscan' bira gatiyaquë'.

Cabë' bigati yaca ángel, cana'  
bigatirëyaquë'. Tali nacayaquë'  
ži'i Diuzi, dan' babebanyaquë'  
huatzezulëyaquë' Diuzi tuzioli. <sup>37</sup>Na'  
rguixogue' yaca di'idza' bzu Moisés  
lë'ë guichi de que yeban yaca ben'  
baguti. Caora zë Moisés gan' re'  
yaga ra'ala' gui' bireina, lëgan' na'  
una Diuzi gudyinë' Moisés: “Naca'  
Diuzi quie xuzixta'olo' Abraham,  
len quie xuzixta'olo' Isaac, len  
quie xuzixta'olo' Jacob.” <sup>38</sup>Cana'  
una Diuzi quieyaquë', ba'ala'cazi  
bagutiyaquë' azio zë iza caora.  
Lena' rulu'en rlë'ë Diuzi leyaquë' ca  
ben' neneban, cala ca ben' baguti.  
Pues rlë'ë Diuzi yugulu benë' ca  
yaca ben' neban. Birlë'ënë' leyaquë'  
ca ben' baguti.

<sup>39</sup>Biži bala yaca ben' rusëdi  
ley quie Moisés, ben' nita' na',  
ruzënegayaquë' bi na Jesús,  
unayaquë' rëbiyaquë' Jesús:  
—Tahuencazi cabë' baonao',  
Maestro.

<sup>40</sup>Na' biži bira biubinyaquë' bi  
di'idza' inabayaquë' lëbë'.

### Naca ben' Cristo Señor quie rey David

(Mt. 22.41-46; Mr. 12.35-37)

<sup>41</sup>Na'ra una Jesús rëbinë' leyaquë':

—Nacan tali ca nale, nale naca ben' Cristo ži'i rey David. <sup>42</sup>Pero cuin rey David, caora bzunë' di'idza' lë'ë guichi Salmos, unë' cani:

Una Diuzi rëbinë' ben' naca Señor quia': "Ure' cuëta' zaquë' yebë niga,

<sup>43</sup>hasta idyin dza cuëcha' xni'alo' yaca ben' rudie luë'."

<sup>44</sup>Quie lena' rnaba' le'e: ¿Cómo naca ben' Cristo ži'i rey David, chi cuin rey David unë' naca ben' Cristo Señor quienë'?

**Udao Jesús xquia yaca ben' rusëdi ley quie Moisés**

(Mt. 23.1-36; Mr. 12.38-40; Lc. 11.37-54)

<sup>45</sup>Na' ben' zë nita' bzënagayaquë' ca una Jesús caora unë' rëbinë' yaca ben' quienë':

<sup>46</sup>—Gapale cuidado bihuele ca rue yaca ben' rusëdi ley quie Moisés. Lega rexeyaquë' gacoyaquë' la'ari' naca tona. Lega rexeyaquë' gapala'n yaca benë' leyaquë' ga rdayaquë' tu neza. Lega rexeyaquë' cue'yaquë' ga rbe' ben' bala'ana, chi lu'u idao' sinagoga, chi ga raca lani. <sup>47</sup>Zidza rulidzayaquë' Diuzi cuenda ilë'ë yaca benë' leyaquë' ben' quie Diuzi, pero bë' ruezियाquë' regulola'adyi'yaquë' bi hueyaquë' ta cubayaquë' ta de quie yaca nigula baguti xquiuhue. Quie lena' huera Diuzi leyaquë' tu castigo huala gula.

**Una Jesús quie tu nigula guti xquiuhue bdze'në' gun quie idao'**

(Mr. 12.41-44)

**21** Na' guca tu dza zë Jesús lu'u idao' rnabë'ra blë'ënë' rudze' yaca ben' uña'a dumi

quieyaquë' lu'u caja ga yu'un gun quie idao' rnabë'ra. <sup>2</sup>Lëzi blë'ënë' bdze' tu nigula guti xquiuhue chopa dumi dao' lasi de cobre lu'u caja na'. <sup>3</sup>Na' una Jesús rëbinë' yaca ben' quienë':

—Tali rnia' le'e, nigula na' naquë' ben' yëchi', aguti xquiuhue', pero ca naca dumi bdze'në' lu'u caja, nacaran dumi že cala ca ta bdze' yaca ben' uña'a. <sup>4</sup>Ta bega'nnan sobre quieyaquë' bdze'yaquë' lu'u caja na', pero lë'nigula ben' yëchi', bdze'në' ca tu dumi dao' dezi quienë' ta ra'onë' ta raonë'.

**Una Jesús huabiagui' idao' rnabë'ra**

(Mt. 24.1-2; Mr. 13.1-2)

<sup>5</sup>Na'ra yaca ben' quie Jesús, bë'lëyaquë' laguediyayaquë' di'idza' unayaquë' quie idao' rnabë'ra de que nacan badan gula, len yo necua' besu, len tu ta psala'adyi' yaca benë' bë'yaquë' quie idao'. <sup>6</sup>Na'ra una Jesús rëbinë' leyaquë':

—Huadyin dza iguino duže ca ta rna'le niga. Ni tu yo bira yega'nnan xcu'udzu laguedyin.

**Ga ru'en di'idza' cabë' gaca baruen bago dza iyudyi dyilayu**

(Mt. 24.3-28; Mr. 13.3-23)

<sup>7</sup>Na'ra yaca ben' quie Jesús unabayaquë' Jesús rëbiyaquë' lëbë':

—Maestro, ¿bata gaca can' rnao'? ¿Ca biži gaca ta ulu'en nëto' cati baruen bago dza gaca can' rnao'?

<sup>8</sup>Na' una Jesús rëbinë' leyaquë': —Gapale cuidado ta bisi' yaca benë' le'e yë'. Porque huida ben' zë inayaquë': "Në'ëdi' naca' Cristo." Lëscan' inayaquë': "Abdyin hora yeyudyi yedu quie dyila yu." Pero

bigalele quieyaquë'. <sup>9</sup>Lëzi cati babele baozulao huedila, rdilalë nación conlë itu nación, lëscan' rdilalë benë' conlë gobierno quieyaquë', bidzebile. Huata'cazi huedila quie lao yedyi layu, pero nerdziogue idyin dza yeyudyi yedu quie lao yedyi layu.

<sup>10</sup>Lëscan' una Jesús rëbinë' leyaquë':

—Huaca dilalë tu nación itu nación. Huaca dilalë tu yedyi itu yedyi. <sup>11</sup>Lëscan' ni'nizi quie lao yedyi layu huaca užu' huala, huata' ubin, huata' yela' hue'. Lëscan' hualë'ë yaca benë' ta utzebin leyaquë' za'n guibá huazën ladza.

<sup>12</sup>'Pero tu zagaca can', guxu yaca benë' le'e hueyaquë' le'e bizinaquezi. Iquië'yaquë' le'e lu'u yaca idao' sinagoga ta gaoyaquë' le'e xquia. Lëscan' udze'yaquë' le'e lu'u dyiguiba, usedyinyaquë' le'e lao na'a ben' naca gobierno dan' baralele baza'le naole në'ëdi'. <sup>13</sup>Cana' gaca quiele tacuenda inële cule në'ëdi' laoyaquë'. <sup>14</sup>Bidëbile ca bi yëbileyaquë' cuenda gacalële cuinle laoyaquë'. <sup>15</sup>Bidëbile como dan' gacalia' le'e bi di'idza' yequëbile yeyëbileyaquë' cuenda inita' yaca ben' rudie le'e chizi, bira ibinyaquë' bi inayaquë' le'e. <sup>16</sup>Hasta ben' naca familia quiele, len ben' naca amigo quiele, huazi'yaquë' le'e yë'. Usedyín nu xuzile, nu bichile, nu diadza quiele, nu amigo quiele le'e lao na'a ben' r nabë'. Gutiyaquë' bala le'e. <sup>17</sup>Huadi yaca ben' nita' lao yedyi layu le'e dan' naole xneza'. <sup>18</sup>Pero bibi gaca quiele, ni tu guitza' guichole bicuiaguí'n. <sup>19</sup>Chi hue quiele biansanla'adyi'le naole xneza', huata' yela' neban quiele tuzioli.

<sup>20</sup>'Cati ilë'ële baneyëchote yaca soldado ciudad Jerusalén, huanezile baruen bago dza udyiaguí'yaquë' lao ciudad na'.

<sup>21</sup>Na'ra yaca ben' nita' estado Judea, ruguinte izunoyaquë' tzioyaquë' ga zu ya'a. Lëscan' yaca ben' nita' ciudad Jerusalén, ruguinte eroyaquë' tzioyaquë' huažuno. Lëscan' yaca ben' nita' lao layela, bireya'ala' yeyoyaquë' ciudad Jerusalén. <sup>22</sup>Lëdza gaca can' nacan dza hue Diuzi castigo. Nacan dza uzucazi yugulu di'idza' ca di'idza' yu'u lë'ë guichi la'iya quie Diuzi. <sup>23</sup>Huaca bayëchi' gula quie yaca nigula nu'a bdao', len yaca nigula ruga'adyi bdao' dza gaca can'. Lega yedzagalao yaca ben' Israel, hue Diuzi leyaquë' tu castigo huala gula. <sup>24</sup>Na' guti yaca soldado balayaquë'. Na' ibalayaquë' uquioyaquë' hueyaquë' leyaquë' preso iquië'yaquë' leyaquë' yaca yedyi zë, yedyi tula. Tana' lena' inabë' yaca ben' za' yedyi tula lao ciudad Jerusalén hasta idyin dza bira hue Diuzi lato inabë'yaquë' lao ciudad na'.

**Ca guca bë' yeguida ben' naca bichi yugulu benë' lao yedyi layu tatula**

(Mt. 24.29-35, 42-44; Mr. 13.24-37)

Na' una Jesús:

<sup>25</sup>—Ude na' huata' ta naca seña ladza. Huechula obidza, bira gata' xni' biu', huaguino yaca bélo. Huaca tondo yaca ben' nita' lao yedyi layu. Huadzebiyaquë' yeyaquë' xchi' nisadao' ruen ru'be huala gula ga rbiga' rdan ru'a yu bidyi. <sup>26</sup>Huayun'yaquë' tanto idzebiyaquë' ca gaca quieyaquë'

lao yedyi layu. Huazisi huaguino yaca bélo dyian guibá. <sup>27</sup>Lécana' hualè'è yaca ben' nita' lao yedyi layu nè'èdi', bichi yugulu benè'. Hualè'èyaquè' yeguida' lao beo zè ladza. Hualè'èyaquè' nè'èdi' de yela' huaca quia'. <sup>28</sup>Cati baraca can' rnia', na'ra bidzebile, reya'ala' yechisa guichole ina'le ladza como dan' ilè'èti'zi rdziogue ute usela' le'e ca ta raca quiele.

<sup>29</sup>Lèzirè unè Jesús itu di'idza' ni, unè' rëbinè' leyaquè':

—Ulena'cara ca raca quie yaga higo o bitezi yaga tula. <sup>30</sup>Cati ilè'èle bagusin la'aga' gula, barebian la'aga' re'ene quien, banezile baza' biu' oba. <sup>31</sup>Lèzirè cati ilè'èle baraca cabè' rnia' le'e, reya'ala' inezile baza' dza inabè' Diuzi lao yedyi layu.

<sup>32</sup>'Tali rnia' le'e, tu bineya ži'isuba ben' nita' na'a, bè' gaca cabè' rnia' le'e. <sup>33</sup>Huade quie ta dyia guibá len lao yedyi layu cana'zi, pero ca naca di'idza' rnia' le'e, biten cana'zi. Decazide huazun di'idza' cabè' rnia' le'e.

<sup>34</sup>'Ulegapa cuidado, bihue'le lato gacale zidi tzu'u pensari mala lu'u guicho laxta'ole. Bihuele tabayatza, bihuele hue'e, bidèbile quie ta gaole, bidèbile quie ta gacole, yela' na' biyebanle dza yeguida'. <sup>35</sup>Porque cabè' rdzebi bia guixi' bè' rdacoba' lu'u trampa, cana' yedzebi yaca ben' nita' lao duže yedyi layu dza yeguida'. <sup>36</sup>Lena' nia' le'e, ulesu listo. Ulehue'lè Diuzi di'idza' yugu dza, yugu yela, cuenda ucuasa ucu'onè' le'e ca tamala za' gaca lao yedyi layu. Ulehue quiele cuenda yetilalaole nè'èdi', bichi yugulu

benè'. —Cana' una Jesús rëbinè' leyaquè'.

<sup>37</sup>Ruxi'idze' Jesús yaca benè' lu'u idao' r nabè'ra te dza. Na' biži quie sadze' rionè' ga zu ya'a lao Olivos ga reguesinè'. <sup>38</sup>Biži yaca ben' zè rdyinyaquè' yugu zila lu'u idao' r nabè'ra ta rzénagayaquè' ca di'idza' ruxi'idzè' leyaquè'.

### Beguilola'adyi'yaquè' bi hueyaquè' ta gutiyaquè' Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

**22** Na' baruen bago ta hue yaca ben' Israel lani pascua ta gaoyaquè' yèta xtila binequixi levadura. <sup>2</sup>Biži yaca xan' pxuzi len yaca ben' rusèdi ley quie Moisés, lega regulola'adyi'yaquè' bi hueyaquè' ta gutiyaquè' Jesús. Pero bireyažoyaquè', dan' rdzebiyaquè' idza' yaca benè' leyaquè'.

<sup>3</sup>Na' biži tu ben' naca ben' quie Jesús lado ichiptu yaca ben' quie Jesús bè'nè' lato uyu'u xan' taxi'ibi' Satanás lu'u laxta'onè'. Lèben' na' laonè' Judas Iscariote. <sup>4</sup>Na' uyo Judas tzegue'lè'nè' di'idza' yaca xan' pxuzi, len yaca ben' napa dyin quie idao' r nabè'ra ta yeguilola'adyi'yaquè' bi hueyaquè' ta usedyinnè' Jesús lao na'ayaquè'. <sup>5</sup>Leyaquè' lega bedaohueyaquè' bega'n'lèyaquè' lèbè' di'idza' ta hue'yaquè' lèbè' dumi. <sup>6</sup>Na' uzulaonè' beguilola'adyi'nè' bi huenè' ta usedyinnè' Jesús lao na'ayaquè' cati nunu ben' nita'.

### Ga ru'en di'idza' ca gaoyaquè' quie lani pascua

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup>Bdyincazi dza bëyaquè' lani pascua cati gaoyaquè' yèta xtila

ta binequixi levadura, læscan' gutirëyaquë' beco' ži'ila' quie lani pascua. <sup>8</sup>Lena' una Jesús rëbinë' chopa ben' quienë', Pedro len Juan: —Uletzio ta ucuezale ta gaoro rtze' quie lani pascua.

<sup>9</sup>Na'ra unabayaquë' rëbiyaquë' lëbë':

—¿Gaži re'lenlo' tziondo' ta tzacueizando' ta gaoro?

<sup>10</sup>Biži na' una Jesús rëbinë' leyaquë':

—Uletzio ciudad Jerusalén. Caora babdyinle ru'a ciudad, lægan' na' yedilale tu be'mbyu zeyu'a tu re' yudzo nisa. Lëben' na' inaole gan' zeyonë' yedyinnë' žan yu'u.

<sup>11</sup>Na' tzu'ule yëbile ben' naca xan' yu'u: “Cani na Maestro: ¿Gaži zu lu'u yu'u ga gaolëndo'në' rtze' quie lani pascua?” <sup>12</sup>Na'ra ulu'enë' le'e tu lu'u yu'u že de chopa xcua ga baneluban banacan dya'a. Lëgan' na' ucuezale ta gaoro.

<sup>13</sup>Na' uza'yaquë' zioyaquë' gucan laga con can' gudyi Jesús leyaquë'. Lëgan'na' pcuezayaquë' ta gaoyaquë' rtze' quie lani pascua.

<sup>14</sup>Cati bdyin hora gaoyaquë' quie rtze', na' uza' Jesús ziolënë' yaca ben' quienë' uyu'uyaquë' lu'u yu'u ure'yaquë' lao mesa. <sup>15</sup>Na'ra una Jesús rëbinë' leyaquë':

—Lega bare'enda' gaolia' le'e rtze' quie lani pascua tu zagatia'. <sup>16</sup>Rnia' le'e, bira gaolia' le'e rtze' quie lani pascua. Caora babzu di'idza' ca una Diuzi arnabë'në' lao yedyi layu, cana'tera gaolia' le'e rtze' quie lani pascua tatula.

<sup>17</sup>Na'ra už'i'në' tu copa, bazënë'n lao në'ë, unë' rëbinë' Diuzi:

—Diuxcalelo'.

Ude na' unë' rëbinë' leyaquë':

—Uleguxun tu tule, uleyo'on.

<sup>18</sup>Rnia' le'e, bira yo'oga' nisa quie bedzuli'. Caora babdyin dza arnabë' Diuzi lao yedyi layu, cana'tera yo'oga' nisa bedzuli' tatula.

<sup>19</sup>Na' už'i'në' tu yëta xtila bazënë'n lao në'ë unë' rëbinë' Diuzi: —Diuxcalelo'.

Ude na' unë' rëbinë' leyaquë':

—Lëyëta xtila ni nacan ca quie cuerpo quia'. Huatia' cuenda gata' yela' huezi'že quiele lao Diuzi. Cabë' aodaoro rtze' niga, cana' huerële ta yeza'la'adyi'le në'ëdi' cabë' bia' quiele.

<sup>20</sup>Lëzirë, ude beyudyi udaoyaquë', bezi'në' itu copa unë' rëbinë' leyaquë':

—Naca nisa bedzuli' yudzu copa ni ca quie ren quia'. Lena' ilatoga' gatia' cuenda yega'ntza'olë' Diuzi le'e tacubila. Lena' ilatoga' cuenda gata' yela' huezi'že quiele lao Diuzi.

<sup>21</sup>'Pero tu ben' re' len në'ëdi' lao mesa ni, lëben' na' usedyinnë' në'ëdi' lao na'a ben' rudie në'ëdi'.

<sup>22</sup>Në'ëdi', bichi yugulu benë', banugunnan gatia'. Pero bayëchi' gula gaca quie ben' usedyin në'ëdi' lao na'a ben' rudie në'ëdi'.

<sup>23</sup>Na'ra unayaquë' rëbiyaquë' laguediyayaquë':

—¿Nuži ra'o usedyinronë' lao na'a ben' rudie lëbë'?

### Ga bëyaquë' tu huenë quie nulayaquë' gacara belao

<sup>24</sup>Na'ra yaca ben' quie Jesús uyu'uyaquë' huenë len laguediyayaquë' ca nulayaquë' gacara ben' belao entre leyaquë'. <sup>25</sup>Pero na' una Jesús rëbinë' leyaquë':

—Yaca ben' naca gobierno lao yedyi layu niga, lega dyiabè'yaquè' hue yaca benè' ca ta re'enyaquè'. Na' nayaquè' nacayaquè' ben' belao. <sup>26</sup>Pero na' le'e bireya'ala' huele ca rueyaquè'. Bireya'ala' hue cuinle ben' belao. Reya'ala' gacalèle laguedyile. Reya'ala' ilè'èle cuinle ca ben' criado. Chi huele cana', tali na' nacale ben' belao ca re'en Diuzi. <sup>27</sup>Quie lao ben' nita' lao yedyi layu niga, rbe'cazi xa'nyaquè' lao mesa ta gaoyaquè' ta rudyia criado quieyaquè'. Pero nè'èdi', la'acazi naca' xa'nle, zua' ladole rua' ca quie criado quiele.

<sup>28</sup>'Na' como dan' bipsanla'adyi'le nè'èdi' dza cati guca zèdi gula quia', <sup>29-30</sup> quie lena', guna' le'e lato cue'le gaole yo'ole len nè'èdi' lao mesa quia' ga yedyina' inabi'a. Lèscan' guna' le'e lato cue'le ga gaca xlatole ichugolile quie lao chipchopa cue' ben' Israel. Cabè' bē Xuza', pca'nnè' yela' rnabè' quienè' ta inabi'a, cana' hueria' quiele, uca'na' yela' rnabè' quia' ta inabè'le.

**Ga una Jesús quie Pedro huananè' binubè'nè' lèbè'**

(Mt. 26.31-35; Mr. 14.27-31; Jn. 13.36-38)

<sup>31</sup>Lèzi unèrè Jesús:

—Simón, Simón, re'en xan' taxi'ibi' Satanás huelèn le'e prueba, chi usanla'adyi'le nè'èdi', chi biusanla'adyi'le nè'èdi'. Re'ennan usisin le'e ca rsisi benè' bini trigo. <sup>32</sup>Pero bablidza' Diuzi ta gacalènè' luè' ta biusanla'adyo' nè'èdi'. Na'ra cati barenaolo' xneza' tatula, na' utipalo' yaca ben' bicho', ben' nao xneza', ta inaorayaquè' mazara xneza'.

<sup>33</sup>Na'ra una Simón rēbinè' Jesús: —Zucaza' dispuesto tzalia' luè', ba'ala'cazi udze'yaquè' ra'o lu'u dyiguiba, o chi gutiyaquè' ra'o.

<sup>34</sup>Na' una Jesús rēbinè' lèbè': —Pedro, rnia' luè', bala tu binecuedyi biu, huanao' tzona lasa binubè'lo' nè'èdi'.

**Baidyin hora yedzagalao Jesús**

<sup>35</sup>Na'ra una Jesús rēbinè' leyaquè':

—Cati use'ela' le'e ga uyole dza na', bibi'ale yēxo, bibi'ale dumi, bibi'ale itu cue' guidi ta uliole, ¿bdzioguele bi ta bdzioguele?

Na' unayaquè' rēbiyaquè' Jesús: —Bibi bdzioguendo'.

<sup>36</sup>Biži una Jesús rēbinè' leyaquè': —Babetza' ca nia' huele. Chi de yēxo quiele, reya'ala' hua'alén, lèzi hua'arèle dumi. Chi bide macheta quiele, guti'le gabán quiele ta ga'ole macheta quiele hua'alén. <sup>37</sup>Lena' rnia' le'e, decazide uzun di'idza' gan' rnèn quia' lè'è guichi la'iya quie Diuzi cani: “Hualè'èyaquè' nè'èdi' ben' mala.” Pues uzucazi yugulu di'idza' gan' rnèn quia' lè'è guichi la'iya.

<sup>38</sup>Na'ra unayaquè' rēbiyaquè' lèbè':

—Señor, decazi chopa macheta quiendo'.

Na' bequēbi Jesús unè': —Conlè lēcazin hue'ennan.

**Bè'lè Jesús Diuzi di'idza' ga laona Getsemaní**

(Mt. 26.36-46; Mr. 14.32-42)

<sup>39</sup>Na'ra ca rue Jesús yugu rdze', uza'nè' zionè' gan' zu ya'a lao Olivos. Lèscan' uza'rè yaca ben'

quienè' ziolëyaquè' lëbè'. <sup>40</sup>Bè' bdyinyaquè' gan', na'ra unè' rëbinè' leyaquè':

—Ulidzale Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazèdi baza' gaca quiele.

<sup>41</sup>Lëgan' na' bega'n yaca ben' quienè' udyialao Jesús ilë'ëti' ca tu ga rdyin yo cati reru'unron. Na' ure'nè' uditzu žibinë' layu blidzè' Diuzi. <sup>42</sup>Na' unè' rëbinè' Diuzi:

—Xuza' Diuzi, inaba' laolo' ucuasa ucu'olo' në'ëdi' ca tazèdi gula baza' gaca quia'. Nacan ca quie tu ta naca sla' ruen zi yo'oga'n. Pero zua' dispuesto gaca quia' cabè' re'leno' luè', cala ca re'enda' në'ëdi'.

<sup>43</sup>Biži na' bdyinte tu ángel za' guibá gan' zënë', gucalënë' lëbè' bezi'nè' fuerza. <sup>44</sup>Na' tanto bedzagalaonè' guquenè' bayèchi' gula, gucanè' nisa yesa blaton layu nacan ca ren quienè' tu rlidzè' Diuzi du guicho du la'adyi'nè'.

<sup>45</sup>Biži bè' beyudyi blidzè' Diuzi, na' bezulinè' zeyoguè' gan' nita' yaca ben' quienè', blë'ënè' barasiyaquè', dan' banexaqueyaquè' tanto rdëbiyaquè' racayèchi'yaquè'.

<sup>46</sup>Lena' una Jesús rëbinè' leyaquè':

—¿Bixquien' rasizile? Ulechasa ulelidza Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazèdi gula baza' gaca quiele.

### Guxuyaquè' Jesús

(Mt. 26.47-56; Mr. 14.43-50; Jn. 18.2-11)

<sup>47</sup>Nerna Jesús ru'elënë' yaca ben' quiè' di'idza' cati bdyin Judas gan' zënë' dyialaotenè' lao yaca ben' ziolënë' lëbè' tuže. Lëcana' ubiga'nè'

gan' zè Jesús udaonè' situ xaganè'. Naca Judas tuže len ichiptu yaca ben' quie Jesús. <sup>48</sup>Na'ra una Jesús rëbinè' lëbè':

—Judas, con tu situ baodaolo' xaga', çlena' babao' entregar në'ëdi', bichi yugulu benè'?

<sup>49</sup>Na' biži cati blë'ë yaca ben' quie Jesús bi raza quienè', na'ra unayaquè' rëbiyaquè' lëbè':

—Señor, ¿re'leno' cuiondo' macheta quiendo' tilalëndo' leyaquè'?

<sup>50</sup>Biži na' ulio tu ben' quie Jesús macheta quienè', udinë' ben' criado quie xan' pxuzi, uchugunè' naguè' yebè. <sup>51</sup>Pero na' una Jesús rëbinè' lëbè':

—Psan quieyaquè', cana'zi.

Ude na' bda' Jesús në'ë naga ben' na', labeyacaten. <sup>52</sup>Na'ra una Jesús gudyinë' yaca xan' pxuzi, len yaca ben' napa dyin quie idao' rna'bè'ra, len yaca los demás ben' rna'bè', ben' ziorè guxu lëbè':

—¿Cala ben' uban raquele naca' dan' nu'ale macheta, nu'ale yaga za'le guxule në'ëdi'? <sup>53</sup>Cati uzulia' le'e lu'u idao' rna'bè'ra yugu dza, nica beyažole guxule në'ëdi'. Pero na'ra abdyin hora quiele cati huelële në'ëdi' ca ta rnan quiele le'e, ben' rda lao lato laochula.

### Una Pedro binubè'nè' Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup>Na' bëxuyaquè' lëbè' uquiè'yaquè' lëbè' žan yu'u quie xan' pxuzi. Na' ziorè Pedro zitu'la zenaonè' leyaquè'. <sup>55</sup>Cati bdyinyaquè' na', ulèchiyaquè' gui' lali'a gan' rbe'yaquè' neyèchoyaquè'



ru'a gui' ta yedze'eyaquë'. Na' ure'rë Pedro ladoyaquë'. <sup>56</sup>Biži tu nigula, bi' naca criada, bē' bl'ēbi' Pedro re'nē' ru'a gui', na' bega'mbi' rna'bi' lao Pedro. Beyudyi una'bi' lēbē' dyē'ēdi, na' unēbi' rēbibi' lēbē':

—Lēzi ben' re' niga, naquë' ben' quie ben' na'.

<sup>57</sup>Na' una Pedro rēbinē' lēbi':

—Nigula, binubē'da' ben' nao' can'.

<sup>58</sup>Bē' guca itu chi', bl'ē' ben' tula Pedro gan' re'nē'. Na' una ben' na' rēbinē' lēbē':

—Lēzi luē' nacarao' ben' quieyaquë'.

Pero na' una Pedro rēbinē' lēbē':

—Binaca' ben' quieyaquë'.

Binubē'da' ben' na'.

<sup>59</sup>Biži bē' guca ca itu hora, na' unē itu ben' nita' na' rēbinē' Pedro:

—Tali naca ben' ni ben' quie ben' na', como dan' nacarē' ben' estado Galilea.

<sup>60</sup>Na'ra una Pedro rēbinē' ben' una cana':

—Binezda' quie ben' rnao', binubē'da' ben' na'.

Lēcana', caora nernē Pedro cana', na' uredyi biu. <sup>61</sup>Na' beyēcho Jesús una'nē' lao Pedro. Caora na' beza'la'adyi' Pedro con ca una Jesús gudyinē' lēbē': "Bala tu binecuedyi biu, huanao' tzona lasa binubē'lo' nē'ēdi'." <sup>62</sup>Na'ra ubiga' Pedro tzala'la zionē' ga uredyinē' zi'laza gula.

**Ga ru'en di'idza' cabē' bëyaquë'  
ptituyaquë' Jesús**

(Mt. 26.67-68; Mr. 14.65)

<sup>63</sup>Na' yaca ben' napa Jesús, ptituyaquë' lēbē', udyibiyaquë' lēbē'

begorro. <sup>64</sup>Lēcana' pquiyoaquë' la'ari' laohuē', udyibiyaquë' laohuē', unayaquë' rēbiyaquë' lēbē':

—Unacara nu udyibi luē'.

<sup>65</sup>Lēcana' lega di'idza' zi' unēyaquë' gudyiyaquë' lēbē'.

**Psedyinyaquë' Jesús lao na'a yaca  
ben' r nabē'**

(Mt. 26.59-66; Mr. 14.55-64; Jn. 18.19-24)

<sup>66</sup>Biži bē' uyanī' dza tula, bedupa yaca ben' napa dyin, len yaca xan' pxuzi, len yaca ben' rusēdi ley quie Moisés, uquiē'yaquë' Jesús ziolēyaquë' lēbē' gan' re' yaca ben' napa dyin. Na' unabayaquë' rēbiyaquë' lēbē':

<sup>67</sup>—Unacara nēto' 'nacō' ben' na Diuzi ise'elē'?

Na'ra bequēbi Jesús rēbinē' leyaquë':

—Chan' inia' le'e naca' ben' na Diuzi ise'elē', nica galele quia'.

<sup>68</sup>Lēzi chi inaba' le'e tu di'idza', nica yequēbile quia', nica usanle nē'ēdi'.

<sup>69</sup>Pero baza' dza huatzeri'a nē'ēdi', bichi yugulu benē', zaquë' yebē cuēta Diuzi, ben' dera yela' r nabē' quie.

<sup>70</sup>Biži lao yuguluteyaquë' unayaquë' rēbiyaquë' lēbē':

—'Nacō' ži'i Diuzi?

Na' bequēbi Jesús rēbinē' leyaquë': —Sí, naca' ži'i Diuzi con can' nale.

<sup>71</sup>Na'ra unayaquë' rēbiyaquë' laguedyiyaquë':

—'Ca nura testigo re'ennan guida? Cuincaziro babero cabē' baona ben' niga.

**Psedyinyaquë' Jesús lao Pilato**

(Mt. 27.1-2, 11-14; Mr. 15.1-5; Jn. 18.28-38)

**23** Na'ra yugulu yaca ben' re' gan', uzuliyaquë'

uquiè'yaquè' Jesús tzahua'ayaquè' lèbè' lao Pilato, ben' naca gobernador. <sup>2</sup>Lègan' na' udaoyaquè' lèbè' xquia, unayaquè' rèbiyaquè' Pilato:

—Ben' niga rudze'yelanè' yaca ben' yedyi quiendo' rèbinè' leyaquè' bireya'ala' quižoro impuesto quie gobierno romano. Lèzi nanè' naquè' ben' use'ela' Diuzi, na' nanè' naquè' rey quiendo'.

<sup>3</sup>Na'ra unaba Pilato Jesús rèbinè' lèbè':

—¿Tabala naco' rey quie ben' Israel?

Na' bequèbi Jesús rèbinè' Pilato:

—Naca' cabè' unao'.

<sup>4</sup>Na'ra una Pilato rèbinè' yaca xan' pxuzi, len yaca los demás ben' nita' na':

—Gabi dula' de quie ben' niga.

<sup>5</sup>Na' bìzi leyaquè' unèrayaquè' zidzo gula rèbiyaquè' Pilato:

—Con ga baodenè' rudze'yelanè' yaca benè'. Pues barudze'yelanè' yaca ben' quie yaca yedyi quie estado Judea len yaca ben' quie yaca yedyi quie estado Galilea. Na' babla'nè' niga ta udze'yelanè' yaca ben' lao ciudad niga.

**Psediyinaquè' Jesús lao Herodes**

<sup>6</sup>Bè' be Pilato can' unayaquè' quie Jesús, na' unabanè' leyaquè' chi tali naca Jesús ben' quie estado Galilea. <sup>7</sup>Na' caora bequèbiyaquè' tali naquè' ben' quie estado Galilea, na' use'ela'nè' Jesús lao Herodes, dan' naca Herodes gobernador quie estado Galilea, lèscan' dan' bazurè Herodes ciudad Jerusalén. <sup>8</sup>Bìzi bè' blèè Herodes bdyin Jesús gan' zunè', lega redaohuenè' como

dan' azio zè dza re'ennè' ilè'ènè' lèbè'. Babenè' can' na yaca benè' can' ruenè'. Lena' re'ennè' ilè'ènè' lèbè' chi bihuenè' tu milagro.

<sup>9</sup>Na' uzulaonè' rnananè' Jesús zè pregunta, pero bibequèbi Jesús quienè'. <sup>10</sup>Lègan' na' bdyinrè yaca xan' pxuzi, len yaca ben' rusèdi ley quie Moisés, udaoyaquè' lèbè' xquia. Di'idza' zèra bèyaquè' condre Jesús. <sup>11</sup>Bìzi Herodes len yaca soldado quienè' uzulaoyaquè' rueyaquè' lèbè' bizinaquezi. Bgacoyaquè' lèbè' tu la'ari' tzao' ca quie la'ari' raco rey ta utituyaquè' lèbè'. Ude na' bese'ela'yaquè' lèbè' tatula lao Pilato. <sup>12</sup>Du dza na'la, Herodes len Pilato, biyu'uyaquè' dya'a bigucayaquè' amigo, pero caora na' beyacayaquè' amigo.

**Ga uchugubè'yaquè' gati Jesús**

(Mt. 27.15-26; Mr. 15.6-15; Jn. 18.39-19.16)

<sup>13</sup>Na' bè Pilato mandado bedupa yaca xan' pxuzi, len yaca ben' napa dyin, len yaca ben' lao yedyi. <sup>14</sup>Na'ra una Pilato rèbinè' leyaquè':

—Le'e badehua'ale ben' niga ni, nale rudze'yelanè' yaca benè', pero bapquèpa' lèbè' zaquè' lao le'e, na' le'e bablè'èle bibi dula' de quienè' con ca inale raole lèbè' xquia.

<sup>15</sup>Lèscan' Herodes pquèpinè' lèbè' bibi falta de quienè' bese'ela'nè' lèbè' niga. Bablè'èle bibi dula' de quienè' cuenda hua' mandado guti yaca soldado lèbè'. <sup>16</sup>Quie lena' hua' mandado qui yaca soldado lèbè' guidi, na'tera usana'nè'. —Cana' una Pilato rèbinè' leyaquè'.

<sup>17</sup>Na' bìzi bè' ga'ala' lani, de yebio Pilato tu ben' naca preso lu'u dyiguiba con ca gue'en yaca benè'.

Cana' naca costumbre quieyaquë' yebioyaquë' tu ben' naca preso dza lani pascua. Biži Pilato gu'unne' usanne' Jesús. <sup>18</sup>Pero yaca ben' nita' na' uzulaoyaquë' urediyi'yaquë' unëyaquë' zidzo:

—iBiusanlo' ben' na'! iYebiolo' Barrabás!

<sup>19</sup>Biži ben' lao Barrabás yu'unë' lu'u dyiguiba, dan' udilälënë' yaca ben' r nabë' quie lao yedyi, lëzi bëtinë' benë'. <sup>20</sup>Na' como gu'un Pilato usanne' Jesús, bëllënë' yaca ben' nita' na' mazara di'idza'. <sup>21</sup>Pero urediyi'yaquë' zidzo unayaquë':

—iUda'lo'në' lë'ë yaga cruzo!  
iUda'lo'në' lë'ë yaga cruzo!

<sup>22</sup>Na'ra tabeyuna lasa una Pilato rëbinë' leyaquë':

—¿Biži tamala babënë'? Bibi dula' de quienë' cuenda hua' mandado guti yaca soldado lëbë'. Quie lena' hua' mandado qui yaca soldado lëbë' guidi, na'tera usana'në'.

<sup>23</sup>Pero na' unëra yaca benë' zidzora urediyi'yaquë' rëbiyaquë' Pilato ta huenë' mandado uda'yaquë' Jesús lë'ë yaga cruzo. Tanto urediyi'yaquë' yaca ben' nita' na' len yaca xan' pxuzi, bëyaquë' gan gucan cabë' gu'unyaquë'. <sup>24</sup>Cana' guca bë Pilato mandado cabë' unabayaquë' huenë'. <sup>25</sup>Cana' guca ulio Pilato con ben' gu'unyaquë' yero lu'u dyiguiba, ben' guca dilälë ben' napa dyin, ben' bëti benë'. Cana' guca psedyin Pilato Jesús lao na'a yaca ben' hue bizinaquezi conlë lëbë'.

**Bda'yaquë' Jesús lë'ë yaga cruzo**

(Mt. 27.32-44; Mr. 15.21-32; Jn. 19.17-27)

<sup>26</sup>Caora bë' nequië'yaquë' Jesús ta uda'yaquë' lëbë' lë'ë yaga cruzo,

na' bëxoyaquë' tu ben' lao Simón, ben' yedyi Cirene, ben' zeza' layela. Na' bëyaquë' mandado bi'anë' yaga cruzo zionë' nu'anë'n zioquë' zenaohuë' Jesús.

<sup>27</sup>Na' yaca ben' zë gula zioyaquë' zenaoyaquë' leyaquë'. Lëscan' zenaonigula zë zioyaquë' rbediyi'yaquë' raqueyaquë' beyëchi', dan' rusacayaquë' Jesús bizinaquezi.

<sup>28</sup>Na' biži Jesús beyëchi'në' unë' rëbinë' leyaquë':

—Le'e nigula ciudad Jerusalén, bicuedyile por në'ëdi'. Yela'cala cuedyile por le'e len ži'ile. <sup>29</sup>Porque baza' dza gaca bayëchi' gula quiele. Na' tanto gaca bayëchi' quiele, bisule gusto chi zu ži'ile, bisule gusto chi nu'ale bdao', bisule gusto chi ruga'adyile xcuidi'. <sup>30</sup>Lëdza na' tanto idzebile bi gaca quiele, hueguilole ga ucachi'laole ga naca lë'ë ya'a. <sup>31</sup>Nia' le'e chi ruelëyaquë' yaga ya'a bizinaquezi, žbižira huelëyaquë' yaga bidyi?

<sup>32</sup>Lëzi nequië'rëyaquë' chopa yaca ben' bë tamala ta gutiyaquë' leyaquë' tzaže len Jesús. <sup>33</sup>Na' cati bdyinyaquë' ga laona chita guicho ben' huati, lëgan' na' bda'yaquë' lëbë' lë'ë yaga cruzo. Lëzirë bda'rëyaquë' chopa yaca ben' bë tamala. Tunë' bda'yaquë' zaquë' yebë, na' itunë' bda'yaquë' zaquë' yega'. <sup>34</sup>Cati baruda'yaquë' Jesús lë'ë yaga cruzo unë' rëbinë' Diuzi:

—Xuza' Diuzi, bezi'že quieyaquë', dan' bineziyaquë' bi rueyaquë'.

Ude beyudyi na', bë yaca soldado tu sorteo entre leyaquë' ca nulayaquë' gaca quie žaba Jesús. <sup>35</sup>Biži yaca ben' nita' na', bega'nyaquë' rna'yaquë' lëbë'.

Na' lente yaca ben' napa dyin  
rutituyaquë' lëbë' unayaquë'  
rëbiyaquë' laguediyiaquë':

—Gucalënë' ben' tula,  
gacalëgaranë' cuinnë' chi tali naquë'  
ben' Cristo, ben' use'ela' Diuzi.

<sup>36</sup>Lëscan' ptiturë yaca soldado  
lëbë'. Bebiga'yaquë' gan' dë'ë,  
rzi'yaquë' vino naca sla' ruyo'oyaquë'  
lëbë'. <sup>37</sup>Unayaquë' rëbiyaquë' lëbë':

—Chi tali naco' rey quie ben'  
Israel, pte psela cuinlo'.

<sup>38</sup>Lë'ë yaga cruzo zaquë' ga zu  
guichoguë', bda'yaquë' tu yaga ta'a  
dyian letra griego, len letra latín,  
len letra hebreo. Lë'ë yaga ta'a rnan  
cani: “Ben' ni naquë' rey quie yaca  
ben' Israel.”

<sup>39</sup>Biži tu ben' bë tamala, ben'  
da'rë cuëta lë'ënë' lë'ë yaga cruzo,  
ptiturënë' Jesús rëbinë' lëbë':

—Chi tali naco' ben' Cristo, pte  
psela cuinlo' len nëto'.

<sup>40</sup>Pero ben' itu laguedyinë'  
udilanë' lëbë' unë' rëbinë' lëbë':

—¿Nica rdzebo' Diuzi hora cati  
gatio'? <sup>41</sup>Ca naca ra'o de dula'  
xquia quiero, na'a redzagalaoro  
barguizoro ca naca tamala bëro. Ta  
reya'ala'cazi gata' castigo quiero,  
pero ben' niga redzagalaonë', den'  
bibí tamala de bënë'.

<sup>42</sup>Na'ra unë' gudyinë' Jesús:  
—Jesús, cati bazulo' gan' inabë'lo',  
yeza'la'adyo' quia' në'ëdi'.

<sup>43</sup>Na' una Jesús rëbinë' lëbë':  
—Tali rnia' luë', na'a dza bazulo'  
len në'ëdi' guibá gan' zu Diuzi.

### Ca guca guti Jesús

(Mt. 27.45-56; Mr. 15.33-41; Jn. 19.28-30)

<sup>44</sup>Biži cati baruen cadu gatzo dza,  
bechula lao duže ciudad na' hasta

reda tzona quie sadze'. <sup>45</sup>Bechula  
lao ubidza. Caora na' bre'eza la'ari'  
zë gatzo lao' idao' r nabë'ra gucan  
chopa la'a. <sup>46</sup>Na'ra urediyia' Jesús  
unë' rëbinë' Diuzi:

—Xuza' Diuzi, ruca'na' bichi be  
quia' lao na'alo'.

Ude beyudyi unë' cana', gutinë'.

<sup>47</sup>Biži ben' naca capitán quie yaca  
soldado romano, cati bablë'ënë' can'  
guca quie Jesús, bënë' Diuzi ben' že  
unë':

—Tali ben' niga naquë' ben' huen,  
bibí tamala bënë'.

<sup>48</sup>Na' biži yaca ben' bida  
blë'ë yaca can' guca quie Jesús,  
zeyoyaquë' žan yu'u rbiyaquë'  
ru'achu'uyaquë', dan' raqueyaquë'  
beyëchi' cabë' bëyaquë' quie Jesús.  
<sup>49</sup>Pero yaca ben' unao Jesús, lenrë  
yaca nigula unao lëbë' desde dza  
uza'në' estado Galilea, bega'nyaquë'  
nita'yaquë' zitu'la rna'yaquë' can'  
guca quienë'.

### Pcachi'yaquë' Jesús

(Mt. 27.57-61; Mr. 15.42-47; Jn. 19.38-42)

<sup>50</sup>Lëgan' na' uzurë tu ben'  
dya'a, ben' rue quie xti'idza' Diuzi  
laonë' José. Naquë' ben' yedyi lao  
Arimatea quie estado Judea. Napë'  
dyin, naquë' ben' r nabë' quie yaca  
ben' Israel. <sup>51</sup>Lëben' lao José rbezë'  
dza guida ben' ise'ela' Diuzi ta  
inabë'në' lao yedyi layu. Bibënë'  
tuzi cabë' bë yaca los demás  
ben' naparë dyin. <sup>52</sup>Na'ra uyonë'  
yenabanë' lao Pilato chi bihue'në'  
lato ta yechisanë' cuerpo quie Jesús.  
<sup>53</sup>Na' ude bechisanë' cuerpo quie  
Jesús lë'ë yaga cruzo, betubinë'  
lëbë' la'ari', bdze'në' lëbë' tu lu'u  
yero beló yo ta zapqui'inyaquë',

nitu nunu nedze'yaquë' gan'.

<sup>54</sup>Lëdza na' nacan dza vierna cati rucuezayaquë' ta gaoyaquë' quie dza huezila'adyi'. Baodze' bagazi sulao dza huezila'adyi'.

<sup>55</sup>Na' yaca nigula unao Jesús desde dza uza'në' estado Galilea, uyoyaquë' yena'yaquë' gan' bdze'yaquë' cuerpo quienë'. <sup>56</sup>Ude beyudyi na', beza'yaquë' zeyoyaquë' žan yu'u quieyaquë' bapcuezayaquë' aceite rla' žixi žeo len güento ta ilëpiyaquë' cuerpo quie Jesús. Ude beyudyi bëyaquë' can', bezila'adyi'yaquë' según ca rnan lë'ë guichi la'iya quie Diuzi.

**Ga ru'en di'idza' cabë' guca cati  
beban Jesús**

(Mt. 28.1-10; Mr. 16.1-8; Jn. 20.1-10)

**24** Na' bala baza' reni' dza domingo, zio yaca nigula gan' de yero beló yo gan' pcachi'yaquë' Jesús. Nu'ayaquë' aceite rla' žixi žeo ta pcuezayaquë'. <sup>2</sup>Bizi bë' bdyinyaquë' gan', rna'yaquë' baneyalo ru'a yero beló yo. Bira da' yo laga' ru'a yero gan' bda'yaquë'n. <sup>3</sup>Na'ra uyu'uayaquë' yero beló yo rna'yaquë' bira de cuerpo quie Señor Jesús gan'. <sup>4</sup>Lega bega'nyaquë' bdzebiyaquë'. Bira biubinyaquë' bi hueyaquë'. Caora na' blë'ëyaquë' bazë chopa be'mbyu zaquë' laoyaquë' nacoyaquë' la'ari' bezëri di ta raca titi'. <sup>5</sup>Na' bizi bezëta' laoyaquë' layu, lega bdzebiyaquë'. Na' una yaca be'mbyu rëbiyaquë' leyaquë':  
—¿Bixquien' rdale reguilole tu ben' naban gan' rucachi'yaquë' ben' huati? <sup>6</sup>Bira denë' niga. Babebannë' zunë' tatula. Uleza'la'adyi' can'

unë' le'e cati nezulënë' le'e estado Galilea. <sup>7</sup>Lëdza na' unë' gudyinë' le'e decazide usedyin yaca benë' lëbë' lao na'a yaca ben' rnabë', na' uda'yaquë' lëbë' lë'ë yaga cruzo, pero bë' gaca lao tzona dza, huebannë' tatula lëbë', ben' bichi yugulu benë'.

<sup>8</sup>Lëcana' beza'la'adyi'yaquë' ca una Jesús gudyinë' leyaquë'. <sup>9</sup>Ude beyudyi na', beroyaquë' lu'u yero beló yo beza'yaquë' zioyaquë' udixogue'yaquë' lao chiptu yaca ben' quie Jesús, len yaca los demás ben' nao xneza Jesús can' guca quieyaquë'. <sup>10</sup>Na' lëyaca nigula, ben' uyo yetixogue' yaca ben' quie Jesús, tuë' laohuë' María Magdalena, ituë' laohuë' Juana, ituë' laohuë' María, naquë' žna' Santiago. Lëscan' uyorë yaca nigula naca laguediyayaquë'. <sup>11</sup>Na' bizi yaca ben' quie Jesús guqueyaquë' calëla can' gudyi yaca nigula leyaquë'. Biguleyaquë' quieyaquë'.

<sup>12</sup>Den' uyocazi Pedro uyu'unë' be zionë' taria gan' de yero beló yo. Na' bë' una'në' lu'u yero beló yo, blë'ënë' la'ari' ta ptubiyaquë' cuerpo quie Jesús, bega'nnan re'nan cuinzin. Na'ra tu bebanzinë' can' blë'ënë' beza'në' zeyoguë' žan yu'u quienë'.

**Neza zio Emaús ptilalao Jesús chopa  
ben' unao lëbë'**

(Mr. 16.12-13)

<sup>13</sup>Lëdza na'atezi, beza' chopa yaca ben' unao xneza Jesús ciudad Jerusalén, zeyoyaquë' yedyi quieyaquë' laona Emaús. Na' ciudad Jerusalén para yedyi quieyaquë' nacan tzona lengua. <sup>14</sup>Zioyaquë'

ru'eyaqué' di'idza' ca bê yaca ben' ciudad Jerusalén psacayaqué' Jesús. <sup>15</sup>Biži tu rza'yaqué' zioyaqué' ru'eyaqué' di'idza', cati ubiga' cuin Jesús cuëta leyaqué' baziolënë' leyaqué' tzaže. <sup>16</sup>Pero ba'alala'cazi blë'ëyaqué' lëbë', bibezaqueyaqué' chi lëbë'. <sup>17</sup>Na'ra una Jesús rëbinë' leyaqué':

—¿Biži guca rnële yu'ule neza? ¿Bixquien' raqueyëchi'le?

<sup>18</sup>Na' tu ben' ziolë laguedyi laonë' Cleofas unënë' rëbinë' Jesús:

—Banezi yugulu benë' can' guca ciudad Jerusalén nionasigazi. ¿Cala zurao' luë' ciudad Jerusalén, na' biunezo' bin' guca?

<sup>19</sup>Na'ra unaba Jesús leyaqué':  
—¿Cabizi guca gan'?

Na' unayaqué' rëbiyaqué' lëbë':  
—Guca tu tamala gula quie tu ben' lao Jesús, ben' yedyi Nazaret.

Guquë' ben' udixogue' xti'idza' Diuzi. Bënë' yela' huaca, psëdinë' yaca benë' di'idza' dya'a. Yaxe Diuzi len yaca benë' can' bënë'. <sup>20</sup>Pero yaca xan' pxuzi, len yaca los demás ben' napa dyin quiero, psedyinyaqué' lëbë' lao na'a ben' bda' lëbë' lë'ë yaga cruzo bëtiyaqué' lëbë'. <sup>21</sup>Pero nëto' guquendo' naqué' ben' use'ela' Diuzi ta ute uselanë' ra'o ben' Israel cuenda bira inabë' yaca ben' naca gobierno romano ra'o. Na' biži azio lao tzona dza bëtiyaqué' lëbë'. <sup>22</sup>Pero na'a zila, bala yaca nigula nacalëndo' tuzi unaondo' lëbë', uyoyaqué' lu'u beló yo gan' pcachi'yaqué' lëbë'. Na' bega'nndo' rebanendo' ca gudyiyaqué' nëto' blë'ëyaqué' gan'.

<sup>23</sup>Bela'yaqué' udixogue'yaqué' nëto' bide cuerpo quienë' lu'u yero

beló yo gan' pcachi'yaqué' lëbë'. Unayaqué' blë'ëyaqué' chopa ben' naca ángel, ben' una babeban Jesús zunë' tatula. <sup>24</sup>Lëzirë ibala be'mbyu laguedyindo', ben' unao lëbë', uyoyaqué' uyu'uayaqué' lu'u yero beló yo, na' blë'ëyaqué' nacan tali can' una yaca nigula, pero na' biblë'ëyaqué' Jesús.

<sup>25</sup>Na'ra una Jesús rëbinë' leyaqué':

—Taže nerdzioguele tzioñe'ele cabë' na xti'idza' Diuzi. Lega ruen zëdi quiele galele yugulu cabë' una yaca ben' udixogue' xti'idza' Diuzi dza na'la. <sup>26</sup>¿Biži binezile rnan lë'ë guichi la'ya quie Diuzi yedzagalao ben' ise'ela' Diuzi gatinë', te na' yebannë' tatula hue Diuzi lëbë' ben' žëra? —Cana' una Jesús rëbinë' leyaqué'.

<sup>27</sup>Na'ra uzulaonë' ruxi'idze'në' leyaqué' ca na di'idza' la'ya quie Diuzi gan' rguixogue'n quie ben' ise'ela' Diuzi. Conlë di'idza' bzu Moisés lë'ë guichi uzulaonë' ruxi'idze'në' leyaqué', bzalaorë' unarë' mazara hasta gan' bzu yaca profeta di'idza' lë'ë guichi.

<sup>28</sup>Bë' bdyinyaqué' yedyi gan' zioyaqué', labëtenë' badyinzi ta sëtë' tzu'unë' neza tatula. <sup>29</sup>Pero leyaqué' bdyiabë'yaqué' quienë' ta yega'nnë' len leyaqué'. Lena' unayaqué' rëbiyaqué' lëbë':

—Bega'n'lë nëto' niga. Baza' rchula bahuen rtze'.

Na'ra bega'nnë' len leyaqué' gan'. <sup>30</sup>Caora baore'lënë' leyaqué' lao mesa ta gaoyaqué' rtze', na' uži'në' tu yëta xtila unë' rëbinë' Diuzi diuxcalelo'. Beyudyi na', bžožoguën' bë'në'n leyaqué'. <sup>31</sup>Lëcana' beyeni'

laoyaquë' bezaqueyaquë' lëbë'.  
Na' bizi lëbë' tu beyulazinë', bira  
blë'ëyaquë' lëbë'. <sup>32</sup>Na'ra unayaquë'  
bë'yaquë' di'idza' lao rupayaquë'  
unëyaquë':

—¿Cala tali na' bedaohue guicho  
laxta'oro caora za'llënë' ra'o tu neza  
ruxi'idze'në' ra'o quie di'idza' zu  
lë'ë guichi la'iya quie Diuzi?

<sup>33</sup>Na'ra labeyu'uteyaquë' neza  
tatula, zioyaquë' ciudad Jerusalén  
gan' yetilayaquë' nita' yaca chiptu  
ben' quie Jesús, len yaca los demás  
ben' unao lëbë'. <sup>34</sup>Na' una yaca  
ben' bgu'udi' gan', rëbiyaquë' ben'  
zabdyin:

—Nacan tali babeban Señor  
quiero. Bablë'ë Simón lëbë'.

<sup>35</sup>Na' unayaquë' rëbiyaquë'  
leyaquë' can' guca quieyaquë' tu  
neza bëllëyaquë' Jesús di'idza', pero  
bibezaqueyaquë' chi lëbë' hasta  
bžozonë' yëta xtla bë'nënë'n leyaquë'.

**Ptilalao Jesús yaca ben' quienë'**

(Mt. 28.16-20; Mr. 16.14-18; Jn. 20.19-23)

<sup>36</sup>Bizi nenita'teyaquë'  
neru'eyaquë' di'idza' cati bdyin  
Jesús yësazi bazënë' ladoyaquë'  
blidzanë' leyaquë'unë':

—Cue' chizi laxta'ole.

<sup>37</sup>Pero lega bdzebiyaquë'  
guqueyaquë' blë'ëyaquë' ludza' ben'  
huati. <sup>38</sup>Lena' una Jesús rëbinë'  
leyaquë':

—¿Bixquien' rdzebile? ¿Bixquien'  
raquele cala në'ëdi'? <sup>39</sup>Ulena'cara  
na'a len ni'a, në'ëdi'cazi. Neya'a  
në'ëdi' naca' benë', binaca' ludza' ben'  
huati. Tu ludza' ben' huati binacan  
bë'ëla', biyu'un chita can' rlë'ële naca'.

<sup>40</sup>Tu ru'elënë' leyaquë' di'idza',  
blu'enë' leyaquë' në'ë len ni'anë'.

<sup>41</sup>Pero como dan' binegaleyaquë'  
chi lëbë', bega'nyaquë' rebaneyaquë'  
redaohueyaquë', unë' rëbinë'  
leyaquë':

—¿Bide lë'ëti' quiele gunle lë'ëti'  
gaohua'?

<sup>42</sup>Na'ra bë'yaquë' lëbë' tu naga  
bela banegüechi len tu yëta quie  
bezo yudzu bdyin'dao'. <sup>43</sup>Na'ra  
uži'nënë'n udaonë'n zaquë'lao  
leyaquë'. <sup>44</sup>Na' unë' rëbinë'  
leyaquë':

—Baguca quia' cabë' can' baonia'  
le'e gaca quia' dza na'la, dza cati  
nezulia' le'e. Agudya' le'e decazide  
uzun yugulu di'idza' can' rnan quia'  
në'ëdi' lë'ë guichi bë Moisés, len  
guichi bë yaca profeta, len guichi  
Salmos.

<sup>45</sup>Na'ra pxi'idze'në' leyaquë' can'  
na lë'ë guichi la'iya quie Diuzi.

<sup>46</sup>Lena' unë' rëbinë' leyaquë':

—Cani rnën lë'ë guichi la'iya  
quie Diuzi. Rnan decazide gati  
ben' ise'ela' Diuzi lao yedyi layu.  
Te beyudyi na', yebannë' tatula  
gaca lao tzona dza. <sup>47</sup>Lëscan' rnan  
lë'ë guichi la'iya quie Diuzi ruen  
dyiabë' tzio yaca ben' quienë'  
tzetixogue'yaquë' yaca ben' nita'  
lao duže yedyi layu de que reya'ala'  
yetza'yaquë' pensari quieyaquë'  
inaoyaquë' në'ëdi' cuenda yezi'že  
Diuzi dula' xquia quieyaquë'.  
Ciudad Jerusalén reya'ala'  
sulaoyaquë' quixogue'yaquë',  
na'tera tzioyaquë' yedyi tula. <sup>48</sup>Le'e  
nacale testigo quia' blë'ële baguca  
quia' can' rnan lë'ë guichi la'iya  
quie Diuzi. <sup>49</sup>Na' ise'ela' Bichi Be  
quie Diuzi ta tzu'unë' lu'u guicho  
laxta'ole can' una Xuza' huenë'  
quiele. Quie lena' cuezale niga

ciudad Jerusalén hasta que chezi Bichi Be quie Diuzi tzu'unë' lu'u guicho laxta'ole cuenda gata' yela' huaca quiele. —Cana' una Jesús gudyinë' leyaquë'.

**Beyëpi Jesús zeyonë' guibá**

*(Mr. 16.19-20)*

<sup>50</sup>Biži na' uquië' Jesús leyaquë' broyaquë' lao ciudad Jerusalén uza'yaquë' bdyinyaquë' yedyi

Betania. Ude beyudyi na', uchisanë' në'ë bëla'iyane' leyaquë'. <sup>51</sup>Bë' beyudyi bëla'iyane' leyaquë', na' beyëpinë' ladza yeyonë' guibá. <sup>52</sup>Na' uyonla'adyi'yaquë' lëbë' gan'. Ude beyudyi na', beza'yaquë' zeyoyaquë' ciudad Jerusalén tatula. Na' lega redaohueyaquë', <sup>53</sup>riocaziyaquë' yugu dza lu'u idao' r nabë'ra rulidzayaquë' rueyaquë' Diuzi ben' že. Amén.